

康熙武定府志

武定府志卷之四 上

中憲大夫知武定軍民府事陽川松茂道按察司副使兼主簿賢武肅南武定

奉政大夫同知武定軍民府事三韓尚書魏縣縣甫

箋註

奉直大夫知和曲州事三韓趙世錫兼公甫

奉直大夫知祿勸州事信都陳淳紫巖南縣縣修

文林郎知元謀縣事萬全羅綸大經甫

編次

登仕郎儒學教授曲陽潘祚遠中甫

本府紳士同訂

藝文

易曰觀乎人文以化成天下藝文之興由來尚矣邇
書契以來作者百家下及山陬海筮之區皆擅雕龍
信同文之治不限羣龍也真自盛覽張叔受經司馬
相如所作合組列繡諸篇遂開文學之宗武陽文運
代興亦武官茲土者流覽民生利弊徃徃發爲弘議
形諸詠歌其各體互異分道並驅者彬彬可攷也作
藝文志

詩

五言古

元謀縣歌

楊慎

遙見元謀縣塚墓何累累
借問何人墓官尸與吏骸山川
多瘴癘仕宦少生回三月春草青
元謀不可行九月草交頭元謀不可遊
嗟爾營屯子何爲歟來此九州幸自寬
何爲此遊盤

七言古

宿金沙江

楊慎

往年曾向嘉陵宿驛樓東畔
關杆曲江聲徹夜攪離愁月
色中天照幽獨豈意飄零瘴海頭
嘉陵回首轉悠長江聲

月色那堪論腸斷金沙萬里樓

渡江咏梅

楊慎

我渡烟江來瘴國毒草嵐叢愁箐黑忽見新梅粲路傍幽
秀古艷空林色絕世獨立誰相憐解鞍藉草坐梅邊芬蓋
香韵風能通綽約仙姿月與傳根地錦苜迷蟻縫樹杪黃
昏搖烏夢飄英點綴似畱人顧影徘徊若相送焦桐椽竹
亦何心中卽一見兩知音誰謂南枝無北道願譜金徽播
玉琴

烏蒙山

失名

此山奇絕不可比鬱鬱蒼蒼孰能紀晦明幻化神器潛讓
帝艱難不到此山鬼吹吽木客號古藤絙索垂猿猱山禽
相韻隔雲宋落日熊羆呼其曹路斷吊橋懸怪石宛若晴
虹高萬尺懸撞度索越他山颯颯天風吹羽翮烟霞不隔
仙源溪仙境渺茫何處尋人似避秦雞犬近松根屐足蛩
然音洞門深鎖桃千樹山靈謝指桃源路翠觀岑青紫拍
圖鬼工鑿處心驚怖上有惠婦清且漪天地常來沐浴此
雙頭孔雀有千年白鹿塵塵獨角長仙人酤我長春醕一
飲歡襟無處所仙詞瀾澆滌塵煩自信仙緣吾與汝

王總戎招遊香海菴

顧岱

冥月仙臺楊柳陌將軍載酒同携屐
春雨春風煖更寒桃花李花紅復白
錦帶珣弓繫綺裘金鞍玉勒五花虬
帳前八百好鎗手幾由虎豹生離愁
香海座上無生客新語迂儒亦弄憤
胡牀閑射共彈碁日暮蒼茵再移席
行厨珍列酒氣濃健兒會獵前高峯
射鹿一隻致麾下割肉生啖何豪雄
隨意舉觴醉不覺催花流轉花滿握
半龕松月風冷冷小院藥闌春濯也
曲水蘭亭久不開東山歌妓無人推
眼前春色誰爲主別後清流幾個來
我醉隨君醒語佛醒

能憂人醉能逸紅王重調十五弦虎頭一醉三千日

斯立樓歌

張翰華

金沙浪捲潮頭濕獅子山前風習习人傑原非藉地靈樓
成所以名斯立斯立樓名雅俗通共欽太守方三十公暇
登臨放眼看無數哀鴻漸鱗集水光山色浩無邊花鳥虫
魚都撫拾我欲携尊樓上頭舉杯一似長鯨吸興酣捉筆
詩不成亂灑壁間皆墨汁

五言律

登獅山

張應揚

振袂獅山上翻然物外蹤
巖溪千仞石嶺秀萬株松
彼岸登何處祇園步幾重
坐來塵不到片月出孤峯

其二

不識獅山寺
溪林一徑分
談經花是雨
洗鉢水爲雲
塔影諸天近
松聲萬壑聞
浮生閒半日
肯惜醉顏醺

和登獅山

張喬松

追隨驄馬使
陟屺探竒蹤
雲嶠三千界
風濤十里松
龍歸元洞杳
獅臥翠雲重
悟透寒中秘
寒潭見遠峯

其三

梵刹獅山半禪宗
鷲嶺分曇花紅炫日
抵樹璫連雲旛影
風前動爐香天際聞
歸生因坐久對酒欲成醺

前題

丘因之

一到高峯頂斜陽未夕
驪勢如驅石墮色不與松分
蕭蕭常疑兩崖巍真插雲
夜來獅子吼鐘磬半空聞

前題

姜思唐

飛壁隱平嶂危雲砌石
生長餘天子氣猶傍帝星
明泉響落溪瀾松陰入
近城登臨懷古意閒聽野人評

同遊獅山

高薦

從步獅山頂悠朕塵外蹤岩飛九山水林響萬年松龍隱
歸何處獅眠第幾重晚來烟霧淨紫氣滿前峯
陪來遊古寺塵世香朕分飛閣懸青霽層巒出白雲若聲
中谷徹梵語半空聞已覺三天通還期一醉醺

香泉禪襪

王清賢

東郊修禪處每盛落花前香以時增味人和飲益鮮源聲
同白日流潔擬青天逝者真千古芳名歲歲傳

花開文院

王清賢

縱擬獅山上臨風一色清花神酣上苑過客悟浮生姿態

心能淡情淡眼倍明依稀天上墜風就却無聲

翠屏排闥

王清賢

漫說荒城苦賞前有翠屏參差樓閣坐羅列耀蒼冥賦爲
探奇就直緣同俗停群山分脉絡有色各青青

東園

武晉府
祭龍驤

天地因興光陰過客軒經營會開藏難聚每傾樽茲去
花仍艷我留竹見孫清風遺愛處不獨是東園

憑橋風雨

祭龍驤

患人稱子產今復獲王喬岸隔烟雲按舞鳴風雨蕭波橫

百尺影月映半弓
照夜靜鐘聲遠悠
度石磴

佐丘花木

蔡龍驤

幽谷吐青葩
朝烟暮落霞
山青鹿見跡
雪積鳥啣花
自是無冬夏
何從紀歲華
武陽麥熟翠
紅滿爲誰誇

香泉板襖

蔡龍驤

修禊繼蘭亭
滄浪歌可聽
天闊雲影沈
人傑水紋聲
雅俗各爲聚
醇醪漫自停
花香空蝶舞
泉外草青生

讀楊母辛節婦傳

王清賢

鬚眉失節義
巾幗獨能晉
烈傳平生佩
貞心誓死酬
身全

斯固矣志遂更何求爲黃楊家婦芳型百世流

獅山紀遊

程仲慤

冒雪登獅頂獅王未可尋懸巖藏閣小密樹作山深
蒼粒笙歌濺詩成鳥語侵何緣閒半日齋石聚知音

其二

日望獅山頂天隨去鳥長雲飛無定跡烟暗有幽光
歸燕愁王謝潛龍怨建章青蒼如可問安在入遐荒

其三

援巖登絕頂翻是極平時麥隴千行碧杯泉九曲流
幾處

來路險一覽衆山浮爲問陶彭澤桃園今在不

獅子山

程仲愚

獅以山垂象山因勢得名崢嶸崇異城突兀枕荒城古樹連雲立巨鰲片石橫登高時一眺呼吸與天平

其二

高峯攀陟處天路似相違泉吼獅搏石風鳴樹奏韶巖懸樓影瀾林密鳥聲驕勢扼遶城壯登臨一望遙

舊城大佛寺

馮敬

利國元治正世盛又康熙客問前朝事年煥五百奇野花

開未了溪水不西之那堪遲暮眼悠悠人代移

東園

高朗

闢地以成趣獅山興不窮閒來雲度水靜聽樹生風
易喚新詩後花飛午座中東園多雅集作賦讓誰雄

宿香海菴

釋靜岸

香刹高峯上崔巍接斗牛山溪龍臥穩花淡月來幽
樹蔭天無夏泉寒夜帶秋爲貪清意遠月滿尙凭樓

東園

釋惟寬

萬井烟霞上亭臺鎖一溪花光疑月早雲影覺天低
北闕

來丹詔南山入品題有懷頻眺望振袂撫蒼黎

七言律

述懷

建文帝

牢落西南四十秋蕭蕭白髮已盈頭乾坤有恨家何在江漢無情水自流長樂宮中雲氣散朝元閣上雨聲收新蒲細柳年光綠野老吞聲哭未休

西粵途中漫賦

建文帝

風塵四起忽南侵天命潛移四海心鳳返丹山紅日遠龍歸蒼海白雲深紫微有象星還拱玉漏無聲水自沉遙想

紫城今夜月六宮猶望翠華臨

漫賦

建文帝

園罷楞嚴磬懶歡笑看黃屋寄曇標南遊嶂嶺千層迴北
望天門萬里遙歎段久忘飛鳳闕袞袞新換袞龍袍百官
此日知何處惟有群鴉早晚朝

和建文帝西粵途中

編修
程濟

吳霜點上髭毛侵不改惟餘匪石心作客歲寒應自久避
人崖壑未曾淡龍蛇遠逐知心少魚雁依稀遠信沉金陵
回首今何事短筇高屐一登臨

獅山

本府同知

左 禪

仙臺蘿幌有丹梯入翠褰
袞出處迷遠峯伏雲來辟穀蹊
狂掃石謾晉題步虛曾嘯青天止
教極高明白日低一目
千山惟此勝風烟不到鶴幽栖

重遊獅山

雲南鎮撫

沐朝弼

重來武定訪名山風景依朕圖
畫間綠樹鶯啼僧入定青
山雲靜鳥飛還因談石上三生
話剩得山中幾日閒策杖
尋詩崖壁逼芒鞋踏破石痕斑

又

一路尋幽典趣嘉穿雲步到梵王家綠窗櫺軒蕭瑟竹紅
閣崖前點上花絕頂僧房閒日月半空佛閣倚烟霞水光
日色渾如舊不覺年來鬢有華

題土主祠

祠在舊縣田心俗名天子堂

石簡縣令董旻

亢陽爲虐二旬經憂旱無何禱至靈田垌龜文苗欲稿雲
將龍爾稼回青端期歲有豐登樂却喜民無菜色形刻石
題詩紀盛事漫于祠下搆危亭

獅山懷古

御史王

澗底泉流樹杪山僧房淡隱白雲間寒宵靜榻談玄座暮

雨城邊乞食還虛跡久傳千載勝禪心不改一身閒落花
洞口晨游處飛着袈裟萬點斑

黑龍溪

累日談玄逸興嘉因知方外絕喧嘩雲堂月影梧桐樹塔
院香生簾窻花卓錫喜沾新境界隨身常憶舊袈裟離歌
一曲難分手問訊河梁路轉賒

月寺獅山

錢兆閏

真域名山幾鬱盤獨憐獅伏此崗巒松濤夜吼翻經室花
雨朝窺說法壇高塔半空看燕下沉潭百尺有龍蟠當年

卓錫今何處雲鎖禪關片月寒

獅山懷古

劉懋武

閒來縱自萬山頭懷古悲歌不自休
燕市兵威從北振金陵王氣自東流
龍顏去國八千里鶴淚還朝四十秋
往事未須論得失楚弓還是楚人收

又

萬仞峯頭坐翠微白雲如絮傍人飛
儼然太守新題字高掛先皇舊納衣
老樹當軒青作嶂古藤蔓壁綠成緯
去思他日應留記若個看山不淚揮

新日新題

鄧世彥

獅山恍惚隱金鷄
狡兔東潛不易圖
義戰倒顛南北息
朝會谷說龍符轉
開圭匪若明
地傳養多方乳嗅
擎滿耳
太平風韻起歸來
跨鶴莫躊躇

前題

學使方沆

選勝獅峯景自幽
襟帷聊共採真游
藤蘿積翠迷紺宇
鐘磬清音度石樓
一水微茫天外盡
群山俯伏掌中收
逢僧更說龍潛事
琴瑟松風起暮愁

獅山

趙白柱

獅嶺嵒巍掛瑋蘿峴崖絕壁景偏多松風響共鐘聲遠
日光涵塔影過先帝幾年遺肖像山僧此際動悲歌我來
欲向空門裏塵劫區區只刹那

又

徙倚靈崖百念灰萎七芳草思悠哉曇雲澹七諸緣淨皓
月團七法眼開招隱已從元亮逸消魂寧效屈平哀故園
山色堪馳戀擺落西風歸去來

前題

姜思睿

高峰盡七向雲連半是烟霞半是天怪石掀翻如鶴舞平

泉燒甃似龍眠蜀鵲啼處岩花落漢馬通時野草鮮
愁足捫蘿僧對語虎溪一笑又千年

和建文帝韻

金鵬奮

金風起處樹驚秋獅子峯頭紫氣流六宇飛雲開萬嶂諸
天靜梵傍三州崖懸馬足依山轉日暮蟬聲帶雨收廢帝
不須遺舊憾乾坤千古總成浮

謁建文帝

江盈科

當年帝命歸真主解語飄然出玉京丹鼎漸傳益渡遠翠
花搖落錫飛輕山溪別有乾坤好地勝還瞻日月明自是

聖恩寬似海故教常住不須驚

又

二祖艱辛創業度太孫贏得興鄒毛雞鳴焚霧仍三喔龍
卧演雲肯再還趺坐不須繁近侍法身應自擁諸天群鳥
有意何年去遙憶詩篇淚黯然

獅山懷古

失名

帝子何爲作遠遊竟辭丹陛到林丘河山帶礪渾如夢宮
闕嵯峨總是漚惟有僧猷磐石磬更無人進羣雲袞當年
苦得伊周佐廣孝安施術士謀

又

獅嶺遙看萬壑低，巉崖常有白雲棲。
森陰卉木連天際，層疊樓臺隱樹西。
高閣依肱存廟貌，殘碑彷彿見標題。
攜樽莫論前朝事，共向松風聽鳥啼。

次叅軍魏翰先獅山謁建文帝韻

楊玄祐

清風兩袖入西滇，吏隱山城渾似禪。
糧聚北滇嗟鏃羽，符分南幕喜烹鮮。
吳鉤匣吼三山月，江筆花飛萬里天。
弔古獅林閒灑翰，雲間鶴淚應鏗然。

登獅頂

楊玄祐

好趁春晴到絕巔
雨花未許落僧前
凭舒英盼收蒼靄
任教芒鞋染翠烟
衣拂石龕星斗繫
鳥穿雲樹畫圖懸
獨憐象馬殊今昔
鹿苑蜂臺色黯然

登獅山

本郎
司李林啟旦

秋容萬里帶江回
却羨寒花故國開
寺隱龍孫千嶂拱
山高獅子一峰來
欲憑鴻雁愁難寄
偏憶尊壚客正哀
潦倒天涯還作賦
登臨誰是子安才

前題

顧岱

武陽城外舊山阿
逸客登臨感慨多
曲磴路通前代寺
幽

花香散古藤蘿隨風鐘磬流清漢
遶殿松杉漾綠波
不是
孟陽饒逸興
幻身應屬老維摩

又

遍石尋幽山路遙
崔嵬天外插孤標
樹封羅婺三台雪
氣壯金沙萬里潮
到處雲根臨斷岸
自欣松梵和清濤
徘徊
四望空塵世
何日春暉破寂寥

又

曉上晴巒作勝遊
更深猶未下山頭
小橋客渡春雲晚
絕
壑僧歸別院幽
好月自來頻勸酒
悲歌隨地起新秋
回看

危閣層宵上寂照燈光處七流

又

漢林細路絕烟塵倩步行來景物新寺外竹樓分翠影苑
邊香水出清蘋孤城落日悲戎馬野店風高泣鬼神吏隱
十年無托足醉呼禪侶話清真

獅山懷古

彭 蠡

積翠西來望裏尊黃冠野服叩雲門開山人去香鼎在開
昇功成信史存蒙岳千年傳帝釋孝陵杯土憶王孫登臨
不盡興亡感痛哭秋風何處村

又

絕巘盤空聳地形長風入谷聞雷霆高懸樓閣斷新路險
折天門立石扁烏鳥每啼山雨黑袈裟常帶日痕青如今
休問江東事幽咽秦淮不可聽

又

鼉錯初非誅國才延陵遠跡實堪哀龍潛大壑光難掩日
落寒村燄不開濕洞每聞山鬼嘯空龕時有古猿來還宮
後竟無消息白髮枯禪復自灰

又

守文令主過優榮况復偏安築石頭神武始堪承父志賄
謀原許入僧遊鵲啼壁斷孤雲墮月照空祠獨對愁徒使
忠臣灰十族荒庭木末對高秋

登獅山和韻

彭 蠡

春晴載酒過岩阿鳥道紆紉亂石多十室散依新壁壘諸
峯高掛古烟蘿山連越傳雲常黑水下金沙海不波老檜
那知僧入定虬龍風起怒相摩

又

郭外青山十里遙峻嶒天際插孤標千岩樹色晴看雨萬

空松聲夜聽潮早燕忽來飛鼠岸春鶯啼亂掌鳩潯幾年
勾漏思投効頼有真僧伴寂寥

又

月太花酣逐夜遊風高野燒遍山頭盤陀石上梅花落古
木林中清磬幽何處懸燈千嶂夕更聽猿呌數峯秋同人
感慨天涯外作賦誰當第一流

又

十年素韃走風塵此夕禪關月色新古樹寒鴉催晚照高
僧小饌入春蘋漁燈沙上搖空翠暮草芊芊暗野燐夜靜

主人情不竭，樂暢和見天真。

獅山懷古

林杭學

翠嶂何如黃屋尊，誰教逐跡此山門。
西來尚有祇園在，北望都無原廟存。
蜀道哀禽愁帝子，楚詞芳草怨王孫。
到今野老吞聲處，黍黍蕭條郭外村。

又

此地曾蟠龍虎形，山靈常遣護風霆。
育神劍珮歸天迥，雙闕樓臺倚石扃。
王氣已消凝碧紫，梵聲環繞點蒼青。
休翻近日江南曲，玉樹新秋不忍聽。

謁讓帝像

王清賢

歷數更轉亦風因潛踪荒域如全身兵來靖難名非正主
建家塵難竟真四海含情空肺腑中原有恨共沾巾傷殘
骨肉今安在梵宇鬚眉看尙新

弔建文從亡諸先生

王清賢

爲國亡家君子名余今瞻拜衆先生鬚眉想見憑青史姓
字傳聞類野氓去就分明羞管仲是非不避哭彌衡當年
附會榮身者應悔遲疑出帝京

諸天樓閣

王清賢

獅峯好景賦繁吾樓閣分明出畫圖遠害潛龍棲野壑
心古佛戴毘盧鳥窺淨域聲多逸花愛遊人興不孤數載
相依看未厭閒來步上蓬壺

萬壑烟霞

王清賢

武陽古寺最高峯觸目雲山幾萬重脉絡斷連搔白練陰
晴錯落影蒼松翻疑太極形初現轉惜中天氣早通恍忽
置身于海上居然江漢尽朝宗

振衣處

王清賢

臨風有興更誰催倣吏閒情到玉臺空盡孤峯天外見參

差滿登望中來彌高瞻失隨時眼峻極題須不世才何幸
浮生茲一嘯千秋遊客幾徘徊

月飾古樹

王清賢

古樹凌空看異鄉風雨七日相忘舊枝閃灼全無定新
影分明別有香隱顯傳情偏絕俗去來隨意不尋常冰輪
幻出乾坤秘幾度盈虧笑客忙

中秋前四日集飲東園

王清賢

無端客命掌詩壇秋旬過集飲歡有月將來應盡望高
賢今已愛斜看彩毫弄影燈光艷酒數籌添漏滴寒試問

他鄉會幾鮮花枝閃鑠動闌干

其二

嫌余不掬附雞壇
寶鏡恩圓滿
悲歡盡堪還須至夜後幽
情已耐此時寒
沾來酒熱因誰醉
種得花香爲密看名利
何人寒得盡盤虧幾度寫闌干

萬壑烟霞

蔡龍蟻

四圍山色影千峯
又見谿迴幾萬重
未雨輕雲新白露和
風殘照映青松
高岡古有鳴條鳳
幽谷曾傳識卧龍
誰說武城無勝跡
獅巖維石可爲宗

東園

尚崇禎

芳園幽敞傍城開
天馬高騰太望來
曲徑曉風吹古石
閒亭明月照蒼苔
怡人情景爭歡句
過客光陰笑舉杯
拙吏頻當青眼盼
未言分手幾徘徊

詠 躍龍夜月

趙世錫

躍龍亭上月泥消
柳幹花絲遍地陰
蒼苔峭露涼山欲
睡沙汀烟靜水常吟
綬綬華巷千聲杵
照徹孤臣萬里心
斗酒重斟天未白
徘徊簷下聽雞鳴

詠 惠橋烟雨

趙世錫

禪門一澗枕長虹隱約仙源路已通
組綬溪光迷遠近
淋漓樹色錯西東
樵歌香入苔蘚
逕漁艇斜橫
葦花叢幾度
憑臨思作賦祇慙得句未曾工

東園

趙世錫

別業風光出畫圖
迴廊曲逕翠茵鋪
庭閒几淨宜詩客
鳥語花香醉酒徒
鳩水遙來雲數點
獅峯高向樹千株
當前好景晉人賦
竹石參差有意無

東園

劉熙貞

滿窓山色滿城烟
新築名園別一天
竹樹拂雲踈檻外
亭

臺移月片池邊鳥鳴花氣賡朱履風送琴聲唱綠田記得
春來頻問字柳陰深處喜鶯遷

東園

許 鏐

明公嘉德沛南中又見名園啟署東庭植綠槐看繼武壁
盈白雪和難工偏宜有酒能留客豈碍無才負落紅信說
幽閒堪退食居於花裏晤仙風

東園

夏之時

文園紆折傍城東樓閣參差圖畫中檻遙松篁清有韻窓
聯水月靜宜風已人里句難爲獻太守高風迥不同何幸

頻來聞塵訓。詩且許賦霞紅。

東園

杜文龍

園扉半掩見山堂。不厭書生醉酒狂。
檻外水光憑月洗。壁間墨跡帶花香。
開窓眼向獅峯潤。得句毫因鳳竹颺。
最是

獅山懷古

趙衍

探奇正好屬新秋。石磴烟蘿繞樹頭。
碑向萬年松下立。水從九曲澗中流。
神都廟貌今何在。漢代興圖久未收。
欲問文皇稱靖難。當年何事不其休。

棋臺山

苟尚禮

群峯羅列擁仙臺
曙色飄飄四顧開
雲霧欲浮青嶂去
風聲常送洞簫來
空中樓閣烟嵐靄
石上松蘭雨露培
到此
記志塵世幻溪山
薄暮共徘徊

獅山懷古

張全斌

槐雲聽月拂霜袍
翠冷寒侵爇借醪
簾栢結帷分鳥夢
萬松寒嶺點獅毛
南來蓬閣君聞梵
西去遊禪臣哭騷
此日
文皇無尺土何如帝像與山高

元鎮山春望

釋耕岸

曉來春霽到花宮
曲檻凭高納午風
仙籟有時來竹裏
山青入望列溪東
雨餘芳草初承綠
日煖新鶯盡啄紅
更上層樓最高處
恍疑雲路與天通

再宿獅山和韵

何星文

細路逶迤戀舊遊
古松盤蓋倚峰頭
結跏小憩心偏遠
散步常令意自幽
世外相知宜草木
山中不記有春秋
前賢早識曹溪味
特浚源泉據上流

又

逃禪幾個入山溪
坐冷春宵百感新
盈砌月光澄似水
橫

階樹影潔如蘋聽來淨土聲
七
梵超却荒原處
七
燐勞攘
從前何所事偷閒方得見吾真

香泉被襖

楊搗秀

山城氣轉暮春天覓水尋香自古傳
馥滿池薰鬱抱清涼
一勺滌塵愆載歌載酌花村酒
時往時來石澗烟陌上
遊人咸噴
七
相逢重話永和年

香泉被襖

何誥

一鏡池開浴太空浴
七
清淺藹花風引來脂水馨
秦苑分得蘭膏噴
楚宮濯玉煙鬟吹細露浣衣雪
寶罩薰籠春暎

土女唐堦處羅敷泉邊拂弱藻

香泉被袂

無名氏

武地春光別樣傳一泓郭外綠蒲煙風搖草色波生綠雨
發蘭芽氣爽聯清露分明香在我詩成贏得留留歸停石
借問臨流者若個分開水底天

五言排律

獅山

失名

獅峯誰闢鑿捐業回雲穿踳踳凌空吼嶢峴奔伏旋樹密
晴生雨巖淡石鎖天當年潛帝釋今日識僧顏虎嘯風聲

谷龍藏壑吐烟來
連北地青荒若忘還
覽勝何能已
編教
敬仙

清明遊香海菴

江甫
朱彥培

無待遷斯適溪山曲折登木聲隨馬足人影集漁簣新火
村中霽精烟望裡凝雲淡松亦冷嘯遠谷如應遂叩維摩
室因知香海稱春光藏別院花氣引修藤半榻能相許千
峯夢亦憑不須求姓氏自笑未爲僧

同顧興山徐小儒遊香海菴

朱彥培

五馬娛芳節春山精舍煖花龕僧出定竹徑客招尋古桂

交雲幹群峯當戶森炎蒸卽靜域疎放漱煩襟太守揮毫
捷參軍岸憤吟衆傾聽麗曲獨賞悟清音茗果新陳設壺
觴次第斟好奇談俗怪人僻共書淫香幄重移席涼露裏
就陰及時爲樂者何必問升沉

七言

金沙江

王清賢

乾坤無外脉斯長凝結精神注遠方氣吐雲霞真造化波
翻日月大文章漫疑錦羽翔生艷自是金沙動有光春曉
烟含千里客秋澗露冷九迴腸旋聞玉樹搖空翠又見黃

河下彼蒼礪石清奇憑取玩螭名擾攘顧相忘浮漚有致
隨流起傲吏閒情作賦狂四海傾心歸有道太平
天子坐番裳

五言絕句

陳賡

同上鳳凰臺恭酌千秋酒鳳亦竟不來名亦竟不朽

七言絕句

讀顧與山十一先生記

四首

釋普荷

姓字何人記得真甚憐多半委荆榛不逢烈士撐天平誰

同當年表難臣

三百年來一瞬空河山遮莫盡隨風僅存禋祀維新處紀
徧殘碑有赤忠

揖讓曾稱元首良碑鐫一字泪千行忠魂長在祚何在
代雖亡臣不亡

玉厄那知更有臣歸狀廟貌一時新得公撥燼能披剔不
朽爭傳十二人

獅子山頭

王清賢

獅子山頭雲住晉牽懷倏爾越梁州鳳皇城遠七千里伏

枕一回夢一遊

獅峯絕頂

何星文

一個閒人上翠微不堪持贈看雲飛
荒林碑斷聊摩薜絕頂峯高好振衣

又

樓閣空中怪石多玲瓏欲墮掛藤蘿
身無抱笏猶思拜骨有烟霞始得過

獅山

黃天麟

山疑獅未孰曾稱瑁見還岑第幾層
莫道此間非佛國大

明皇帝也爲僧

惠橋烟雨

尚崇禎

一水橫鋪百尺橋爲誰思惠起殘凋望中城郭籠烟樹雨
霽猶聞隔岸簫

翠屏排闥

尚崇禎

萬疊寒山列翠屏祿陽烟樹望中青何人作宦稱仙吏松
韻閒飄月一庭

石牛卧水

尚崇禎

鷓鴣河上放舟遊傳說河心卧石牛鳳氏當年驅牧否痕

花萍草共悠悠

任雄活佛

尚崇禎

黑水河分西土頭何年杯渡到元謀拈花今日誰微笑朽
骨龕前拜未休

金沙江

陳淳

矗立高峯夾碧波金沙環帶舊山河當年守險勞爭戰聖
代平蠻已戢戈

補知

陳淳

停驂開路補知管地接東川古戍城隍土於今烽火息徒

留荒壘落寒甍

他頗

陳淳

峯堯一徑入他頗兩岸黃茅瘴癘多南詔不知漢廣大封
山猶自誇烏峨

杉松營

陳淳

杉松北繞鴈鵲河古部羅婆鳳氏窩莫論先朝戎馬事時
平久已付樵歌

獅山懷古

四首

馬敬

金陵王氣萬年基靖難兵爭忽黍離成敗到今空勞夢石

頭城畔草萼上

其二

一領袈裟出紫微
天涯鳥道落斜暉
總無張儉投身地
願得名山慧遠歸

其三

丹灶雲中不記年
霜侵兩鬢轉淒然
誰知天命歸英主
一針蠻烟瘴雨巔

其四

御極曾傾四海心
漁樵猶自哭恩深
到來丹嶂遺踪在
常

使遊人換滿襟

春日登獅山

高朗

路遍山頭樹影叢
巍巍古寺泛雲中
登臨爲把春光惜
馬上詩猷月半空

登獅山

四首

劉熙貞

半空高聳一峯奇
步到雲岩盡息機
山裡乾坤真太古
階勞塵世卻因誰

石壁幽通別院開
牽衣古樹老莓苔
幾人名利能閒看
野鳥空山自去來

翠微掩映杜鵑紅飛閣參差霄漢中坐久不知身是幻
巖謖七起松風

尋幽携屐一登來每憶山中宰相才半日浮生無箇事
白雲引我醉霞杯

鰲石

劉應貞

欲向長江破浪游暫標天半老春秋朝暝掩映寒松色
萬里風雲一望收

香海菴

本府經歷 范景陶

不二門開優鉢馨山圍烟樹入丹青我來慧遠蓮爲社斗

照遲上過艸亭

擁翠山

杜文龍

地僻塵消此獨傳
我來花放正春天
啣盃覓句歸忘曉
擁峯頭氣欲仙

補遺

禮斗臺千古

五言律

何星文

不煩人力砌絕巘石層七觀象天難問藏身地足憑北辰
新聖主南極老神僧瞻仰悲前代臺高幾個登

香海菴

潘德徵

不競巖壇處客來一會心人誰耽白石僧或賤黃金秋老
雲常幻機閒山益淡松濤天願夜謖七勝鳴琴

前題

劉崑

一麾來出守八載護禪心鼻飲羣嚴水經浮貝葉金馬鳴

武定府志

卷四上

藝文

詩五言

三

遶樹冷風捲塞雲
寒何日軍書靜
焚香理素琴

前題

高翥

城市揮殘暑
烟霞故故心
來知香噴瑤
歸看月浮金
海遠雲連岫
山橫樹欲深
無端思剖牖
恰苦未携琴

遊香海菴

湯立賢

物外尋幽事
遊來古剎巔
聞香不是色
觀海却通禪
佳序涼僧枕
松濤冷暮烟
陶然其可樂
放眼過前川

獅子山

楊搗秀

兀突凌天半
青山得異名
猱峯作勢
哮吼壑無聲
古院

苦蘢合溪松秋象橫西來第一勝疑在武陽城

龍洞 限韻

楊撫秀

怪穴陰成湖苔蘚點篆圖洞中留日月石上老蒼蒲樹客
春樓鳥山高夜聽鳥蟄龍今在否疑有舊時珠

登獅山

杜文龍

山峻雲常冷翻飛鳥倦旋觀碑標在跡執酒對流泉縹緲
嵐峯遠參差翠閣偏上方容信宿分榻暫安禪

和建文帝韻 七言律

蔡龍驤

長在溪官不識秋蕭蕭變出曲江頭全身苦節僧爲隱遯

世高風水自流雨後雲巢聲漸遠山間月色影誰收夷齊
讓國賢今古多少詩人咏不休

又

獅山春夏盡皆秋不見風霜自滿頭生氣已歸烟霧散雄
心自付雨雲收花開艷色枝偏折人遇傷心水漫流自古
紛爭皆幻影惟君有此與天休

獅山花石

蔡龍驤

獅山迢遞嵌中峯壑底層層乳石鍾金玉成胚形五色瓊
瑤結塊影千松探竒應遇連城璧玩器常驚落彩虹天產

精華名勝跡不須巧作與人同

獅山晨鐘

蔡龍驤

初疑獅吼在山峴清奏雲巢盈耳宜風送蒲牢催曉箭
鳴榔木宿架金枝聲聞幾率如天近色影霜華似粉施
多少癡情驚夢斷老僧未起日高時

獅山古木

蔡龍驤

佛種祇園樹有年森上枝幹直參天山圍帝座松風吼雲
靜禪心鐘韻咽曇照微茫雙木影香焚縹緲滿林烟千峯
齊向如來面不染紅塵日月懸

獅山雪

蔡龍驤

獅峯不與衆山同朝夕烟霞萬壑中
恭出琪花新漫影四圍瑞色盡飄空
瓊飛此處堆還積梅向先春枝又豐
總是層巒形獨勝故多浮白綴天工

登獅山

本府教授 潘祚遠

羣岫環廻擁瑤宮登臨此地覺塵空
雲封石壁禪心靜苔滿殘碑詩句濛
入座濤聲聽不盡開窓霽色畫難工
年幽漫覓傳盃處鳥語悠七度午風

住獅山

釋如法

巖磴引得興悠然悅耳音聲石上泉一水雷奔天際落千
峯翠簇霧中懸階前露宿遙芳草窓外首痕疊錦錢一自
逢山埋影後日常無事坐山邊

春日游香海菴卽景

王清賢

遨遊肯遽幾人同佛國花香散白紅放眼千山觀造化
宜詩思入春風

又

濃淡枝上看不同禪空夢徹自因紅松標堅老青
性靈

似花殘不耐風

前題

謝秉立

春色應憐情意同
桃源花放映山紅
追隨醉卧香菴榻
歸泛扁舟趁好風

前題

吳時化

尋芳聯轡喜相同
幾樹花開入眼紅
但得明朝重載酒
飛觴盡日醉春風

又

年來酒政與人同
醉眼看花別樣紅
盡道江山已改色
春

風却是舊春風

前題

程仲愚

春分登高景不同梨花雪白海棠紅
左家稚子今何在樂事猶傳香海風

又

松青竹老看相同肯邀春花別樣紅
且莫題詩就遠眺斜陽可許醉香風

前題

花梵荒原景不同遊人盡插滿頭紅
莫因桃李多顏色尚

有松青猶彌風

前題

湯立賢

而今樂事許誰同
看遍桃花不在紅
放眼前川山色好
金樽潦倒笑春風

前題

楊撫秀

此日登臨迥不同
馬蹄踏遍百花紅
收將春色歸囊內
吟入松林聽好風

御山雪夜

無名氏

春催游屐上瑤臺
萬朵瓊花頃刻開
莫是仙郎歌白雪
時時

將王肩送詩來

又

携得同人轡共連夜將春色醉獅巔梅花更識游人興飛
送瓊瑤作酒錢

又

華芳醉卧老僧家雪片打門夜未賒樹上開成春一色人
上枕止夢梅花

春日香海棠卽景

和韻

無名氏

祇園共醉賦誰同滿目芳菲白間紅更向艷中尋出忽一

枝獨自占東風

題獅山

釋淨岸

武城高絕處
翠嶺是獅山
樹掛巉巖上
泉飛白石間
天橋橫野壑
松逕遶禪關
太守題詩處
遊人幾度攀

又

飛閣層巖上
高僧是處居
嘯雲猿覓侶
振羽鳥凌虛
石有顏朝字
名留帝子書
幾人登絕頂
臨眺意何如

重登獅山

釋淨岸

不盡登臨意
重來到上方
雲迎前度客
詩戀舊時廊
削壁

樓仍在閒庭花又芳
岩猿與飛鳥仔細認衣裳

獅山謁建文帝像

釋光勳

大業俱拋盡空舊廟貌存松猶呼萬歲洞已作長門降志
飛龍踐進名微利尊西南無頗敢幽恨向誰論

登獅子山

釋淨岸

獅山攀我十年裏今日初登不記重寺接太蒼雲作蓋谷
多靈氣樹成龍因探勝蹟懷先哲漫寫閒情對遠峯最喜
主人饒益興携予細數嶺頭松

又

回視孤城祗彈丸
村上烟樹繡奇觀
龍歸時落岸頭雲
定常封石外巒
高閣人吟幽鳥和
西林山歎夕陽寒
遊來佳致隨芳址
幾度臨風倚曲欄

官署近作四律

佟世祐

分符萬里武陽來
事簡刑清尚乏才
治政有方民受益
處心無愧吏難乖
惟期豐歲沾天監
不望輿情答上裁
兩月下車愁撫綏
病癢懷抱豈能開

其二

專城爲政事方新
地瘠全憑惠澤民
已識窮簷多積苦
可

知令署更清貧忠能克志丹心吏孝阻承歡白髮親但得
漢綈登衽席勝如有脚遍陽春

其三

荒城寂上萬山中十戶茅簷九戶空目覩農糧多借食身
經官俸早捐公苞苴杜絕知無欲利弊興除重采風形影
但能人取信乃心始可對蒼穹

其四

天語煌上未敢忘

特頒到諭

晨昏兢惕肅官常清勤仰答

殊恩厚察案瞻依化日長不在衣冠尊面目直知冰雪作肝

腸如今認定持清白琴鶴將來是宦囊

感懷四律

寂亡荒城山氣寒愁看蔀屋落風殘官能爲善人多庇年
喜成收民賴食事簡不知才幹短心清自覺夢魂安我來
守土慙無術饑溺空懷撫字難

其二

朝惟琴鶴自相俱署冷風清癖所娛帥屬每聞多怨嫌得
人幾見重諮諏能將姓字留思慕不爲兒孫慮有無難及
劉寬仁且恕武陽非可示鞭蒲

其三

官廨公餘韵偶拈漢書晉字揮牙籤冰心不煖驅爐獸鉄
案無塵爭硯蟾夜炷一香懷趙忤朝食五斗愧陶潛窮巷
刺已閑休戚菜色能無慰閭閻

其四

新構東軒號滌襟清風明月兩相侵讀書有味忘長晝臨
鏡無私照素心試看荒城惟綠樹即知暮夜絕黃金但能
形影誠天地敢話吾民受益深

春日省耕四律

處七新秧綠滿田公餘正是省耕天德輕休望隨車雨俸
薄寧辭飲馬錢老少力勤過素日高低水足卜豐年自知
表帥毫無補怕聽民稱太守賢

其二

一年生計在農桑小滿初交佈種忙得免長孺分積粟羞
言召伯憇甘棠窮荒多有無耕讀凍餒皆因少蓋藏但肯
而成完國課柴門鼓腹傲羲皇

其三

火耨力耕固是難不從辛苦即饑寒田邊放水衣常濕日

下分糠粃未乾稚子枕簑和犬卧村姑送饁與我食雨暘
俱說今年好深慰吾民大有歡

謝其四

新歲西疇獨勸勤不携花酒作虛文雖慙河潤無千里惟
耕年豐足十分牛背牧童歌夕照馬頭野老獻香芹農家
今後休辭苦八品

策齋

王君

雨後登省耕樓望田

農事關心獨倚樓
郊原縱目望中收
高低積雨光盈畝
稀密新秧綠滿疇
獅嶺雲飛開翠壁
鳩河水漲响清流
喜逢東作霑天力
預卜豐登歲有秋

其二

惟見男耕與婦耘
清晨佈種到斜曛
榴開幾樹紅如火
秧洗千田綠似雲
酒送溪邊人語雜
鼓催堤上犬聲聞
從來稼穡非容易
須恤農夫筋力勤

勉東西義學生童

科目獅城久寡聞
我來守此育才殷
曦娥豈肯隨人懶
經

史焉辭立志勤天上無稱用白屋書中有路步青雲相期
發奮惟朝夕冀負

虞廷正右文

其二

巨手應將頽壁扶莫嗟吾道久蒸蕪功名竹帛非難事賢
聖規模是丈夫晝永簾前鳳藻水陰濃校上鵲呼雛眼邊
種已皆新意多士於今識得無

其三

好向龍門早着鞭絲山一隔又三年和光莫負慈親苦劬

纖休幸以婦賢蓋榜華名難國士玉堂分席半寒毡光陰
迅速如駒隙應識栽培望眼穿

其四

細響從來匪大譟驚人句必未聞七文章雅欲欺星斗胸
次須能掃俗氣百鍊何愁金作粹十寒空與筆千雲爲構
膏火難供給清俸無多且自分

重九登獅山

萬仞登臨獨振衣天空縱目亂峰圍暖知日向身邊近濕
覺雲從足下飛讓帝豈因其國難假僧非好悟禪機獅山

未落龍山帽不佩黃裳事可違

懷明建文君

托僧萬里隱獅山一片勞愁雪水開至貴三年輕祖廟餘
生甘載寄禪關雖無飛鳳來君體真無舞帝顏對此
衣冠思袞冕入叅却易舊朝班

高橋境水道落成喜而賦之

穿箐盤山破障輝探源問俗至溪邊舒迴象地踞農業勸
獎鳩工樂傳鑲澗浚活流通十五引水至田約十五大里田霑積潤
灌三千山人云此水能灌三四千畝爲因水利關民食似以吾儕欲

濟川

持敬軒即事得天勝寺

朝來薄散似臨淵

皇恩祿三千志在先憂惟後樂事行白日與青天書逢年歲

應堪恨泉到名貪亦可憐守此半年無起色斯民何德頌

官賢

苦雨

山色模糊失四圍荒城朝夕苦霏霏籬穿新綠抽青笋砌
落殘紅濕紫薇連雨已斂民業少久陰恐損稻花稀惟祈

風伯施神力捲盡浮雲露日暉

祈晴

久雨民間食用難那堪南畝稻穀寒結苞禾莖何曾暖帶
水簑衣總未乾望歲農祈土主廟禱晴官拜

正
皇壇商羊石燕旋翬伏飛出金烏一大觀

喜晴

蒼兮軫恤下黎民新霽陽和日一輪康七翻花蒸結穗山
由松木伐樵薪工商活計勸人事舜漢生涯貨市塵俗吏
喜逢年歲稔多收俸米不愁貧

擬鍾君即事

農事將已天甚多耘田放禾雨申過
旋獲負物歸鄉女望
歲祈晴穡重獲黍稷柴門呼犬吠
牧童橫犢牛歌窮
荒社無幽境不是當年舊芋蘿

雨後不寐見絲磔水閣微露月影賦此遣懷

世事關心夜不眠蚊雷相集耳根邊
難憑通漏三更夢獨
對燈光三綫煙玉塵揮殘庭外月冰襟冷透水中天
砌中
也解人情寂漸已聲吟牕落前

即事

松鼠時看穿屋角絲蛛每見挂簷牙砌前黑摘鮮山茵泉
上黃添熟飯瓜地僻羹窮形醺罷官貧馬瘦骨丫叉公餘
惟醉詩中酒雨後頻移竹裏花

咏綠鸚鵡

悞從吉了入番方語罵身遭死異鄉安問上皇懷主切賦
呈黃祖助才長紅開兩瓣珊瑚口綠着千層翡翠裳曾感
貴妃珍重爾琵琶每調憶昭陽

述懷

嘴菜根中味有餘公門誰敢犯苞苴涓埃尚未酬

明玉清自多時鑒太虛萬事一官懶五馬三年六詔托双魚
漫云囊裏何蕭瑟所有相親幾冊書

述懸四律

庸愚絕繫愧前人豈望規畫竹馬迎守土深慙無實政飲
冰何敢慕虛名自知陋質當時素莫怪交情此日輕兒際
聖明圖治切難將一得益民生

其半

英槐萬里隔長安尸位山城愧素餐

天高同地厚惟持夕惕與朝乾人才難合三年例衾影休憐

四品官身繫邊隅知俸淺 椿萱何日再承歡

其二

骨鯁原難合世情不思商目品全輕庸人豈有舒奇績
吏焉能沒臭聲孝切晨昏天與地情牽南北弟和兄年餘
笑我親民牧每愧無才守此城

其四

雖荒三徑草休鋤留得青
七伴菊孤書若頻開非集
蠹琴因懶撥易藏蛛印床
顏淡新紅少茶灶烟微宿
火無寄語秋風別太趣可
知松栢色難殊

秋日和松雨樓壁間原韵

雨歇芙蓉色更餘新燕舒綠上甯廬樓高有客詩情密地
簡爲官政事疎露宿家山居樹方刀耕處七種山墟連年
所喜與豐歲間里光陰勝是初

閱田四律

攬轡非因汗漫遊爲觀年景豁双眸窮簷破宿嗟風雨荒
地難耕牧馬牛山畔苦蒿將結穀田間晚稻盡低頭沿村
勤問西成數耆老俱云歲有秋

其二

紆迴一逕繞獅山木葉紛已落
照間樵子負薪臨澗飲
民逐隊趕墟還漸看節屋無飢色
已有楓林帶醉顏
况復武陽嶺散甚自宜休戚更相關

其三

崎嶇步已近山林藉艸何妨坐
林陰勤力自供終歲食
農莫負

聖人心得完租賦
寧愁吏學種桑麻
免捉祿趨此晴和宜早
獲
莫教風雨又相侵

其四

懸上邇行廿里多微香遠送卸殘荷但求積粟三冬足不
願沾名五袴歌肅慎向風先貢矢巍然勒石已銷戈漫言
作吏如傳舍恐負

君恩奈若何

秋夜讀書

短檠相生讀書檠最是閑情在九秋極寂風來燈影動簾
溝雨注水聲流竊經玉案倦忘時聽易紅疎積甕頭千百
英雄與廢遠獨餘事業汗青收

秋夜

滿簾蕭索暑漏聲下女牆風裁蕉葉碎露綻桂花香鶴舞
月光冷虫吟秋夜涼一燈人語後蕭蕭夢魂長

苦雨

浙漚竟無止餉事素若何秋成還未獲夜雨不宜多山色
四圍霽陰雲滿目難深慚少吏治難以慰天和

武陽積事

武定渙中最苦勸民賣地瘠何堪聞三間舊屋五家居癯
食朝糠惟一類機杵桑麻總不知刀耕火種移營運城多
祠木間闕稀雖見炊煙皆防奔鼻形如鬼負毛皮髮長男

汝無從起。然則。吾等。田多。生則。平。曉。能。分。仙。遇。西。成。
少。欠。收。法。農。狗。以。生。其。命。我。來。守。此。已。將。年。自。觀。窮。荒。愁。
不。盡。有。樂。難。除。無。利。興。計。意。轉。子。爾。時。政。廢。繁。雖。然。未。敢。
持。貪。汚。志。虞。惟。天。聽。但。求。無。怨。在。輿。情。少。可。庸。也。對。萬。姓。
空。切。瘡。痍。爾。若。何。聞。余。有。術。難。民。病。

郎事

武陽雖一郡。居民無多人。欲起窮簷困。首在長官仁。固屬
荒僻地。頗覺風俗醇。饑溺常在念。務庶自相親。但能矢冰
藁。何妨對鬼神。

龍顏因在遠魚目及爲真本作風波應方能薑桂辛和花愁
積雨菜色囑窮民統廢常聞訓分符豈顧身時光嗟暗
度懷抱幾能伸無愧燈前影孌生觀腥塵有心存疾苦無
意識金銀

記

獅山建正續寺碑記

延祐七年

武定 楊興賢

南詔右釋其來尚矣然二十七部之俗嗜殺恬死雖老師宿德家至日見提耳訓誨猶執迷不悛無緣而化武定其一部也山水險峻人物殷阜無詩書禮樂以導其良心無慈悲戒定以攝其淫性是以失其秉彝并於自暴自棄良可憫也惟我聖元之奄有四海也開設學校崇高佛法自王公大人至於士庶莫不欽仰彼蠢爾獷悍之徒方靡然承風置彼邪思超我正道猶百川之歸巨海鱗介之宗龜

龍池至太辛亥蜀僧長老朝宗飛錫至止望斯山之峭接
雄秀諸山皆朝廻携大師楊普楊慶楊正李繼榮李良等
諸種越步山椒而登焉嘆曰開闢以來山川有之然發揚
其勝槩則待乎人焉是以蘭亭遺右軍而清湍修竹有宣
赤壁遇坡仙而明月清風無盡茲境也鬱湮於此久矣吾
欲不負山靈勸一梵宇以爲一方老少投誠之所二子
其與我誅茅卜築可乎僉曰諾於是剗關朽壤芟雜櫟
剗木引泉礧石構庵爲師栖錫之所方人輻湊僧徒雲集
師以金篋刮其翳膜登山眺望四顧豁然若發甕之醴醅

出隱之癡蠅又如造物者始判清濁獲觀青天白日之高
明歟未會有各輸篋資相與努力作棧道緣石磴南躋數
十步武得一地基爲文殊閣又南行百餘步得丈室地基
爲維摩閣皆與白雲爲籬籬青山爲屏障烟霞爲衛具龕
聲法樂若有異物陰來相之東望崑阿如獅子首故以扁
焉師歸西蜀之後有西竺指空禪師遊方憇此絕粒危坐
脇不沾席開闢正覺誘掖緇俗慕其化受信具者比比有
焉佛殿旃檀經始於乙卯之春僧堂香積落成於庚申之
夏風櫺月牖霧雲飛輦輪焉奐焉塑繪告成金碧交映丹

精縛煥耀人耳目盪人胸次寔今世之良規一方之壯觀
也禪師又慮常住缺乏龍象星散於是緣化本路官吏此
方他郡或貝或穀以致因地畝疆界隨其豐儉咸勒諸
碑陰用傳不朽於戲晨薰夕燭奉紺宇之覺王雲板風鐘
醒人間之昏夢靈山清會儼然若存夫如來爲一大事因
緣故出現於世爰自拈花破顏以來燈燈續焰葉葉傳方
得道者不可枚舉然西南禪學實惟濫觴今朝宗開之於
前指空成之於後吾見獅子品前山木叢林盡作獅子吼
音非我三禪伯之薰炙與非藉聖祚之無疆其孰能之惟

興泐輪而永轉祝帝道以遐昌有性無性咸遊覺場

建正續寺山門碑記

永樂二十年

失名

滇池西二百里爲武定嶺岼蒼翠若帷若屏對峙乎郡治者獅子諸峯也峯據武定之勝名公貴人大夫君子凡有事於此者必遊之以暢其情以舒其思否則悵悵爲未快

也永樂丙申秋七月殘暑稍却新涼適至郡二守卞君

諱

毅偕寮友出遊時和曲守吳侯

諱

禮與祿守王侯

諱

澄淵

拾騎林麓聯步崇崗寺僧真岩延客坐方丈焚香淪茗告曰此寺百十年來山門尚缺而從遊李賢慨然爲任經營

于是歲八月甲子落成于明年六月丙午其高二尋廣
倍之復翼以雲堂五間雲南中衛善友王孚及土通事張
應各捐已資維新是圖寺僧真若少遊吳越故其見聞獨
飮漢契宗旨故其動人而駭俗焉今中順大夫商君謂卞
吳二侯與玉侯澄淵以秩滿將去宜勒石以告來者

重修正續寺碑記

成化十三年

失名

武定爲渙之甲郡郡之西有山最高亘十里奇葩異木芬
披而秀茂者四時自爲榮瘁蜿蜒若翠屏萬仞其他層巒
疊嶂環峙于前如腋者如起者如蹲者如仆者如揚而

者如來而揖者未可以一二數之又其巖石崖揭摩而奇
峭狀如猊首山之所得名者此也先是蜀僧朝宗睇于山
而觸於心登覽而周視之卓錫於茲於是經之營之剪起
灌爲佳麗辟磽确爲坦夷首建觀音文殊諸閣未起功而
師東歸嗣厥志者復得西竺僧指空益廣其所未備增其
所未有視昔倍屐榜曰正續禪寺所以昭師徒創繼之偉
績也既而元運告徂所在悉罹于兵燹而寺歸然獨存者
八十餘年又得真岩禪師宗傳吳越以詩文著聲雲臺武
表伯齊庄之宣德丁未武表伯親詣斯寺率郡通事李賢

出資鳩工建前殿三楹及土太守阿寧望金剛作鐘樓通
其徒曰善機主司寺事罄衣鉢之資以供土亦之費兩廡
周五十楹爲三十六楹繪釋氏系於其壁又募土太守金
句是二淨僧於殿之左右惜功未就齊志而歸
竭帑藏而續成之

重修正續寺山門碑記

按蔡
晁必錄

武定之山最勝惟府前有山偃仰蹲伏若獅子其勢極高
且大盤踞而上約五里許峰巒峭拔羣山煙霞林木交加
陰連霄漢陟之者足以奮其登高望遠之志遊之者足以

壯其豪吟暢飲之懷誠郡治中之佳境也巔有寺自正續
始創于元至大間初規模狹隘自卞吳二侯修而擴之成
一叢林足以祝聖壽而存國體壯景物以具觀瞻正德
己巳余左遷同知本府事修政之餘承大叅鳳公英社余
過賞時茲寺重修工費浩繁余問倡之者誰焉執事告余
曰僧首倡缺偕在撫慶清也缺本府官族滿亦董氏子也
自切祝髮於茲聿修戒行以勸善自持焚修之暇謦風公
爲功德主公自捐白金五百鎰築石城三百餘雉周護其
山於是倡映領褒例筭故得葺而新之有樂施者來處不

拒遂使頑者以植圮者以復臨者以弘缺者以益革故鼎
新大不存乎舊日之規模也今幸隆慶會今年復以整飭
兵備來滇其功始竟因思佛氏善勸覺損支補治教又世
之常人積財利已者固衆以爲子孫計若昌映慶滿爲佛
之徒報佛之本寔僧流中盡心人也故書以貽

武定府改土設流記

鄧世彥

雲南古靡莫地自哀牢內附不帶我國衆混一區宇中國
其地赤子其人如武定設軍民府治隸土官知府流同知
佐焉因俗易政相忌於治鳳氏守官樂土與國同休可也

鳳英薛寧朝文扇亂索林竊位釀禍道祖再飯據城殺宦
奉印歷朝廷遠慮大兵剿滅法當族誅當道憫恩免梟竿
先逃省會魁棒之議改未決民奏聽撫前訴激者諄者此
者吸者小恐憐上大恐慢上其發若機括不輕因額衆悉
造于庭曰巨魁截餘黨附衆生臭若此者何居咸仰天噓
哈不言悟曰勢重莫及當先之如改設何庭叩震地曰曰
暮得此其所由以生乎亦憐上自任若有真宰而不得
其朕夜餘二十事胥此意也當道悉允行上其議于朝欽
聖劉公宗慎知府事添設推官薛希經建捕盜館于徽中

至變有日降恩堯聰襲經歷給莊田一百所莊戶以次編
入國籍不俟之趨捕于後先是呈復役占議亦周可遠不
恭明遞巡相目曰昔哲其五日抄田叙奪其妻不育其子
驅之爲盜今樂其一曰安爲是而有廖也請言其廖耕者
食者有羣行不必偶出入無禁屈者伸寡弱無凌暴父母
妻子相聚見交賀曰而今而後知流官之便于民也夫川
竭而谷虛丘夷而淵實改設行而寧繼亦勢也難乎其釐
矣此議生于人心陳以億見謀于通判_某知州_某第決
于司道_某公等主之者前院呂公光清劉公恩問今院陳

公大賓劉公應賢也四公不自有其功歸之朝廷吁亦奚
功純樸不殘孰爲犧樽白王不毀孰爲珪璋土治相安孰
爲改設今日之功鳳氏積累之罪也罪罪而功名焉二十
事其後說與以爲是而必行則俗惑于辨以爲非而必去
則政敝于矯今種種之民訓行鄉約親親長長甘食易服
樂俗安居將至老死而不惑且知法之無所用也嗚呼壁
星之煽涓涓之流毋央防而撲易因勒二十事于石時隆
慶元年十有一月也

二十事載議內

石舊縣武侯祠記

何守拙

武侯之祠盛于成都滇在漢爲西南郡屬于蜀恃其險遠
動侯五月渡瀘之征孟獲擒南中定得以北向中原此回
侯不得志于荊州思及于成都之籌策也侯往矣踰千年
余來守祿勸屬兵後檢踏經馬初山之蹄跡復因遷城移
置神宮乃有茲祠之建祠本城隍廟故址廟隨沿革遷祠就
建焉左爲武安王祠侯列在右藉神靈以肅諸彝蓋此外
爲東川烏蒙地郡之河外四馬與之連壤時有釋搔與靈
祠以鎮壓默受平定之祉此土人意也予不能違之侯世
出隆中學有本源去孔孟雖遠而向方不失去兩漢雖近

而風疎則殊澹泊寧靜學近於古開誠布公業純於道邈
哉三代之英其尚有遺軌乎顧廬許身之後數言定天下
大計第漢祚已移恢復爲難中間順時遷就相機立業非
侯志也儒者固窺其微而嘗之亦不足病侯也侯之亟取
南中固以紓內患而此舉在分荊州之後已數年矣江陵
長沙非復我有桂林零陵之以西者則可由開道使貴竹
辰沅咸遂併一以聯屬成都據上游而西腋奠楚北向中
原孫曹二虜在指揮間矣惜乎南人雖不復反而楚道未
通渭上雖定屯耕而營星乃墜姜黃疎自靖之策鍾鄧自

雲棧之險蜀不能保而侯之靈則滅矣茲祿勸固過化地也侯靈不在隨寓昭著振已彰之威軼未集之虜靖武定之區以酬生平北向之志則亦何間于世代耶侯當北伐卒於渭上塋于汙漢成都祀爲武學先師今祠成于萬曆卅年三月一日率屬奉主祭告者太守趙公

戴記之者請
汝何守攝也

浚泉亭記

永昌
馬顧澤

武定依山而城山勢峻嶒而山嶺岿若有雄踞狀故以獅名云山何以亭爲浚泉也泉孰浚之侍御荆南劉公也公奉靈書按全漢王事孔殷矣曷暇浚之應物之遇不退固

有時哉益泉源發獅山西之極巔距城幾十里而提武定
新茭逆鳳去茲未遠滇郡中頗稱荒簡觀風者往往不樂
居之不踰旬輒行奚暇于泉公曰是郡也僻可居惟公生
厭紛華樂恬淡性然也萬曆庚辰初夏徂秋駐蹕凡六閱
月視巡歷他郡縣期最久于時按滇事且浚及瓜未代百
務底成德化旁浹威信貼爇首膏澤沛全滇迤東及西兩
賜時若邊圉婆如父老嘻也相傳道路曰此千載一時也
以故多暇日得登臨是山窮其巔蒼茫流觀四境淪空僻
徊岩崖一徑潛通乃見水流曲折潺湲有聲莫得其所自

公曰美哉水乎余春遊鶴拓偕中谿李公登蕩山有泉
以泓愛其寒泉茲泉殆庶幾乎于是相與斬荆棘探幽奇
尋泉源而浚焉作亭其上曰浚泉命顧澤紀其事噫武定
有是山山有是泉自鴻濛而巳肇秘矣漢武開疆僅通名
于昆水唐宗覆師宋祖畫劍地不入于中原蒙段南詔莫
洗彝俗之汚逆鳳倡師徒飲戎馬之血雖今日改土設流
人文漸著斯泉也湮沒于蠻菁沉埋于沙礫涸濁于泥滓
誰則知之杞楠栢梓樵人且折以爲薪遇工師斲之能梁
清廟而棟明堂騏驎困于塩車遇造父御之能騁輪蹄而

神八極幸哉泉也豐公一浚疏導其源流注不竭味甚
醴氣冷如冰與斗杓而斟酌通天漢之靈澤乾坤清淑之
氣自此磅礴而廻濑下坡崦入金沙達四川經滬瀕放乎
江海勤施宗內名列圖經意樓樓道一勺之儲哉物之遇
不遇信有時也亭成於傳我德顯其左三極廣若千東飾
以廣橋遠以構坦鑿方池以蓄湧引曲水以盤旋可泚而
噫可坐而息可浴而風可觸而咏可止尼父之渴可濯孺
子之纓乃若徒倚檻曲極目烟際峭石奇峯秀樹佳卉凝
烟秀藹四時朝暮不可名狀舉一山之勝皆斯亭所有者

也昔王右軍修禊蘭亭雖事異而歐陽公亭醉翁告
之人不過寄情一時耳迄今傳為盛事稱之不衰公也登
壽山則寒泉亭于雞石登觀山則寒泉亭于武定由今觀
昔其一揆哉亭以泉之峻而名泉以亭之勝而名益不朽
詩歌其棠曰勿剪勿伐召伯所憩公之德在人心與泉同
流然則登斯亭也能不有感于斯泉

遊浚泉亭記

巡按 劉維

萬曆八年庚辰夏四月余以使事至武定越一月為首夏
之閏六日甲辰門人孫起謨袁煥石元龍自永昌來見訪

携之遊獅山是日出郭登山及寺醇酢盃酌具見晴景移
時登觀音閣忽見陰雲且作雷雨蜚虹見于閣外氣色明
朗酌以清醕彩橋高駕通于寰宇山前之奇觀也既霽更
上絕頂周覽山後有石溝如線曲曲遠引窮其際得源泉
一泓在山隅間問之山僧曰此古龍泉泉之所出一方資
之以飲元龍等曰茲山高明曠蕩而出其泉渾渾下注景
之至佳者也宜浚而表之以亭登覽斯不徒矣余雅取其
意退與太守商之武定初平鳳賊僅十餘年新造之郡糞
民瘡痍初起不任興作而一時共事諸公時方以儀物相

饋廚之可待用者乃屬和曲州守易其直爲公費就山取
材度地而亭之亭成三子既返門人葉中彥王寵譚繼統
李佳會或自臨安或自祿豐至余方落成茲亭而喜四子
不期而來若有符于初議之三子者則與之偕往時孟秋
大火西流天清氣肅瘴歛嵐收烈日曛也涼風颭也爰載
壺觴壓以文簠野敷山肴不戒而修更有山童嘹唳歌喉
于是相與撫佳景暢幽懷任真率忘形骸傲蘭亭之遺事
因典米以流林豈曰飲少而輟醉固以歡合而量開已而
酒酣興適列星在天刻漏屢下來顧恬也乃振衣命駕望

公庭而相旋明日同遊者進曰茲山茲泉其來舊矣顧混
茫之前山且未有其名也而暇及於泉迨逆亂於賊鳳泉
且不遑於飲也而暇及其源且浚之乎自公駐此日久民
物熙恬意况閒而山靈發得遂登覽誠奇觀也不可以無
紀余聞斯言亦恍然悟畢然喜也命永昌劉松繪其事集
諸君詩歌成帙丐憲伯馬君具泉序之越仲冬戊子燈下
檢校書笥此帙在目展而玩之臺殿垣牖森然俱備寶塔
王立梵宇金賁古木叢林遠近叢密而虧蔽者獅山之泉
也山路三臺負岩而特立者王虛閣觀音閣並新建層樓

也有山中高而兩垂勢若屏藩前有臺臺覆以屋九曲之
水流於前者浚泉亭也亭下有池水光澄瑋群松蒼翠株
連而虺逶者龍泉之所趨也亭右有樹太令數圍石砌方
整衛而護之者古羅漢松也山漸迥合鬱化古林林中有
碑碑前有池者藏雞足紀遊詩文處也山景旣列畢次及
縉紳容喜而歡見威儀約畧有縉者瀾滄兵憲馬君顧澤
也豐頰疎眉年清中坐者屯田憲副陳君詔也面方而潤
鬚眉骨肉相勻者金滄分巡僉憲胡君信也黑肥而特立
者龍謀縣丞戴應兆也兆傍立面紅白多鬚者百戶來應

宜也豐偉壯和古雅有度者武定太守辛存仁也瘦而露
滑沽貌自得畧無塵俗者姚安太守李養也中坐而依樹
面雄而直視者楚雄推官鄒國卿也清俊而英妙坐左
者大理推官周於用也右坐而面稍修瘦者武定同知蔡
呈詩也肥而黎勁兩揚敦重其氣象者祿勸知州何守拙
也瘦而髯詩左手摩帶者和曲知州吳洸也面正而坐若
側若有所憑左手扣帶者元謀知縣胡允平也眼短視鬆
多首偏而俯者署武定庠事訓導彭魁南也戎衣山立貌
雄而俊者洱海王三聯也與馬君胡君陳君相向坐而着

絕喜衣有文繡者昆明風俗使也大理太守丁應賓永昌
太守單詩雲南推官趙楷安舉遷客南部正即方沆楚雄
縣尉馮于維先後俱與此遊羅漢松剛作有記記登之碑
碑有石亭亭傍有石廟祀龍王戲碑處亦建以亭亭下之
泉擴而大之橫以石梁超然一景而松皆不可繪者或以
旋遊旋去則不及繪或繪後撤始則不及補繪也記已取
首序讀之并飄咏詩歌宛然目前事而追憶之復如幻如
夢杳不可執者萍跡之聚散也跡有聚散而求之又復若
真不虛者則以此繪此序此詩歌此記之兼也甚矣君子

之際遇于名山勝概將觀我觀民因以商畧其政教是故
遊之多不可廢而載筆之不容已也昆明風俗使爲誰江
陵九澤主人劉維也

古羅漢松記

劉維

獅山之隅有泉源余旣浚而亭之矣泉傍有羅漢松一株
本大數圍挺分三幹南枝聳狀高起北枝靡比下披婆娑
茂密不類凡木顧中蠹而空一幹且折莊書所謂擁腫不
中繩墨卷曲不中規矩不材之木無所可用而若是其壽
者也是木也在匠氏誠所不視而恐樵人將徬徨其心焉

其不折而爲薪者幾希由是言之則雖樹之廣莫之野而
斧斤之患常在矣乃屬武定太守辛存仁貳守蔡呈奇理
刑袁端化和曲洲牧吳洗命工爲臺護之并記以壽之

礪石圖書記

劉維

黑水之支流曰金沙江產美石其名曰礪石粗曰礪細曰
砥砥柔礪剛又砥礪通礪兼粗細而石可用磨也蓋其爲
物色如新墨瑩狀堅賦以之試金能辨好惡書所謂若金
用汝作礪者也賈人販金必佩之凡貿遷之徒得之而後
免於市欺以此爲世所珍狀體重難携江路險遠聚而貨

之者絕少縉紳先生未有以之爲圖書文具之用也辛巳
春奏事者還旨都以吳門人所集印藪送覽考其文自秦
漢以下以及近代其印若玉若銀若銅若寶石瑪瑙皆有
惟獨無彌今時士大夫所用多以牙角銅銀彌尤未之見
豈以其重且遠莫可易致遂未有制而用之者歟余來滇
駐節武定最久武定之邑曰元謀去金沙江頗近屬其戶
胡允平命土人採之得一百六十餘枚大者如掌小者如
指如餅硜硜可愛命工部而鑄之古雅無尚宛狀玉質他
物所刻者不能及藩伯陶瞻字楚陽山憲長魏瀛江憲副

馮其泉胡襟襄辛謙山鄭一齋僉憲胡公泉叅戎馬石材
都閭汪金城趙心葵楊順亭時來顧出而觀之敬各獻數
枚諸公信皆刻之則文房有礪玩旨九澤爲二爲獻始也
昔齊安小兒得怪石東坡先生以餅易之盛以銅盆注以
清水寄以供佛印後再得之爲叅寥子供因作供文二篇
世傳之爲奇事余之以此獻諸公旋有類於怪石供未可
知也夫佛印方外士也坡公此供其意亦游于方之外諸
公一時名賢奉天子命計安萬里之漚而余幸聯事末以
此爲獻殆有侈于怪石之供者矣雖朕世之詔貴者曰玉

與金玉爲石之冠冕君子將以此比德貴之固宜金者生
民日用之不可無顧好之令人行妨積之令人叢怨天下
之富遠者莫金若也彼礪者固可擬玉自金以下不得與
之論貴賤乃日爲賈入市子腰懸袖帶甄別其真僞濃淡
之金礪之爲用亦云小矣豈若刻爲圖書貯之美笥燕之
朱塞加之文綵雲錦之箋方其閒而無事也與古書名畫
華香佳硯玄德君楮先生管城子輩優游共適於靜室精
舍明窓縈几之間藏識見於不試永爲清品者之爲得哉
而吾輩愛之得其意推之以砥礪名節琢磨身心如礪之

貞玄純粹可寶可愛而妨行叢怨之物不使加乎其
身其
受益於礪也又多且大而未易以言語名狀者矣

祿勸州紀工正賦記

何守拙

祿勸爲郡邇於府城郡地附雲南通中國於西漢諸葛武侯討孟獲曾入其地元至元中有屬縣二曰易竜曰石舊雖隸土府郡之長貳咸以流官受府治改流在穆宗初年厭逆之衆民被兵殘十存三四而稅額全徵通郡苦之丙子歲余自楚來守亟聞當道遂命檢踏稅糧從輕永徵者二百九十六石八斗七升四勺清出庄糧免徵五竜額者

又十石以快手契脈炒及減免虛仁義驛站銀永補者九
錢一兩四錢其停免差發板橋和曲驛站銀以藩司稅課
銀代給八年復徵者二百四十四兩五錢續奉議省驛傳
又於八年限滿外免徵二驛銀四十六兩此舊任本府令
陞驛傳憲使辛公秉其議也先是當道樅區補後有修城
遷治之議余謂須少俟乃可舉當道促之百姓騷趨謂
以無城而罹變須亟爲之余猶未厭狀也至己卯冬乃始
事越庚辰余乃遷麗江仍署郡事至辛巳夏始落成隨偏
東隅有警乃得安居城中是當道之遠猷百姓之思惠也

始撫之民卽懷遠慮且再歷寒暑興作罔怠今寃安宅民
勞其可怠乎若歷年減徵惠我元元欲宣上德欲定民宇
是又不可不併爲之記

祿勸州建城記

胡心得

侍御九澤劉公奉璽書按治匝歲月周巡六詔以輯計報
代於天子乃暫弭節武定武定荒僻且苦熱徃徃持斧者
重夫其疆公不襲故常若有所擇而留焉曷以故因邦當
新造人民尚未知冠裳之會法紀之重固將以振勵而維
新之也以故凡屬創始要務率多注意圖所不朽云武定

列在滇西北瀾暉武定二十里而遙爲祿勸州祿勸舊名
祿券甸易籠蠻居之元至元中改羅婺部爲武定路置祿
勸州隸焉領易龍石舊二縣土人所稱舊州者是也國初
裁易龍入州并裁石舊因以其地建州治顧風氣不完
形勝弗壯非所以蓄衆而威遠且也轉于土府卽長吏持
檄至多不屑往居之又奚暇于更置也自鳳逆蕩平改土
設流張官置吏會守郡辛存仁以簡命守茲土銳情經畧
與民更始彼祿勸城廓州治缺然未備其臨民之謂何遂
條其議於當道咸當當道肯度地程能屬知州何守拙仍

舊州故址因城徙建馬據崇巖面南塔溪流潏潏洞山巔合
畚居狀一形勝也經始于萬曆七年冬十月迄明年夏成
其城州治兼舉侍御公時詢察稽督之漸以速厥緒乃與
分守駱君問禮約期按祿勸時兵備副使馬君顧澤留署
司篆分巡僉事顧君蓋謙又入賀行心得以攝巡洱事獲
偕焉時閏四月十六日也風日晴和民方東作侍御公損
騶從俾勿擾于畊庶勸之父老扶杖以迎于道每每停輿
慰勞之比至祿勸則城堞周環堂除森布屏廡整修雖編
齒未阜文物未郁而藩屏樹大觀肅非復昔日蕪陋之概

矣公坐州治中進父老及諸生輩人授之訓言醇醇然論
以孝弟族議又飭厨傳勿治腴腴僅陳几筵具蔬果坐聽
而慶成焉有社師領童子十數歌鹿鳴臺萊諸什以代絃
誦蓋彰軌陳臬敦儉崇雅俾草昧之衆咸知所向尚而一
時環擁以觀聽者莫不舉首加額且慶自今伊始將永視
漢官之儀戴堯天之澤矣噫邠邑落成君宗雅會乃能舉
蒼姬太平之盛以今計之豈相越哉公益欣欣色喜遂命
得以記得聞春秋紀載慎重營遷蓋起大事動大衆非得
人心不可也祿勸以糴粳之鄉當甫定之後卽有司者繩

之以法猶慮局蹙靡寧今民顧樂趨之恐後而六月告
厥成功以牧不妨農工靡財用而縮費節力之有道也雖
然亦有說焉寓內之建州設治者何限而未必有待御親
往按之今州治甫創而待御公集冠裳頒紀訟於其間足
稱奇邁後之吏于茲土者入其堂卽廩廩如霜威之時臨
而祇修厥職用副上知又體示儉之意而無剝脂膏以自
肥釋訓言之旨而務先躬行以倡下思鹿鳴臺萊之遺旨
而禮賢造士以興起其文教則祿之民將去頽梗之習以
若守長之訓而彬彬狀順治埒中土矣藉令爲吏者鄙夷

其衆而不知所以父母之則民將望之爲厲階也雖魏襄
其棟宇藻繪其簷楹於祿勸乎何有是役也先是督撫少
司馬宜城王公凝侍御古淪帥公祥定其議今督撫御史
大夫崇陽饒公仁侃洎侍御公名其成侍御公名維江陵
人駱君問禮浙諸暨人知府辛存仁黔烏撒人知州何守
拙蜀成都人先後效謀厥伐懋焉同知蔡呈奇推官袁端
化和曲州知州吳洸元謀縣胡允平皆與有勞者法得並
書若地勢廣長若干丈城垣周圍若干里廨舍大若干楹
當列諸碑陰是爲記

祿勸州知州題名碑記

姚安
太守 李 贊

夫學者談道德語性命如指掌及出而服官蒞政則或爲
江河之浸而不能爲時雨之潤何也宜於下不宜於上也
若夫語道德性命無當也禮樂文物陳其數恭儉退讓昭
其度似矣譬則塗莢說梅然可以悅耳目而不可以克心
腹何也宜於上不宜於下也若余友何君豈其然歟何君
治祿勸四載餘矣學優政成宜於上下矣蓋余初至滇卽
聞君循良之名舊矣但未得與君會耳今者三年矣余始
得以公事相及會君於獅山之上會二十五日而別別不

數月復與君會於會省別而復會者復四十日嘻何其數也今君又擢守麗江矣上之人雅愛君因民之思猶未許君遽解祿勸之任也則君之所以宜民宜人者亦可知也按祿勸州隸武定武定之去姚也遠然分隸洱海寔共一道洱海旣分藩在姚則序時入姚稱賀禮也君苟以禮來則余之見君也又不待三年矣乃君恪守禁例不事請謁嘻又何其泥也夫祿勸裔癸難化地也有鳳氏之餘風在今入境而問其鄉老勸學而癸民可使也政固如是乎君曰此前守之澤也予何能爲予惟願題名於石以光前人

之績焉茲有石磨礱就子其肯爲我記之否且州之去府也二十餘里予又從治新城城內州解公署民居又適新之城完而財不費役久而民不煩雖不免於費且煩而上人獨浹心信焉則我太府辛公之德也歲減千金民免貽賊之苦則兩臺司道諸大人之力也余亦能爲嘻此固君之所以宜也審如是何不可行之有且余聞之從政者欲與民同其好惡必先知好惡之所在而後能得之是性命之情也然有所畏忌而不敢則不行有所奮激而必爲則不行不畏不激矣或不待上人之孚信而故嘗試之則亦

不能符故自君子之於事也始衷終皆舉之此之謂也若
君者望之而知其有道之士也卽之而信其爲忠孝廉溫
之人也坐而聽如淡山伐木空谷聞聲道德仁義之言渾
如也予於是益恨見君之晚而無疑於上人知君之淡也
君幼從學於趙大洲先生之門其源流固有自然大洲淡
於禪而君獨以儒術顯雖各有所詣以今觀君獨端重簡
殺謹愿淡沉則亦通儒矣非泥也以此涉世誰曰不宜卓
吾子曰君之請記也以紀前人也予不能知之矣予之承
君命而不敢辭也以爲後之繼君而登斯堂者也著蔡在

前宜莫如君者焉夫世固有聰明特達非常可喜之士無所襲於人者矣然忠信篤敬之可行固孔氏家法也何君能謹守之耳如保赤子父母事也雖欲求爲非常可喜之績亦不可得也此予之所以記也

福田寺碑記

朱化孚

萬曆上章因敦夏吉化孚奉上命便道子舍暫得憩田間問老農耕耨事乃郡貳陳公司李錢公紹介吾州孫守成就余問耕堂以武定福田寺新建屬化碑之以紀成績無何走幣三百里外以和曲趙寺所爲紀略申命焉余聞之

上銳理道與邑人更善治者太守事也下樂垂成與邦人
懷永圖者鄉大人事也庸何辭謹按武定在嘉靖四十五
年鳳賊叛逆此田卒汙萊時也仗上威德而輯寧者僅三
十餘年軍興之後所賴撫綏整頓甚急太守公入境恢恢
游及無卻不批如重學校建兩橋豎東樓闢田畝社學義
塚醫書律例日蒐百廢而興之凡諸善政難縷指已而卜
地迎祥橋東鳩工程材諏日興事首樓閣左禪房右茗室
前門樓廣若干尋高若干尺森七井七緣以周垣拮据悉
出太守公公私一無所預蓋自某歲迄某歲月而堂構聿

新範金鑄太主像以頌命曰福田寺登斯刹也五龍繞其
後獅子吼其前曲水如帶沃野如列攬雲霞于襟袖盪灝
氣于層霄亦一奇也余聞大業諸訟無罪福無機祥太守
公之斤斤于若寺也詎寧如世之修崇信于沙門倭榮觀
于土木也哉化方講農請就福田而以農喻夫人一心方
寸猶田也天命之性若投種欣猶夫苗也衆人之心町畦
旣形籬籬又隔榛茅塞之稂莠戕之田且蕪矣何福之與
有太守公一心直以精白爲基恢廓爲宇高明爲堂軒周
慎爲環堵慈祥豈第爲般若安阜懷保爲服祉其視吾民

何啻嘉禾諸凡立意於休養生息者皆田之既優既渥也
修明罪法度政令皆田之我疆我理也卽剪奸去暴不少
假借皆田之去螟及蓼者也凡民之鼓腹而嘻遊者皆田
之穡而有秋也卽所稱堯水湯旱不能爲災懿哉太守公
之福細道以心造矣內典曰心生則法生法界由心造是
舉道其太守公之然界由心者乎余惟優上距釋有同羊
我狀粵稽達人哲士皆尚其法如自居易畫極樂園柳柳
州造淨土院蘇東坡佩彌陀像之數公者皆以文章雄一
世而歸心乃爾昔范司馬諸公莫不叅訪其法而詣其極

當時人國賴之以安太守公之創茲福田寺也者行將上
之皇圖永固國祚彌昌下之世道益淳民生畢遂由武陽
而六合太守公之福田寧有涯涘化且俟之以拭目也是
爲記

追贈光祿寺少卿張公忠烈祠碑記

邵陽楊春震

有升沉而無明昧者日月也卽有時晦而明者自在也有
古今而無顯晦者忠烈也卽有時晦而顯者自在也光祿
聖卿張公死節甚偉其有功於世教甚大雖崇禋祀未樹
貞珉誠缺典也今上御極之四十有三年宜捐公按滇核

公祀典廟主及死事顛末鄭重特至檄下屬震紀事之役
淡幸忠烈之靈今始昭揭宇內卽固陋何敢諉焉謹摺
奏都乘及父老曾耳目者傳聞甚悉公諱澤直隸安慶人
由明經選擢異材晉雲南僉憲因武定鳳賊繼祖叛大司
馬呂公光洵受節鉞進剿公督兵由尋甸進時同事者失
期公以孤軍濊入被圍絕餉首計突圍莫出公乃衣冠北
向再拜曰賊此朝食臣之夙心計不從心惟知授命願同
雕陽作厲鬼殺賊此孤臣萬一之報乎祝畢欲自裁祖率
鐵騎馳入叩首請曰自作不靖固知死亾無自幸天賜明

公願少緩須臾倘微恩招撫以保數十世餘業公亦無不利焉公乃厲聲叱曰狗獠犯順天討不容奉命而來有死無二頭可斷也心可剖也烏知其他偵聞當事者咸欲姑許爲出公計公乃密揭司馬其畧曰澤不職不克先事伐謀臨危制勝陷圍辱命罪也何辭僅有一死以自贖耳賊惟恐職之死者乃賊之自爲計也豕性難馴狼心巨剽如爲職故招撫之燎原燭天終必不免且果招撫之而罷討是曰縱寇抑或陽許而陰討之始許而終討之是曰狡詐縱寇者不武挾詐者非誠堂上天朝安可踰此惟懸置職

膜外一意進剿永除滇南噬臍之患雖死之日猶生之年
從此無心天日不必更念孤臣當是時繼祖求撫不已公
罵愈厲乃及于難呂公進剿之計始決四道並進寇持久
糧盡計窮走匿青雞羅山我師圍之兼以陰雲霾霧賊遁
無路說者謂張公之顯靈云賊黨懼甚斬祖首乞降遂平
司馬公以公死節事聞上哀悼之贈公光祿寺少卿仍勅
守臣建廟立主合前後死事者凡七人每春秋郡守祀之
專享者惟公同知袁俸知州秦綬次之知事高心照磨張
成吏目劉瑀巡檢俞伯官又次之招安罵賊忠義生員楊

忠惠教官常存仁附焉奉行雖至今不缺丁未克舉之變
一燬再燬廟主浸失其故矣惟時視篆三守袁君及和守
葛君擇善地移廟而新之方議具寔表揚以鑒來禩時兵
憲王公奉直指公之檄適至乃知忠義在人根于秉彝遂
不謀而合乃爾嗟乎公之被圍也朝而九撫夕而脫難竟
必死以殉夫豈一死塞責者哉若曰除他寇十不如除鳳
寇一以他寇遠而易與鳳寇近而難制他寇之患在皮膚
鳳寇之患在心腹公以死除之使溪根固蒂之強寇犁庭
掃穴無噍類焉昔之佩椎髻者變而佩冠裳易握殳而薦

馨香洗穢戮而成教化華佗儗而協宮商音也蕭艾芟除
今也芝蘭愛護音也魔宮鬼窟今也舜日堯天豈非公一
死之故致之耶故爲嚴將軍頭烈則烈矣無補于蜀人爲
稽侍中血忠則忠矣無救于晉亂乃司馬之揭可以配秀
寔之劬求撫之罵可以續常山之舌精忠大節照耀古今
雖與日月相爲輝映可也寧獨曰有顯無晦云乎直指吳
公應琦休寧人副憲王公應期襄陽人郡二袁君國藩常
熟人和曲守舊君楚士江陵人少卿公雖忠得諸公之賢
而名始彰諸公雖賢以成人之美而名益顯例得並紀與

之同垂不朽云

重修武定府城樓碑記

楊春震

穆皇帝立始創土官權置流官焉土寇鄭舉陰蓄異謀求
鳳阿克號召諸彝反形具矣當事者皆心易之畧不爲戒
曰此彝虜小醜何能爲者比寇連結江外土兵大舉入寇
城中蛇豕狂徒預爲內應維時統禱之子守陴之士不過
傳自呼盧虛應故事城樓卽欲不火不可得已旣而天兵
却集群兇授首然瘡痍滿目房屋灰燼公私交困所賴大
君手救焚拯溺修廢舉墜雲霓之望蓋聖朝也幸聖天子

眷顧南服廉江公才自民部尚書卽擢于茲土公旣至開
布誠信調劑咸惠令反側子自安已又稽城伍時簡閱遣
戍卒防要隘設驛通警鈴柝外奸潛奪內犬靡聒又葺黌
宮潔祀賑糶恤孤墾荒釐賦汰冗剔蠹旌義樹勲備菟百
廢而興之一日登城四望慨然而嘆曰域民戢暴惟城爲
恃夫門者城之喉樓者門之冕也城未暇修門曷可緩乎
是庶僚群吏集諸父老議城樓事郡二熊公司理李公誅
咸協于厥迪江公乃括帑金若干緡益以俸入之餘用爲
工值費上之監司及臺使者咸報可遂毅然行之江公則

又自城之東門向明處也且通省會往來觀望所係厥地
低窪樓宜巍壯北門據府左肘地勢崇阜南門伏府右腋
勢雖平行顧火地也樓不宜高爲屋各視東門之半西門
負山枕府狀局塞經由者稀亦視兩門可也公部署已周
分官授任程能計日樽勞均力人人歡悅縮溢伸乏獎勵
黜惰勾稽有簿大持小維工傭稱事凡樓之材礪鍛磚瓦
木石槲炭膠角顏采皆公市平取是故悉官捐役靡農妨
一門旣一門繼行之有序匪棘匪紆昂之抑之各適厥中
于是撤焦易圯拓址遴材層累肯構煥然一新遠而望之

樓櫓羣赫維堞粉藻堅者屹上漢者鬱石直者律上橫者
翼上迤而祭之石眉鉄樞欽梁畫棟鸞甍鱗次墜壁紫輪
蓋一郡之大觀撫而復還皆也登而覽之御山踰踞五龍
拱揖俯而視之郡署鱗列倉庫漸積旌榮甲冑周廬是嚴
足以域民足以威暴足以壯氣勵武是役也計之則費省
要之則功倍所謂待其人而後行者也樓既成公議伐石
爲碑樹之迎曦門內以紀是詔來於是和曲劉君以熊公
之意蒞幣徵記於余余惟事無巨細戒則安不戒則危是
故書稱有備易慎履陸桑土綢繆之計厥有旨哉往者不

戒故有城門之災江公之新是稷也夫者舉則細者可推
矣直能戒者也斯久安長治之由也江公名至迥山東朝
城人用恭襄公家法卓有父風熊公名應祥江西金溪人
李公名大元貴州清平人劉君名四教臨川人元謀
戴君名應牙貴州普安人精揮賀君名瑞鳳雲南衛人署
祭事共相厥成者也例並書云

城隍廟碑記

楊春震

神人有交感之理幽明有並運之權故國家置守令必設
城隍以贊佐之若曰綱維庶務調劑蒸民者人爲政至於

雨暘時若氣運咸和災祥應機彰輝合節神亦與有力焉
藉令處之不擇其地居之不盡其制非獨神情痼怨沴厲
之作民將受之竊恐民生不安變異之生國將受之夫神
人交感之理如此奈何岐視而末節之也武定城隍廟之
設舊矣第設流之初率從簡便乃置郡城外東北里許無
論孤峯峭露神不樂棲卽以神人相與之機論之城與廟
漫不相涉神與人了不相依甚非所以妥靈庥而資并祭
也惟是選勝府城之中郡治之右垣局纏密氣象開朗龍
水環北大馬躍南五峯而立文筆凌空獅獄西撐層巒逼

漢所稱卜吉而允藏者何以加焉夫形勝匪加於昔也而
靈異至今爲盛豈非珠藏玉韞必具隻眼者而後見珍耶
於是捐金釋帑伐木鳩工爲正殿者三楹奉祀城隍右二
楹其省牲所也左右廊各四繪善惡感應之像俾觀者有
易惡從善之想焉二門內外左右相間凡四左爲土地右
爲真官大門塑二馬作騰蹶狀逼真左者曾與生萬怒蹄
顯其異云經始在四十年十二月之吉成則四十二年之
長至月本無米炊也賴在事者各捐俸有差而民之慕義
者聽故逾歲乃就焉瞻拜之餘見棟宇鬼戕我廊廡壯麗丹

青絢爛金碧輝煌民之耳目嶺新神之威靈益著自是而
風和雨順時無歲稔善惡莫逃賞罰不爽維世運自升而
無降庇疆宇有安而無危郡治固于苞桑皇圖鞏于磐石
其造斯民豈淺鮮哉創制爲邦伯王公應期楚之襄陽人
率成爲郡丞袁公國藩吳人司理文公武全粵人贊襄和
曲州守葛公楚士江陵人祿勸守郭公鏐漢川人君子曰
是役也有四善焉敬神所以愛民也愛民所以報國也報
國忠也愛民仁也敬神智也捐俸而不累于公樂輸而不
擾于衆義也一舉而四善備則家戶而戶祝者當永荷城

隍之佑而誦諸公之功于不衰矣

和曲州城隍廟碑記

楊春震

世道常存而不毀人心既毀而復存禮維之也顧禮隆而
悉辨而微毫髮疑似間卽統體得失攸係故舉世趨便獨
覺其非衆人徂常自行其是所謂析禮精也第禮重祀神
祀先辨分府與州分相臨也府與州之城隍亦分相屬也
相臨屬者自不得幾微假借此正疑似間所宜辨者武定
設流和曲因附郭而治而城隍之設惟府有之其朔望厲
祭齋宿祈禱亦從事于斯焉夫官理陽神理陰府城隍理

谷州城隍理殊不相貸也不相竇也何乃一城隍也時而
爲府又時而爲州乎于府治宜有于州治宜闕乎前人未
備後人補葺禮也相沿至今四紀而餘無論名義胥越祀
典涸渚卽和曲城隍負空名而無寔用也亦已久矣于禮
安平施州葛君來守和曲慨狀更始府牧諸公咸嘉其禮
之奢也同狀俞之遂鼎建和曲州城隍廟于府城隍廟之
左以明分不可踰典不可廢其制詳載府城隍廟記中者
茲不贅而歎使君濬得孔氏齊民以禮之至意也禮者緩
也必我先緩之而後民從而蹢之今盡禮自使君始則謹

冲之範陰消跋扈敬慎之環默杜僭踰詢之外加大賤防
貴少陵長淫被義夷亂華邪干正從此崩焉若掃則皆盡
禮之朋貽也易曰君子以辨上下定民志經曰安土治民
莫善于禮孔子曰上好禮則民易使也使君有嘉余特表
而出之以見維世運者禮不可一息弛而亦必得禮而後
治也如此

王皇閣碑記

楊春震

人心即上帝也倡之一人者非獨和之衆人者非同以之
格帝天若影響之相承以之醉意願若符契之相合此無

他心之啓其機誠之操其契也故中庸論鬼神之德而謂
誠之不可掩又論至誠如神而謂善之必先知一誠昭著
之理自不容誣耳觀此我郡丞袁公之建王皇閣也其精
心自意造福武民與自求多福稱兩得焉先是郡城原未
有上帝宮也一建獅峯絕頂一建懸岩石壁大率擇之不
得其地居之不得其制奉之不得其人故不類于異坎輒
延于丙丁寧非冥冥中有主之者然乎公之貳吾郡地方
正坦直肅抑慈和事暗室屋漏之神明飾欲聚勿施之善
政可信二人以及萬人澤一時以及千百世者祀典廢墜

悉爲修舉五載春風民悅而神輿之俱慶可知矣愛民之心猶朕未已復曰武陽屢叛而未靖也起于民不知敬祀上帝者率題曰皇圖鞏固國泰民安夫周國安民有司事也于神寔仰賴焉久安長治孰切於此惟是十古郡治之南守禦之東靠兌則王屏捧金隅郭則安雲擎日撒相峙左而龍躍鳳翔玄真祖右而龜旋虎卧且也勢悠局廓尚昂體尊真足以拱揖萬靈而至止上聖者是以得地於是捐金百二十兩有奇而一時人心踴躍齊奮施銀者則李春華胡垣周等數十人也施常住田者則趙明楊景鳳等

數十人也趨事赴工者不可勝紀誠之感人也如是夫爲
正殿者三上帝所降臨也其兩翼制稍殺左爲三官右爲
四真兩廊則五七七真也大門三楹而中間之外爲青龍
白虎內爲靈官馬帥二門則天蓬天猷聖佑母也三殿
之後有閣其上三清居之左聖公聖母又則天皇紫微其
下則斗母升車兩列太陰太陽也巍巍聳霄漢之觀華彩
呈雲霞之色椒制盡善論常住田之所入納四十石而餘
四時香火諸衆衣鉢取之此而裕焉率皆全真無染者居
之所以得體好生之心作愛民之果周匝備至從此而順

風謂民安物阜公之所爲福我武定者寧可以時期而數
計耶然艱於嗣合郡爲之叩神而祝曰農有餘粟女有餘
布伊誰致之維公之賜何以報之期顧鼎軸何以酬之達
迨突忽視聽自民天子從欲未期而公之鳳麟果協吉焉
謂民私於公乎未可期於衆也謂天私於公乎未可外於
理也謂公善於禱乎未必應之捷也今若此豈非公以誠
感民以誠禱天以誠應中庸誠神合一之理不容誣哉故
曰人心卽上帝也心啓其機而誠卽操其契也是役也先
僖太守彝擢兵憲王公應期稱首倡焉至新任太守周公

承祖先任司理文公武全和曲守葛公楚士各捐俸有差
無非體好生之心而致之民也欲識捐助之詳者請稽之
碑陰震謹拜首稽首颺言曰民安國泰是曰清寧匪天孰
宰匪人孰成天人交致治化乃神造化之根於人爲心仙
都佛域獸戶禽門光明正大景星卿雲偏頗曖昧厲氣妖
氛幾微發動輪轉攸分惟茲之建啓乃朕心心復其初仙
真自臨何以居之思慮無營何以享之夙夜惟清一真無
襍浩劫常存終如其始善果千春

仙臺山碑記

楊春震

粵惟混沌初分兩儀奠位八卦向方孰主張是孰樞紐是
蓋道也道教之興其來尙矣鄩闡僻在西南諸夷錯居自
張騫立功西域而班超繼之十有八載狀後龜茲諸國稍
知納款漢季始入版圖習王化焉緣滇與西來接壤故梵
宇緇流往往有之琳宮羽士十無一二嗟乎是何道教能
見重於中原而獨鄙薄於邊隅也祿勸州去州治十里許
有山名仙臺者龍輿虎踞疊嶂巒巒巒巒紫霞每覆其巔碧霧
常護其穴誠洞天深處蓬島奇觀也羅次道人施太元博
覽群書遍訪仙跡一旦履斯地慨狀太息曰是可以居矣

遂捐貲百鎰開荆棘攀懸岩前觀真武後殿三清門廡堂
厨規模艸創餘置常住數畝以供焚獻未幾閉園石洞者
三禩復出者五禩方與世辭尸解而去厥徒角清霄李清
露等勵行操修以繼志述事爲任於是繕材鳩工復創三
元樓斗母閣緝麻諸檀越亦施助財工始告厥成焉視昔
星然煥然者今則井然釐然矣雖莫爲之前雖美弗彰莫
爲之後雖盛弗傳施之開創角之續成可謂垂光媲美其
殆產于滇而不囿于滇乎向道之念甚殷故敦崇之心愈
篤信能步中原芳躅聞風興起者也至若續置常住諸信

善之功何可泯哉例得備勒于石因是爲記

重修龍橋碑記

楊春震

宣父提衡當世所亟稱者無幾何也惟子產曰君子曰惠人曰遺愛若津也乎有味其人者孟子則譏曰不知政夫以彼練達豈不知徒杠輿梁之廣濟平政得人爲得體至舉養尊之具與人共之不幾無等耶毋亦介在強大間兵車絡繹供應煩難詞命旁午不得已爲權宜計無非慈惠使朕未可執成說按也祿勸自兵變來流移未復瘡痍未起荒蕪未辟反側未安皇皇爰爰盤錯不啻十倍鄭也使

君郭公奉簡命以通材偉抱迎刃解之未朞月諸艱卽叙
惟是官租減催科寬獄訟清盜賊息出民塗炭登之瓊壘
民於是歌舞載道公亦獲寧一持平評題者咸懷仙吏神
君之慕云于時百廢俱興僅中道以龍橋日久汨沒往來
麻涉夏秋間泥溺可虞公捐俸鼎建經畧備至遂至子來
不日聳拔如長虹飲澗雅素若明漢橫空比肩十軌足以
齊驅聯鑣五駟可堪並駕其堅固又不異鉛錫而鉄爲之
骨者其利濟豈僅徒扛輿梁已哉不獨一州賴之全郡受
其賜不獨一時安之百年蒙其庥君子曰仁人之舉其利

溥哉窺一斑而全豹可覩已故頌之曰天有意兮地有靈
賜使君兮仁且明礪之貞兮水之清正我德兮厚我生何
以祝之壽而寧子孫億兮雲且仍噫嘻召公之仁以棠蔭
興歌君侯之德因橋成致頌藉令夫子秉銓衡子與司薦
舉其遺愛且超子產之上治行當爲天下第一行將如古
之卓異者賜爵關內寧止奉直祿勸已哉公起家廣文始
而司訓大昌旣而司成昆陽才守兼優于是擢亦佐之令
勲猷茂著于是晉祿勸之守甫及瓜而薦剡又已首列矣
乃公慕三疏之致詣告者至三至四未已民之惜也

至三至四愈切父老童稚群起屬予以紀其盛予披其簡
直叙之如此公名鉉號是吾楚之漢川太其先後分治兩
揀厥成者爲本州吏目金杓普渡巡司周仁環州驛宰兩
並實例得以紀勞並書

三守袁公德政碑記

楊春震

治之大要有二一曰識一曰斷惟識足以通事之變惟斷
足以任事之成公之蒞任也大都仁和慈惠處無不用其
有最病於民者尤思亟爲剷除而觀變宜民期於民安心
安而後止我祿勸變後流移荒蕪惟土色解一十三馬元

甚率皆有田無人有人無力每歲通負正徵銀三百七事
兩併徵則病民停徵則病國於是當事者率爲折騰補破
之誅不得不浚民以賄償而株及無辜矣升合者賄償
石婚石者必至傾家卽家無卓錫商之寄寓亦罹攀扯
貼之慘以致血流兩觀罪盈徑行民多棄其田里鄉黨而
擇瓢走耳嗟嗟膏肓之疾上下受之其果何時瘳乎我公
爲事惻然念曰孰是司民牧者忍令若此哉遂遣郡之父
老而商之有議請蠲者公曰蠲徵何可廢也有請攤平者
公曰不欲安可施也有議加派於暫復額於後者公曰倒

懸何堪久也無已可議者其在叛產乎計租歲該一千一百三十石零寔徵僅五百石足餘皆荆棘無從責賦也存之徒有其名委之竟歸於廢善樹者必獲卽莠稗可充五穀之用善貨者不窮卽斗水可助西江之波乃議五百石寔徵暫變價以克賠累其六百餘石拋荒給殘傷等馬通事領種以補不足則荒蕪以人耨而熟國稅得助而可完是舉也催科而兼理餉之法恤困而寓開荒之圖不病官亦不病農不累里甲亦不累殷實觀望者見畫一而歸畊流移者以寧靜而復業誠裒多益少之方而平定安集之

計也議上公以安危決之再議公以去就爭之乃得如議
行焉而闔郡再闢堯天矣然公編審昆明而人頌神明署
篆激江而人稱渾厚移政楚雄而政簡刑清借寇姚安景
東而行清節著過化存神所至浹洽况武定歷年多而施
澤久乎嗟乎循途守輒非有公之卓見卓識不能濟事之
窮委縮避忌非有公之敢作敢爲不能肩事之鉅民無貽
累之苦官無掣肘之虞公私兩利誠萬年無窮之功德與
宜民之感而慕慕而尸祝之且勒之石以誌不朽云爾

和曲馬大夫遺愛碑記

楊春震

公姓馮名一駿江都人起家明經初令四川安縣以清苦
著聞晉和曲守而清苦尤甚僉謂有賢父母而不爲表揚
士大夫鄉耆之過也故遺愛有碑復爲之頌以紀其寔至
入名宦而崇祀之稍俟事久論定云

古稱循吏

卓魯龔黃

一節足紀

千禩垂芳

孰若使君


衆善畢奏

清儉慈和

公明寬厚

不取贖鍰

不加火耗

無從

俸金爲報

卹惟脫粟

蔬無兼肉

官署如冰

陶然自足

夾襖慎用

監禁極希

保我赤子

無或傷之

瞻視冲爨

言辭縝密

參慕華親

飲醇曝日

不枉是非

不作好惡

蕩平上

遵我王路

目如岩電

心如寶鑑

據理原情

肺肝自見

橫逆不爭

狂愚在宥

海濶天空

納汙藏垢

市物加價

用工加食

商賈伎藝

加額叩天

嗟上使君

今之古人

清風兩袖

正氣千層

長沙屈賈

海曲梁

賢愚共歎

今古俱揚

噫嘻使君

備試諸艱

忠臣報主

不擇而安

貞婦植節

茹苦而甘

一乃心志

永矢勿諼

使君行矣

度越前賢

有石可載

無叙可稱

文忠還蜀

圖書數函

清獻還南

琴鶴一肩

聞君長餐

行李盡賣

橐倒囊乘

芳名滿載

爲此詞者

曾刺夷陵

良心耿上

不覺云云

二惠祠碑記

元謀縣知縣

齊以正

稽古循吏而民思其德何昉乎昉于漢之思何武也然未
始于漢也姬有衮衣之頌召有蔽芾之歌至今德澤在人
萬世如見直令人繹思不忘也噫士君子不貴有非常可
喜之功而貴有實心爲民之政余觀太守王公胡公二太

人家世淵源箕裘輝映美而彰盛而傳維時聲色不大愾
備無華醇上閱上雍上肅上精明皎潔喜怒不形德怨不
避蟬蛻于爵祿名譽之外寧猶是修邊飾幅也歟哉朕此
猶曰見于持身若此迨其膺

命而南蒞茲武也鴻雁興歌碩鼠志怨所藉勞來還定安
樂者若而人大人不以刑威先教化不以法令廢撫綏馭
衆從寬環武之民起而相謂曰今日喜見太平官長矣漸
及盜賊屏跡外戶不開遠過葛公亮奸宄潛形內泊不擾
憂出袁公庭他如建橋梁修道途而武之形勝興也增顯

鎮改貢制而武之士路既也議驛堡革通火而武之民寢
餘也有是哉千百年之大利以興大弊以革太人求寧觀
成之願克慰矣賦而猶曰政之見於履常也若此遼東川
變起戎馬交馳民心惶惑莫知所指大人靜以鎮之坐而
定之談笑指揮一鼓而擒董漢賢再鼓而擒楊維禔皆
遠播露布上聞杌杌之地覆盂跼蹐之民安枕慈哉武侯
妙弄韓范偉畧政之見于禦侮又若此嗣是而士誠效願
阿醋來歸阿舍悔禍阿反知非於都哉四夷來格福星臨
只靜足觀變動足濟時又安宗社保固疆圉文武吉甫公

之謂與在昔吉甫佐周而周祜篤焉肆今二大人守武而
明祚昌中興懿懋固非偶也詩曰左之左之無不宜之右
之右之君子有之又曰濟多士克廣德心洋溢乎二大
人純備焉行且銘旂常垂竹帛豈繁其棠南國已哉要之
朝廷以師相才簡二大人而授之武大人以卓異達之朝
而擢以僉憲謂天意不在武武人士無計攀留謫所謂尸
而祝之鑄石以見志乞言于余余固服輓下寮躬逢盛美
聊撮大要以附漢世思德之遺惟冀官斯土者效法二大
人之實政云

署祿勸錢公惠政碑記

傅宗龍

祿勸自逆祖受誅而後似可長保無事矣不四十年而克舉之叛繼之未幾而壬戌變復相踵焉議者率以祿勸之癸最狡而悍且與東川七州錯繡而處窟穴又有可恃故其動最易是不厭人情不甚相遠癸雖叵測哉彼亦有父母矣亦有妻子矣亦有生畜田產之可戀矣獨何心而革爲叛逆至身戮家亾而不顧而不知其有所激之也數之則自通把代徵夫通把之力不過設疏之初謂癸與官不相習擇通癸者而代其徵庶幾便於癸云耳孰知立一通

把隨加一狼虎正額未已也而火耗數倍之火耗未已也而徭派重科之而且爲下程之例而且爲拜見之規一牛一馬之苗壯者假府州之取用而吞噬之一田一地之膏腴者以些須之債利而准折之生畜園產不空不已兒女妻妾不鬻不休葬至此而精枯髓竭矣故士夫首倡而衆心響應則與死於胥馬之酷雪無寧甘心一逞耳此亂之所由釀也官茲土者類以傳舍視官贅疣視事從未灼見而大創之者此胥馬一節遂成極重難反之勢而亂之所以相徇而未有已也適錢老父母以癸亥之夏奉憲代政

勸父母賦性慈和而才更敏達甫下車而見夫十室九
怨景象益不勝目擊而神傷之也當衆矢諸神曰敢有徇
私徇於公利而興害不除者有如誓如均賦役省供億戢
強暴安善良賑窮乏興禮教種七惠政悉爲推行獨是胥
爲一事鬱鬱於朝夕不釋仍之而剝膚之漸既所不堪革
之而儆收之難又恐不足惟虛心採訪乃與其鄉耆有德
者幾人他頗等界月餘遍歷各馬一一察其疾苦焉癸卯
猶疑之旣而見視癸如子通加欽恤也欣欣然如視父焉
而就衽席素樸化者亦樂就之而吐所爲受虐之苦父母

得其狀旋州隨下示大諭各馬養目一應糧稅各令親身
議殺盡革去通把輩無得復入且有一票而沿途傳皂快
不令得以取鄉每一馬而互相保結不軌不令得以潛容
變之悅也真不啻嬰孩之得乳太旱之獲霖也及秋徵而
各馬養目疾趨輸將先者父母以花紅羊酒勵之不踰月
而三十七馬盡不督自供曾無一逋負者豈養之有所私
耶避機微而樂惟正之供情然也是冬魁者勝因保甲之
嚴而身無所匿遂受摘焉嗟嗟催科不擾而爭輸子來苞
且一清而奸宄斂跡此孰非以養治養之良法久安長治

之明機哉宜合州士民家而尸之齋而祝之而感不吝口
也且恐後之射利者出久而或更相謀爲不朽計乃遮道
鴈諸直指羅公撫臺閔公兵道莊公各加賞之准令鐫石
紀父母之惠政自是而美意良法炳如日星雖有狡猾之
徒舞文之輩不得越成規而復害吾彝矣幸哉祿勸之惠
蓋至今日而始杜其胎矣患杜而祿勸寧祿勸寧則武陽
固武陽固而金潢始安父母之惠豈曰小補云乎哉父母
善政最多耶古循良中亦不可多得第石難具載今特舉
其大者而錄之以誌不朽

普照庵碑記

傅宗龍

郡城東三十里許地名的多環村皆山川也峯翠萬重泉
流九曲誠哉武陽奇觀其西南山懸崖疊嶂峭壁嶙峋
白石鎖青霞蒼松間古柏崔巍之勢別是壺天岩懸一洞
內毓奇珍靈物隱焉洞前林壑尤美望之蔚狀而渙秀菩
提樹蔭舍利珍含慈雲瑤映慧日浮光者普照庵也作庵
者誰山之僧性用與性寬儒質三僧來自賤詔卜築此山
結茅舍而居焉惟時檀越星安董君耳目其戒行不啻心
切雅重遂爲倡首募義創建殿堂廡廡莊嚴梵玉聖像清

界維新金塗顯煥一時好施之士相與有成置有常住田
畝計其所入足供焚修迄今香火綿七不絕與在覆轡俱
荷佛光庵名普照意在斯乎然照以普言言無所不照也
佛氏一切皆空照且渾之普于何有雖然唯始于空而能
無所照能無所照而能無所不照故若是如照古今而不
足其名照幽冥而不耀其采照天堂照地獄無遠弗届光
四表格上下無處不彰照善男信女而善根愈植照惡黨
邪屬兩匪萌頓消照山妖水怪遁跡潛踪照城狐社鼠匿
影藏形南畝西疇照之而大稔山林澤藪照之而咸若至

于瑞發桂林光臨士類也恩敷仕籍輝映宦林也跨鶴楊
州耀及商賈也洵無所不照而又莫得其所爲照也則空
矣惟空故照惟一切皆空故普照因以名其庵曰普照庵
銘之若曰普照庵碑記

祿勸陳州守建學記

檢討嚴謹

滇之西南爲武定府附郭者爲和曲州距府治廿里祿勸
州爲武定鳳首地隆慶己巳年鳳首叛逆始征剿設流官
建學于府治兩州弟子員總附焉而祿勸之列青衿者僅
數人蓋祿勸漢人少彝人多民之距州治有數百里者文

簪纓樂衣冠俎豆畢世不見以故俗尚緇衣黃冠師並不
某獨楚之陳者疏茲土乃曰儒者之道西遼河源東瀋海
瀋北動幽并南曜朱垠何獨于祿勸鎮然一意以教化寧
樂爲已任藎建文廟爲他治取憲讀子弟克而肄業日以
朋中經術與爲講習始難之而卒成之公以聞於學使者
學使者以聞直指直指具請於上祿勸士民求爲文以記
之余雖新附詞林然誼屬隣治不敢辭爲之記曰縣寓外
內無不可以文教無不可以禮治也彼彝人雖雉結平望
冠裳而佩玉且畏且敬羨也雖無禮義同禽獸行見中國

父子君臣夫婦整齊約束以爲煩重難行而不以爲非其
天性存焉也古聖神代生中土樹之藝極播之風猷相濡
而化遂云齊魯之於文學其天性而荆楚吳越則筭之迄
於數千年下上三吳名傳甲於薄海南暨三楚東暨旣越
文章後又接踵流英卓犖倖伍者不可勝道豈非文教禮
治之太滂天爲滂溢大地爲輝映乎所有封豕突獍仍其
太手之習而未卽耀於光明亦可世教養之不廣也今夫
乘御靡莫叩德僑昆明冉駹白馬皆民類也天子德貴威
休爲之建學明倫亦旣蒸七蔚起秀異武定剏坂設流敷

十年耳服仲尼之教而遊膠庠者百餘人土亦有憂出者
祿勸未有官墻抑九種之不可訓誨耶抑姑置之耶陳君
蹙然負疾汲汲於學宮之建有以哉嗟乎中原多故上官
所以繩有司有司所以自厲者率曰訓練修備耳有以化
民成俗爲言者輒委之爲塵飯土羹迂濶而唾之公則以
爲訓練修備衛民也然而辦此者率浚民以遂之且急則
治標叛寇往來之區治莫先此四者緩則治本祿勸幸無
事姦人供賦稅而竄居崖谷兼有悍姦未輯相攻擊報復
不休總歸不辨姦倫不識禮義以至此如阿反那備輩令

其子習詩書假以寬政使入泮宮有司加禮彼豈有狹心
吾知其必安樂工趨揖讓磨牙走險之事不戒而戢急公
赴上之義以漸而開不必如今之能吏彌縫補塞而四事
亦以次舉呼開荒徼而闢榛蕪敎堂與以延冠倫魁能詭
貌殊音之士使習冠裳而循秩序隱上躍上興起於中國
聖人之教太聖人之教與天無極公侯之德亦與之俱矣
公諱所養楚之長沙人

文昌帝君金像碑記

郡人楊玄祐

像者似也語云波中之像可以言我亦可以言彼是以繪

月者不能繪其明鑄像者不能鑄其神况弘仁大帝歷劫
化身標靈著異卽巧鑄者安能以像之似擬其真乎然惟
像在而後赫濯之彰輝與之俱在則斯之鑄非以鑄邪廓
實以鑄心精也非以輝廟貌實以妥神庥也非以歆帝座
實以翼斯文也羅婺自文昌宮重修後文教蔚上漸興非
帝君陰牖而何顧士囿于習氣見帝于顯赫不能見帝于
隱微言錫祿則曰祈弘仁也而不知所爲錫之之階言廣
胤則曰祈弘仁也而不知所爲廣之之地帝與我漠不相
涉我與帝渙不相親則何以迓靈寵而邀顯眷乎署府王

公有德嘉意學校日舉帝訓陰功孝行等語倦上爲多士
勸勉朔望詣宮見塑像傾圯遂捐俸一十五金謀鑄金像
未幾以交代行善果竟未之就幸郡伯趙公諱紆嘉其意
力贊其美兼郡丞楊公諱于陞司理何公諱憲各義舉鳩
匠以底厥成焉夫莫爲之先則爲無因之果莫爲之後則
爲有漏之因孰若默培文治之念先後若合符節有如斯
者列公善政不勝紀述卽一鑄煉功成而金身璀璨廟貌
聿新使觀像者智燈不滅隨地竦心將七十二劫之靈化
億千萬種之仁慈恍在舉念間耳若猶執尸而祝者之爲

眞皇帝君現化弘仁之神亦豈我公祖鐸像像鐸過為崇
乎是願哉武士見像警心當下體取帝訓是遵是行則
行端而士習自轉士習轉而文運自昌庶不負啟佑多士
之雅念云

署府州篆司李彭公去思碑記

楊玄祐

公以司李借寇和曲者久矣及瓜殿最擬秦之臨洮郡丞
父老泣請諸當道疏上得晉我公舊條而賢聲益著銓部
謂公異才天授當移重地為當寧作萬里長城也弗之許
公曰吾有以謝婺民矣將戒行士民虔輟之不能卧而又

不能釋朕世祚也相與立祠以祀之矣新患未已也更謀
于通途之南去城半里許鼎建碑廳三楹爲勒石誌思于
不朽而克言于余夫余不佞何足慕知公朕嘗得之父老
之傳聞而深嘆公之有功于婺也蓋婺地多婺叛服無常
寬之不可稍以法繩之道釀太繁而治較難于他郡公下
車親宦如家保民若子見諸政者競絀合劑寬猛適宜他
人以急公故或不暇恤民隱以恤民故或悞乃公事公才
敏迎刃而更達于時宜卽一事必求下不病民而上不病
國參酌權變以歸于當初攝元令修學造士建橋利涉察

弊正法裁公費而里甲謳歌矣息爭訟而風俗丕變矣練鄉兵而盜賊潛踪矣此雖功在一邑哉朕元固婺隸造元固造吾婺也已而以兼攝州篆州久缺官事體廢弛人情玩愒奸弊叢生有不可言者公洞若觀火從而振刷之釐剔之數月之內百廢更新惟時品望治行卓冠諸邦諸上司咸矜重之隨以府事煩之先是府務利害大小輕重緩急當署州時公已照之晰而慮之周至是興者革者一一中肯綮如明賞罰以旌淑別愚肅法紀以懲蠹除奸申鄉約以警惡安良優學校以興文勵行租有隱者清之賦有

困者均之禁有淹者釋之城有圯者繕之而且飭武備以
張內地之威嚴江守以戒未然之防恢衙舍以貽後人之
安布威信以來負固之姦種自德政盡以次第舉焉此其
功之及于斯民者何如也朕猶曰官常作用也所異者外
減七州叛魁內殲頑梗大盜而皆以談笑制勝得之是其
平危靖亂又古循良吏中不多見者試觀昔日之嫫若何
多璽今日之嫫若何安枕公之功信不泯矣且也公功不
獨在一嫫也至今楚姚諸比隣鄉落無桴鼓之虞市城絕
探丸之警者非公之賜與朕則公子民爲慈母于國爲長

城吳臺士民食其德而飲其澤則當其官也沐而浴之歌
而歌之實其隆任也愛而慕之道而懷之事皆出于中心
之誠狀也已其興思不已而剝剝之不已而石若日參之
益實與雲山共仰而吾憐小民一舉目而不忘焉公諱
祖號積若默之思南籍尉之望江人舉天啓丁卯鄉進士
陝西都代義周公去思碑記 楊玄福

嘉隆茂府周公諱一禮號如先歸字淵涵平神潭樸縣中
之秀出者早年以學海蜚英筮仕滇雲貢冰菓之聚撫與
其凋殘而偕之樂利尚一爲溫良洪濶之體且也軀樸無

營合臺有美士民贊曰幸有良翰矣聲聞兩臺咸推重之
乃推公代庖祿邑最爾荒微無足當公一割用者且棄顧
于無恙願題重譯之俗民多簪帶求賜從繩公亦勉至顧
龍梁繼其要發欽其錫勤瘁其體凡可爲撫字元元計者
靡所不至于膠庠之士欲作起其氣而鼓王其神乃嘉意
優禮焉致諸子衿以祝不輟廣成耄耋在得情每海語以
解散迄未嘗取其乘書自稱陳辭也他如禁焚燒實行戶
飭修練謹儲儲功隆安撫惠洽華英商榷教民以恬也由
是改簡刑清口碑載道謳歌樂民之詩方忻四野含哺詎

意九重顯擢賜飛上國莫鼎持危固公之緒餘事其如攀
轅無計何予但以長亭一片石偕蔽芾甘棠期並垂于不
朽云耳

武定府志卷之四 下

中憲大夫武定軍民府事陞四川松茂道按察司副使袁平清賢武庫甫裁定

奉政大夫同知武定軍民府事三韓尚崇禮齊甫

箋註

奉直大夫知邢曲州事三韓趙世錫永甫

奉直大夫知祿勸州事信都陳淳紫巖甫纂修

文林郎知元謀縣事萬全羅綸大經甫

編次

登仕郎儒學教授曲陽潘祚遠甫

本府紳士全訂

藝文

記下

建文帝遜跡獅山記

楚雄太守馮 璉

按明紀靖難兵破南京建文以被火聞實得太祖遺命薙髮從水關出自蜀入滇常往來廣西貴州諸寺中正統庚申出思恩語寺僧道實當事不敢隱以聞于朝迎入大內以壽終常賦詩云牢落西南四十秋蕭蕭白髮已盈頭乾坤有恨家何在江漢無情水自流長樂宮中雲氣散朝元閣上雨聲收薪蒲細柳年七綠野老吞聲哭未休天下傳誦之予至滇求其遺跡則今武定府獅子山龍隱菴中其

像與許俱存云父老又言初至滇寓城中五華寺自言與沐將軍有舊寺僧報沐至寺密語移時使人送至武定府語雖無據狀以永樂時法網之密而帝得保全于滇不可謂無默護之者也沐黔寧本傳言懿文太子卒王哭泣過度卒隕其生似以諱賜死事然黔寧本高帝養子於懿文誼同昆弟死而哀慟亦情理之可信者故建文萬里奔赴其子初非無意春與晟既不挾之以開募亦不賣之以邀寵慎密庇護以全其生於燼脂東濕之世洵非長者不能也自傳不疑以收僞太子之名後世爭援爲口實獨吳宗

不徒朝臣感衆之請迎養大內可稱仁人君子之用心矣
身隔生木復歸九五固天命使然倘亦仁厚之報耶

謹按致身錄帝以建文夏六月十三日出入扈者二十
二人初欲依平江侯不可史仲彬迎至吳江之黃溪適
間成祖追彬勅命逸去追尚書胡濙行遊天下訪求張
三峯盜踪跡帝也都御史陳瑛鍛鍊諸忠臣史公寧獄
窮終勝不自明其精忠隱忍至已而沐公之慎密庇護
不復如此嗟乎乾坤有恨何不付之寂滅西內之歸何如
歸山三龕若從臣諸公自光天壤矣

袁平王清賢識

建文從亡十一先生記

本府太守

顧岱

嘗讀唐史武德九年事秦王世民殺太子建成齊王元吉
同氣操刃蹀血禁庭未嘗不廢書而三嘆也又讀宋史太
平興國三年八月事綱目書皇子武功郡王德昭自殺一
弟兩侄俱不得其死悲夫余竊訝唐宋兩朝諸臣如趙普
薛居正房元齡長孫無忌等終不能委曲匡救默輔而調
停之豈處人兄弟叔侄之間有難以與人議者歟抑何忍
坐視其慘刻蔑倫至於此極也明永樂元年靖難兵起
以周公而奪成王之位豈亘古之所未有則成祖行事

出於李世民趙匡義之下矣余所怪者建文皇帝於大內落髮出亡至雲南永嘉寺復由重慶抵襄陽入吳遊天台雁宕托定空門踪跡往來遍天下幾四十年卒能免於難此其勝於建成元吉德昭者萬萬矣況當是時成祖密偵之備至數遣胡濙鄭和等往來雲貴間而建文遊行匿跡於滇黔浙粵吳楚之間安然無恙者爲細考從亡紀備詢本末則程濟等十一先生之戮力居多焉以視唐宋諸臣其節槩相去豈不遠哉按建文居滇紀其間忠貞之臣變易姓名者亦多不得其詳其爲道人而始終保衛不辭

山險婉轉盡死力者則編修程濟也爲比丘而陰相往來
隨所之助力者御史葉希賢吳王教授楊應龍也其三至
滇者則史仲彬一至者雪和尚郭節與程亭焦雲也至滇
而齒生復來而病死於蕭寺者馮淮黃直也密訪師而相
遇於雲南道中相對慟哭退而自縊於亭驛以絕口者工
部尙書嚴震也曾留宿而終身不言陰護之於滇者黔國
公沐晟也而廖平梁良玉王資金焦等不至滇者不與焉
於戲以文皇帝之英武嚴察建文之優柔儒儒而行遯於
天涯海角始終曲折以脫虎口自非十一先生盡心竭力

志其身以保護之其亦難矣歷觀古今忠烈名臣炳耀史冊雖綱常之凜凜實殺身以成名否則自重其死或將隱忍有爲不屑小節以冀大功耳在當時仁宗宣宗聖明接武而先生獨奮不顧身馳驅憔悴死相隨於爲僧爲道必無所能爲之君則更奇矣使諸公而有所希冀則必不能全其君或藏名不淡亦必不能全其身不爲功不爲名而顛沛流離東西南北積四十年之久諸公其何所爲乎蓋君臣大義誠不可解于天地之間者所爲竭股肱之力繼之以忠貞諸公有焉岱守武陽時登獅山得瞻禮建

文之祠與像想當年跋胡蹙尾之齒諸先生悲歌飲泣之
狀歷歷如在目前事隱三百年未有表章之者誠爲缺然
吾同年友馮甦遺書囑曰建文踪跡不止在滇滇亦不止
武定今武定既有其祠與像則立諸公之室以配享其旁
誠天理人心所不可少之事也余曰唯唯憶余幼時論史
及方正學草詔號哭每黯然泣下今得瞻其像禮其祠敢
不爲之立主奉祀者非人情矣方今桑海屢易金陵王氣
消歇已久而三祖十三宗之鴻功偉烈俱已霧捲雲收土
崩瓦碎獨建文祠堂俎豆猶新徽型如昨而從亡十一先

生松栢爲心風霜其操田夫野老迄今猶稱頌之勿哀雖
當南遊瘴嶺北望天門備極辛苦而側身天地上下古
今孰得孰失不遇幾局殘棋邯鄲一夢爲十一先生者其
亦可無龍歸滄海鳳返丹山之嘆矣康熙七年冬僧水谷
建閣成仍祠建文之像於閣因爲叙其從亡至滇者十一
人題其主曰明建文從亡忠臣某某之位旁註其姓氏不
詳其官爵邑里者明諸公之心願爲比丘爲道人願死於
道路知有君而不知有其官且不知有其身也以余歷覽
六朝五代遼金宋元之間大倫不講久矣而有明十一先

生忠貫金石名並乾坤若此於戲君臣之義豈不在人哉

按史仲彬致身錄帝之出也扈駕者二十二人其
與帝同視憂者三人吳王教授楊應能稱修程論稱
此丘御史葉希賢稱道人往來道路給運者七人徐
王府賓輔史仲彬刑部司務馮淮稱塞馬先生時稱
馮翁稱馬公時稱馬二子中書舍人郭節稱雪菴時
稱雪和尚宋和稱雲門生時稱稽山主人稱槎道人
稱修趙天泰遠衣蓍稱葛衣翁時稱天肖子欽天監
正王之臣家世補錫稱老補錫武牛景先稱東吳
焦時稱東吳王人其他如廖平金焦王良蔡運梁田
王梁良玉梁仲節王資劉伸鄭洽何州八八各徐散
四方還為應我與姓氏爵里具核在錄中錄之所載
如建寧平十先生記中所著姓氏率多與錄不令如
沐公在真宜所所未載但沐公鍾夫從臣而陰護之
功著多表而自之似可補錄之未及至若程編修錄
則自論記則曰濟得毋魚魯之誤乎以迄黃程焦幾
四先生皆錄中未載而老補錫王之臣子吾要傳有

遺跡又爲記中所遺因附錄于此以俟博覽君子之
考定云程人爲澤先識

退思堂記

顧岱

武陽府治之西有隙地一畝舊有屋三楹余葺而新之擴
其左楹題曰退思取補過之義也又聞之易曰知進而不
知退月幾望君子征凶哉言乎夫士君子閉戶讀書幸
逢堯舜出而臨民固有以仕爲家老而忘遜者矣嗚呼其
亦未思夫退之之義也余服官萬里數年以來飲食夢寐
都在水聲山氣中共間閱歷人情博觀世態亦已領略八
九而自顧一身迂拙飄泊無依輒喟然三嘆作蓴鱸之想

每兀坐靜思三十年來雄心向往輕言傲物嘻笑怒罵凡
憎人之所加於我與我之所以獲戾於世者皆未思夫退
之之義也故題是堂以爲戒客筵之曰子年未四十父老
耄老德業未著將萃比求進之不暇而猥云退乎哉吾知
子徒襲退之名而未得退之實也余曰不然夫日中必昃
月滿必虧山高則削水滿則溢自然之理也且人生宇宙
自少壯以至於老其間風雨晦明憂思困苦離別生死疾
病弔祭諸事無日不擾之於中外求其和風永日明月清
陰庭有名花座有佳客酌酒言歡胸無俗慮父子兄弟聚

有一堂怕怕燕樂而無嘆息之聲者真年中曾幾日天下
曾有幾人哉余竊不自量顧退而求斯樂矣此退思之義
也堂之中有琴一張書一卷碁一局畫一軸而常置茶一
甌酒一壺堂之南有青山萬重膏腴數千畝城廓人民數
百戶而寺院鐘鼓時相聞以吾居其中陶然嘯咏遠望田
疇蔚然新綠漁樵雜沓朝暮往還烟雲變滅不可名狀而
時有文人俠士一登其堂相與倡和論文悲歌慷慨蹴踘
擊劍以爲樂不自知其身爲五斗所束縛在滇南萬里外
也因思吾家江南九龍山下有敝廬在焉視此之高曠清

幽不無俗事所謂隱于朝與隱于鄉與耶在耶則異日之所爲進者今日之所爲退矣故記之

遷城隍廟碑記

祿勸州守彭 鏞

今日滇中弓未橐矢未戢瘡痍未起遽欲從窮簷廢壘之中闢草萊刈荆棘式隆廟貌櫟楠几筵以安神明此叔孫通起禮儀竊笑於魯兩生也然事有急而實綏綏而實急者亦在乎爲之而已矣我

皇上御極之元年余奉

命治茲土問州之戶口幾何存里役之徵輸幾何數倉廩之

積貯幾何地城廓之綱繆幾何備或曰兵凶也巷無居人而阡陌石田也噫是豈所以爲治哉至進而禮城隍廟則孤立郊外頽垣斷壁悲風長號爲之徬徨太息者數四夫成民致神守土者之責也守臣奉

天子法安斯民城隍神則奉

上帝法鑒觀守令以安斯民故民有顯過則守令得以法繩之至守令有不及見者城隍神得以陰譴加之是城隍神與守令共司民牧之權不得幽明二視之也然守臣居城內城隍神居城外奈何內外分居之與越兩年各州之士

民詰余曰使君下車以來戶口歸矣里役清矣倉廩實矣
城廓完矣所謂緩而實急者其在斯乎其在斯乎會總戎
馮大將軍出已資市民若之願會斯謀欲遷神於城內而
以舊廟改祀東嶽觀音聖壽誠盛典也余聞之拊膺
嘆曰士之行作吏食五斗米不能爲斯士興廢起敬神其
謂何髮捐俸出穀以佐士民之不逮是役也屬工於丁未
歲十一月十一日告成於戊申歲五月二十八日輸奠垣
墉煥然一新善士高慶捷之用力居多焉可不爲有志於
事竟成之一券哉今西南應想昆海無波頻年之內物無

天祐民無疵癘凡我父老子弟歲時伏膺奉牲奉盛下以昭民力之普存上以歌

帝眷之無疆神之呵護豈有艾耶余讀禮東歸敬以數言勒諸石左彰士民遷廟妥神之念以傳不朽後之君子蒞斯土者丹牘塗墍余且拭目俟之

重修玉皇閣碑記

彭 蠡

天帝一也先儒論之詳矣至道書則謂上帝爲玉皇子不知玉皇之稱何所昉然以理斷之則宋也皇也帝也一而已矣春秋傳曰天子祭天諸侯不得祭天而可以祭土天

尊敬也。漢於中國居極邊而祿勸於滇夷爲邊州顧禮不
得祭天而廟祀並帝得毋僭竊之嫌乎。然神道設教君子
之所嘉與。今海內郡縣之有玉皇閣者比比皆是。何獨於
此而浚辨之。聞諸父老曰。吾州之有玉皇閣創自明之盛
時。州民奉祀最嚴。故百有餘歲。時雨和風有禱輒應。其食
報於天者誠厚已。

今上御極三年。秋成在望。而霪雨不止。上下皇皇懼無以供
賦稅而贍衣食。夫賦稅或闕。則官有譴責之憂。衣食不給
則民有怨怒之患。補救無術。罪在守臣。安得不呼天而請

命也耶爰偕黎獻蒲伏涕洟陛下哀矜祈禱者累日已
而陰霾漸消秋陽布爽起視阡陌之間庭碩秀實胥慶有
秋矣於戲萬物父母求民之莫詩書所稱信有徵哉於是
相與謀新廟貌以仰荅神庥惟地瘠民貧物力匪易經始
於神辰之冬落成於丙午之秋不欲遽不醵金不役民聽
其樂施而次第舉成黻冕輝煌致其敬也櫟題華藻昭其
繁也船壁石欄存其儉也豈古所謂糴不及奢麗不及飾
者非歟余以遲鈍守此州已八年幸吏民相安於無事且
性耽幽靜毋就此閣而棲息焉嘉木扶疎雲山變幻泉石

鳥語相安於無事令人有出世之思而忘遷客之感慨矣
己酉夏五月初士王本瑩伐獅峯之石勒諸善姓名川雷
不朽而請余爲之記夫勸善紀功守臣之責也重修斯閣
士民之力居多余敢以不文而辭之或曰儒者尊經而黜
緯粵稽玉皇之稱不載經傳直謂之上帝閣未爲不可余
曰周禮以禋祀祀昊天上帝以實柴祀日月星辰以燎燎
祀司中司命觀師兩師此大宗伯之事也余方忝司牧第
知循民願已爾若考正祀典夫我則不暇

貴陽潘公世德碑記

失名

太和寺距城二十里舊名樂家庵樂氏捐貲創建爲報德也曷言乎報德也是萬曆中有貴陽潘公諱思聰者以援例起家筮仕武定府司獄雖在下位率以仁厚存心能盡其職蓋其先尊公守昆陽多惠政世傳清白公守而無失云時武定民樂應舉爲仇家所訟郡守捕治獄未竟忽中仇家蜚語守恚甚思得應舉而甘心之夜召公密囑意在明旦卽不欲有生應舉矣公回署仰天太息曰夫上帝好生人命至重殺人媚人之事吾不能爲若以此獲罪視去一官如敝屣耳亟呼樂氏戚屬語之曰此事羅織已成非

上控無由得自樂從之翌日入見守守曰夜來事得當否
公曰不可守盛氣相加將遷怒於公事且不測公徐曰聞
伊已潛遣人赴訴於臺使彼來追攝無生應舉奈何邵守
悚然乃寢其事及臺使按問應舉果直而應舉生矣樂初
無所託於公公亦未嘗有所希於樂蓋惻隱出於天性無
所爲而爲之也公在官隨事體認天理皆類是然以位卑
不得行其志慨然曰吾有子可教安能鬱乚久居此遂致
政歸公旣歸樂氏感公再生之德無以報乃捐橐建菴爲
公祈福於菴之左肖公像祀之且教子孫世世無替焉厥

後公長子方伯公以解元成進士讀書中秘歷官方伯在
滇尤久分守安普兼攝學政兵備曲靖分巡金滄以及晉
陟左轄皆其流膏布愷之區仲子刺史公登賢書仕至漢
州守公冢孫亦登賢書爲蒙自令次孫以恩選爲羅次令
所在皆有頌聲滇人之食德於潘者四世矣今乃復有司
李君來守是邦則公之曾長孫也弱冠掄魁家學淵源傳
爲治譜凡所措施一本仁恕綽有祖風當展嚮用方殷滇
人被澤將見澤及天下焉又有諸子皆英英王立潘氏之
興政未有艾也菴建於萬曆壬寅歷七十餘年奉祀先型

儼然如在兵燹之後未免荒落武人士見司李偕如見公
與言往事慮公之美蹟久而湮沒屬余爲記勒之貞珉以
垂永來茲余思昔于公治獄平恕高駟馬門以貽子孫其
後奕世榮顯如其所期以公方之先後一揆夫人世可傳
之事莫過於爲善爲善之事莫切於救人至於積慶降祥
雲仍昌熾天之報施毫髮不爽誠使公救人食報一事當
在人耳目間豈不令爲善者益勸而爲不善者廢然思逐
也哉此舉實大有關於人心世道而感恩報德猶其末也
余喜傳而樂道之遂爲之記公父諱維嶽公長子諱淵民

次子薛濟民長孫諱馴次孫諱驥曾孫諱德徵備書碑左
併觀者有所考云

重修學官碑記

本府太守王清賢

學校之設謂是尊崇廟貌祇肅觀瞻焜燿于官墻泮壁聲
祀典之具侈爲備美遂高語率由聖哲作育人文乎噫抑
亦夫子之憂以賢親君友之克盡謂之學乎與氏事責明
倫于上孰謂本原之地僅從事于末哉余守武陽於今凡
五歷年所農桑之餘喜親翰墨政事之暇不廢詩書猶之
乎與諸生課藝談文惟敦古處不欲競趨時尚也乃諸生

以此年來殷勤修繕垣既固遠且有陳坐黃迭秦彬雅
迥異于昔謂有功于學校噫抑末矣士君子入兩事親出
而事君忠孝之外無文章性情之外非禮樂倫常之地去
亦以貌飾而心違也故上之爲理學名儒功參造化中之
腐蟲轉顧宰爵心名教下之亦不失爲雅士端方式型經
國際遇雖殊敦本則一若夫制行有虧固懷明發闕牆之
怨徒愧友恭不信于妻子見絕于友朋卽功業爛然祇增
費序之恥試觀鄉賢大典崇祀千秋則諸生之亦步亦趨
者可審尊從矣區區觀瞻之美有功云乎哉然而因外而

餘內由末以端本辟雖鐘鼓載美來茲或勝子荒殘阻恤
耳修其既竣余亦以量移他適履斯地者毋忽斯言

忠惠谷祠記

王清賢

千古之世道千古之人心維之也心一耳而所用各殊時
當掃蕩則激烈風高而久安長治功垂萬載時當休息則
慈祥惠著而厚德浚仁澤流奕世開厥先以啟後善其後
以承先使邊荒末郡外靖兵戈內安畝畝父老子弟永受
惠身豈弟之賜茲且治及藝區漸知向化余於武郡之崇
祀忠烈張公三惠王公胡公寶漢景仰焉者張公陳江

南安憂人由明經歷任貪憲劉鳳總祖被圍賊要以求擄
公致書中丞呂公有豕性難馴狼心叵測如爲職故招撫
燎原焰天終必不免且招而罷討是日繼寇陽詐而陰討
是曰挾詐縱寇不武挾詐非誠惟一意進剿永除滇患雖
死之日猶生之年等語公及于難而賊卒平旋贈光祿少
卿勅立廟祀公暨前後死事同知袁偉知州秦健知事高
必照磨張成吏目劉瑀巡檢俞伯官暨教官常存仁生員
楊忠惠凡九人事載忠烈祠記甚詳廟且荒廢王公諱應
期胡公諱其慥皆楚人則郡人以其有大功德于民思慕

不志建善惠祠合祀之績載二惠祠記祠亦就圯余惟士
君子素居俊談忠義矯誣循良者比比也追當權臨事能
如張公之功垂萬載王公胡公之澤流奕世者自開疆設
爵以來亦多觀也顧忍任其廟貌罔瞻堙祀闕如哉爰捐
貲百三十八金購堂于城東之孔道額曰忠惠合祠以內
五楹命諸生立張公王公胡公暨前後殉事諸公主以祀
之其外五楹上有樓房五下有舖面四因以每舖月租銀
五錢歲共二十四金延師于樓訓郡中之子弟以爲一歲
束脯之需是役也崇祀先賢樹風教于徃代啟誘後學廣

文物所來茲典型具在觀摩益切凡我同人敦名教而益
優崇之則祀典時舉斯文益興未必非世道人心之所助
也

誰關峯記

王清賢

誰關峯天地一奇觀也志曰正續寺俗名獅子山僻在偏
隅不獲與洞天福地等殊爲憾事余守是邦公餘嘗一登
眺覺所謂洞天福地者界在名區又經數千百年來高賢
之所登臨騷客之所吟咏羽士幽人之所棲托稱揚標榜
類多人巧獨此山則西南磅礴之氣踴躍奔騰蹲踞區中

麓行數里紆盤而上峯迴路轉傑構凌霄俯視山川林壑
蒼茫灝渺杳無涯際令人有獨立之想更寺有別殿淡遠
軒敞拱明讓帝像傍列當時從臣諸先生至尊卑坐立儼
然恭敬不衰瞻禮之下因慨讓帝之臣也文皇索之不遺
餘力向使此山爲洞天福地一夫得而解繫之矣以是知
重名之下常爲造物所忌而扶輿正氣保全帝釋適以補
造化不平之愆噫異矣他如寺傍右徑遊人曲折而登古
木千章藤蘿翳繁層崖峻壁身在樹杪從下而望者輒憚
倘欲慄而層級以上者恍如置身丹嶂中馴鷲不驚鳥語

撩人則樂極忘疲矣歷熬石諸勝直抵絕頂豁開平峽綿
亘數十餘里天池一泓清鑒鬚眉不必謝朓詩早已搔首
欲問青天迨有折而返則岩窩洞徑有如筆削有如虎踞
有如獸攫振衣處尤爲奇險觸天乃逡巡步履天然如鑿
石使昌黎登此又何懼一跌爲泥百計求之不得下而彼
界在名區所謂洞天福地高賢騷客羽士幽人之所登臨
題咏棲托噴吐人口者豈果盡如此中之天地自然不勞
人力盡是天工哉寺僧水谷者合掌而前曰宰官現身說法
法矣僧掘地得石質瑩而堅鑄以豎坊盍記之以爲一師

文風之助余應之曰若果如所言余且拭目俟之何惜一言是爲記

斯立樓記

王清賢

獅山之麓爲武陽郡城城大僅如斗依僑署暫爲郡治彼舍宇鱗比適爲營卒樓止凡我士民俱廬於東南之郊羈有隙地數畝余築樓其上顏曰斯立嘗一登眺指顧民物山川隴畝豁然在望顧而樂之歲戊辰春王余年且三十矣是辰也風霄氣和高朋滿座因舉杯屬客登樓而酌曰猶記余初來時驚鴻甫集間井蕭條嗟此子遺田廬未復

余何暇有此樓哉今幸與諸君子登以嘯咏試觀柳夢綽
舒楊英欲吐野人腸鼓東郊山色平鋪新翠對茲佳景宜
治壺觴又如梅子初肥荷擎乍泛騷客題橋樽傾永日簑
農耨雨笠戴青天於斯時也山新雨後酒醉詩前試一凭
欄光景無邊矣至於穗擁黃雲峯妍黛影豪士賡風於桂
魄太守酌月於梧軒忽聞溪樹蟬鳴恍如天籟有不豪興
倍增者哉乃若載艾載穫困廩倉箱公堂無事式歌且閒
開窓四望雪滿前山詩歆驢背客到梅邊慙然長嘯江山
入樓是此樓之宜人也備矣夫士大夫得時則駕馳騁華

臚耳卽役。簿書方攢眉愁頰之不服。余縻此四載。毫無
表見。惟是士吟里巷。民歌田疇。恒得餘閒。以登此樓。琴樽
在御。書史滿床。時望自雲片。實勞我心。諸君子盍爲賦
之。客曰善。因命童拂箋。濡墨得韻如左。

補天泉記

王清賢

歲戊辰夏。郡民正有事于南畝。未雨者計逾二旬。川涸泉
枯。民雖泄。余獨皇。爰率僚屬步禱旋獲。井霖。吾民稱
慶。先是雨未降。余徬徨郊原。見吾民桔槔之外。尤病于汲。
余怒然曰。灌歲計也。汲日計也。歲計在天。而在人。日計在

人而在天造化縱有缺隙補救之謂何其忽之也父老於是杖而前曰澗有龍泉漱漬于沙石耳吾儕小人謀築之以供日用每以憚費而止余曰若慮費耶夫天一生水水非天無以爲體天非水無以爲用瀦水以補天不過吾儒致用以合體耳有若太守在若何憚乃捐貲砌池更立廟以崇祀事建亭以備遊觀落成之日既喜泉清而冽尤喜平觀四野翠綠橫鋪矣因名茲泉曰補天并叙而記之

施梯水道碑記

王清賢

士大夫入佐

八子以黼黻太平出宣

皇猷以經理民事雖遇有不同苟

有裨于國有利于民常而不失其變可也變而不失其常
亦可也安在其固執爲余蒞武之二年值丙寅春三月有
庠士苟名尚禮趙名恒并超梓楊生者訟鏹匠村軍民施
國賢武應侯越地穿疆侵其本界之水道其界維何則拖
梯也去祿陽二十里許居鏹匠村上流卽苟楊諸士之山
莊其地無平坦處靠山而田如梯形因以得名諸士進
而陳曰方今神君坐理吏畏民懷無相爭奪者此輩越於
制雖農家事敢請命吏決之余曰溝洫詎細事乎古井田

之制亦戒豪強經界必正子輿氏所以切切言之也烏得
侵侵有罰盡往勘之於是車騎就道過祿邑越秀屏船鳩
河而上極目流覽之致三處形勝悉在目中焉更進父
老而詢之遍歷溝洫而巡之見夫石田數頃雜草宅之者
爲軍餘久廢之畝也詢其廢之之故咸謂舊作銅車注鳩
水以逆灌之民力幾何而堪年換月添也耶所以任其廢
棄若斯余不勝慨懷焉思所爲救之術而未得又見夫新
滑在傍遙上數里間其爲軍餘所方鑿而因以致訟者乎
嗟上億矣工食其頻耗矣助力其旣穿矣民力其堪念矣

余素厭俗吏之所爲拘牽文法每藉口於舊制之不可渝
制誠不無過焉然通乎時州牧李子在側因謂之曰
水必得源試與其源乎自有巖李子曰唯唯尚未知余意
之所在也相從余騎而行越數里入石箐騎不能馳遂秣
馬於野捫蘿拔石而登焉北初入壑時猶見水淦沙石中
流甚細余有憂容憂其水之止能濟拖梯而不能濟荒隴
也更振衣直上將次山巔紫蘚雲封蒼藤壁掛恍若別是
一天余亦不暇顧其景色遙見古木掩映內隱隱龍湫一
泓至則清澄可愛較流于山下者加大矣不覺怡然色動

曰吾解此訟其在斯乎乃臨流而謂諸士曰子從太守斷
乎有泉如此此天地自然之利也不足固不能以及人有
餘又何得獨私其造化蓋於爾農桑霜足之後分其餘施
以惠彼瘠土誠吾備不費之惠利甚溥焉但禁絕軍人不
得竊之于未足之日是又太守杜侵漁之微意也勉之戒
之哉甫畢兩訟忽應聲而解余既喜其士民之淳而厚
且自笑余之迂而勞也倘所謂政之變而不失其常者是
耶非耶李子請而志之余再從而賦之曰

松逕行來十里香綠晴點處嫩晴光煩余花馬踏輕重任

彼山村計短長源本何來通石橋
于幾處灌叢桑須知
所利公斯溥但願吾民鮮訟場

東園記

王清賢

人生如寄耳仕宦所歷不過寄中之偶寄耳而寄中偶寄
僅依僑署則又偶寄中之一瞬耳顧此一瞬中安養民物
在斯陶咏性情卽在斯含性情而言安養非定政也猶記
初蒞此時僑署之外毫無隙地環東北而雜遝喧嘩者營
卒六卡餘家太守署側尚且如此編戶小民其何以堪爰
令各歸營界太守耳根始得清淨更關隘爲敞種竹成林

每上閒踏北望白雲中心耿耿遂構亭其中題曰雲亭亭
畔接雲影池南建獨得軒傍爲叢桂齋又南爲觀德處舊
有堂一楹葺而新之顏以悠朕見南山是役也或爲創新
或爲改舊工匠夫役計目酬值閱載而落成不敢或妨農
時至子依城爲垣因勢布局不過此心自得之性情合天
地自然之結構耳嘗以公餘之暇散布遊行登堂則南山
聳翠柳系桃葢兩行輝映曠然足樂曲徑盤折入我東園
則軒豁鸞翔花開鳥覩恍如置身丘壑間黃庭一卷悟徹
華胥矣臨池靜鑒尤覺明淨如心魚竅藻緒風縐水紋機

神帝怡回盼雲亭爐香正熱拂几偶愁夢對高堂笑語此
間民物又以茗乳松濤設止驚寤因筆而記之

獨得軒集飲記

王清賢

乙丑初冬將望余集群賢豪飲獨得軒月下浙東有如吳
君昆明湯子禹若郡之劉子亮永傅子巖臣楊子怡雲同
在座時飲詩時對局更論世事索求性命之微天人理欲
之分勃上無憊意吳君興尤熾白眼疾呼酒神安在耶余
率然面應文魔在斯酒神當亦在斯酒神陡至皎如玉樹
綠衣黃冠熙熙接人如坐春風中歡朕道故云杜康是祖

青蓮知我若異若劉是贊我者世人號予爲麴先生余欣
朕遂與之高談雄辯卽以獨得之妙麴先生覩朕喜曰是
獨得也得之矣今欲邀見義皇上人到華胥國何如余相
視唯唯

祿勸州文昌宮碑記

祿勸州牧 李之驥

祿之有文昌宮也始自康熙十五年前任李刺史觀文教
衰靡因遷大士閣於椒山袁刺史塑像廟祀漸次經營及
范署州又復踵事增華庠生陳此猷身理其責募修厥成
所云培植地脉爲士林捷徑真盛德不朽事也今中正二

殿東西兩廂俱輪奐可觀且置買常住供香火以垂永久
俾皇帝君寶式憑靈而忠孝節義昭若雲漢蓋歷千百年
如一日耳從此文運聿興賢才輩出而夜燃天祿之藜日
駐元亭之鳳者代不乏人則異日出家修以獻

天子之廷皆社稷生民之寄矣是締造雖起一時而開先啓
後在世世也其有俾于祿陽豈淺也哉萬里塵踪恨雄風
之未賦一行作吏感離騷而有懷瞻斯美舉可以風世遂
爲作文以紀之

寫金剛經序

明雲南
巡按 劉維

維以庚辰駐節武定自夏徂秋凡六越月登獅山浚泉建
亭修觀音菴新其像遊者數矣八月七日將行同叅政李
良臣副使陳詔僉事胡儻復來遊有壘者劉志道告維曰
公所登者茲山之全也山以似獅得名所以近在寺後志
道少出家修行於此卽建文潛寓禮斗處詩聯俱錄尚存
惟真蹟爲鳳賊磨去有奇觀焉請登之知府辛存仁謂其
語誑不足信志道執邀維往至則見山勢上仰而大張如
獅之踞中臺突出作吐舌狀儼狀相肖空曠平衍可書謂

建文潛此理或然也世傳成祖文皇帝靖難兵下建文承
恭祖皇帝秘授因得遁去成祖遣臺官博採民風徧歷天
下其意大抵物色建文也維伯祖給事中保暨御史史儒
寔奉是命符演而建文竟久潛跡山無虞豈三公忠愛交
孚有隱微之長慮默運於其間歟餽其事已漫幻茫昧而
不可傳矣嘆賞久之各下次日晚行至新興諸道來會良
臣曰昨所登獅首處宜大書吞吐煙霞四字以表之維曰
然若益以文一篇更相稱也諸道退維就寢夢衣百結者
來見恍若似婦人告維曰聞公欲寫文賦於此甚善但此

處吾用功甚多公幸勿寫此賦爲吾寫金剛經一卷何如
覺而與同巡者聞新興城卽席語其事固已怪矣至臨安
憶前夢中事命指揮李延之覓金剛經閱之偶得原刻善
本首卷佛像卽夢中所見衣百結者尤足怪也還駐會城
時時念之敬寫是經一卷用記前夢若爲神畢此願併述
先朝遺事闡二公之幽微於二百年後將備稗官野史之
採錄文賦大字竟不敢書事涉語怪雖於聖人之教無當
然維精神感遇寤寐兩孚誠不敢自誣使之終泯泯也軼
威以屬辛守世觀音菴僧真越永永收奉所願展此卷者

共成佛道。一如佛所說。而二公意慮忠智之幽微。亦緣此略傳云。

西林寺記引

蘇州守劉元瀚

昔庾信至北。惟愛溫子昇寒山寺碑。後還南。人問北方人物。信曰。惟寒山寺一片石堪共語耳。夫佛刹之不可無一碣。而一碣之足爲佛刹重。有若是耶。余不俟來牧。祿勸也。三載於茲。時值修禊。詣此刹。幟禮經。醮閱。三日夜。少暇。輒令僧雛前道。穿雲躡蹬。選勝尋幽。廣長之舌。嚶七枝上響。應巖谷。依巖。迎陵仙音。清流碧澗。映帶左右。淙淙有聲。又

恍然虎溪光景松濤响梵嫩草踈踈萬木蒼雲之中香閣
漫出真欲界之僊都塵寰之淨土也竊想佛國精舍所稱
靈鷲竹林庶幾其近之矣余爲之慨然訝曰有此寶刹無
一碣以紀其勝毋亦苦蕘所封抑亦兵燹所殘耶老衲儼
懽和南而前曰有一碣寄於獅山之淨土庵一碣石尚未
就鐫南文具在余展玩再四此足盡西林一寺矣亟宜付
之剞劂夫復何贅噫嘻羅婺一境那刹繡列毋如此寺海
曲比丘實繁有徒惟儒懽獨超勤修不懈可堪作緣謹撰
數語弁之碣杪今常住近茲暨諸檀越所資助所新墾者

毋得滄桑而侵隱焉與此碑圖垂永久足矣儻後余而有
賓音余不敢自飾於吾邦則此一片石未必非借爲知己
云

勸修武定府學碑

王清賢

萬仞宮牆歷代高山共仰千秋俎豆於今天典彌昭炳炳
魁樓文星煥彩盈盈泮水芹藻生香冀科甲以聯登宜觀
瞻之罔缺武庠人文方盛歌詠維勤賢奉

命來守茲土謁

聖以青衿慕瞻殿廡之傾頽薄捐繕

葺笑使囊之羞澁未極恢宏以故滯鴻鳥之飛鳴涸魚龍

之變化有慚人傑致詣地靈爰謠疏淪頻池引清泉于沼
址奐輪藝苑吟皓月于膠庠而且魁星椒樓葺經臨閣共
期無美不集有廢必修更遇戎政諸公講折衝于樽俎臨
民各收談經濟以詩書雅聚一時風高千古食圖盛舉人
協同心而吾於茲因有感矣功名富貴人生各逞逢年事
業文章舉世競誇我輩然而繁華隊裏誰念淵源闢熱場
中頓忘基始尤可異者梵天蕭寺邀福爭揮布地之金舞
榭歌臺矜豪不吝纏頭之錦而顧使礫堆檣陞泥於橋門
一任大雅貽譏鴻文不振哉欲興鉅典端賴同人敬告紳

者無分文武家貧何妨助役力贍正好捐貲務使赫奕碑
廊收拾山川之秀魏弢甲第輝煌俊髦之光豈曰重道以
崇儒脚云型方而式俗爾

傳

馬中丞傳

王清賢

公名胤字洛水漁之武定人也初名國禎受業于邵人蔡
陵刺史楊起蟠文章氣節弟與師同旋改名登崇禎癸酉
鄉試甲戌下第授四川廣安收奏績擢夔州府丞當中原
擾攘之時需才孔亟尋陞川東僉憲閣部楊公士昌知其

原缺

雖人人殊死則一也公無愧乎爲人臣矣可傳於天下後世矣

楊刺史傳

祿勸州守 陳 淳

公諱春震字起蟠其先江西臨川人也父一山公性沉靜多奇計連不得志於有司嘉靖間雲南鳳氏屢叛呂光洵受命撫滇且剿寇先是鳳繼祖結連會里姚安諸土司勢甚狂逞舊撫敖宗慶進討不效貪事張澤爾賊中洵募士能佐軍者一山公實伏劍從謀多秘密人無知者賊半洵翻之官一山公對曰吾不爲功名來官何爲遂飄然去

慶丁卯客楚雄有李公者奇其狀以女妻之卽公母太宜人也居無何楚士忌一山公才遷姚之武德衛其年刺史公生隨移居武定刺史公五歲時端凝敏慧不同恒兒眉心有炙痕如一目光彩映發郢客見而異之伺一山公他出負去一山公歸散金募士訪數年不獲萬曆癸未一山公遊武昌泊舟荆門入市閒步遇童子挾笈行兩相熟視兩相留連兩若有不鮮狀近見童子眉心炙痕輒淚下童子叩所以公語之故曰吾父也相持痛哭郢客懼不敢出刺史公泣言明發耿七未嘗置懷日惟私涕絕口不敢言

被畧事且述郢客教以詩書及珍愛意甚悉一山公頃農
醉郢客始携公歸真是時見者聞者莫不高一山公之不
校而服公之明哲保身且不負郢客教訓之義云於時刺
史公年有十四矣讀書刻苦文自成家十六補郡庠作諸
生十三年文行爲多士模楷每試必第一嘗習靜鄉山大
士閣風起燈滅俄見童子執燈至燈復燃視之已失所在
至今有望童燃燈之誼二十九以恩拔入太學出陶少廣
先生門先生雅重公與子夏促之曰子才高勿小就歸應
省試若傳五名後吾不敢相天下士矣是科果滿闕第三

人辛丑赴銓部試少廣勸勿小就如前公曰某非急功名
顧父年高冀一命備祿養娛親爾試第一例得州缺適一
山公患疾家報至皇遽歸侍湯藥衣不解帶者累月次年
三月一山公卒祭葬遵家禮不用浮屠人咸服之甲辰十
月授湖廣夔陵州知州乙巳從都門上任停車鄭魏間微
行偵察民利弊王宦名撰者張江陵姻家也官吏部左侍
郎休沐家居恃勢而橫民罹其害者傾家殞命咸切齒而
避其鋒州守拱手奉命稍拂卽中以他事排去之公廉得
撰惡款二百餘條並其黨與姓名衙胥附撰者悉識之廼

發檄之任王親郊迎厚餽遺公辭受一規于禮首謁宋守
歐陽文忠公廟出金壺爲修治好一切俱不視惟日偕紳
士論文飲酒而已二十餘年後其子公純爲東夷能測
公因讀法旋署召諸東夷下集訟者環跪聽判不終日
裁決已盡各心服曰三眼神君也吏胥附王氏者悉解去
數與王抗禮不爲下王日偕舍教坊中之公剛直不樂
王亦無如公何復欲試公才令人投一詞裡事而繁其說
審質間又持一冊爲僧乞募緣引公揮筆聽訟如故訟決
而文亦成又一尼持白紙跪堂下問不應援筆判曰准罷

俗免使僧敲月下門也尼果叩頭去王聞之亦嘆服焉適
江中詰得王私塩若干船公決意懲之將犂牛貯庫半犂
捕役草王氏狀家人環跪沆諫此曰爲天子命吏敢自卹
乎且彼異而食人如畏權避勢藏頭縮尾是吏而奴也吾
豈效之汝勿復言下令曰凡被王宦害者許首告不五日
控者數百人公列撰諸不法狀申詳撫按捕一切惡黨
獄中具揭科道各衙門時撫按皆江陵舊人欲寢其事兵
備王基力持不可撫按不獲已會疏奏聞直指奉旨勘實
詔奪撰官黜撰黨舉人二名生員五名發戍者七人城旦

者十人。癸民稱快。公慨然曰。民患旣除。仇讐莫解。明舊憾。身固如是乎。卽告骸骨歸里。署中僅有書五箱。公曰。此亦。癸陵物。去時封畱之。百姓攀臥號泣。如失父母。旋將所遺。書持送至滇。數月後。撰抑鬱死。民爲謠曰。活我癸民。死被。王撰好個青天。胡止年半。至今稱道不衰。萬曆三十四年。公抵家。土人鄭舉丘相尊求通往來。公察二人有異志。絕之。告太守陳與蚤爲備。典不能用。丁未果陷府城。公先已。携家赴資。寧獲無恐。前太守劉懋武王應期。胡其體。魯大。有德于武。公倡士民立祠以彰其賢。公有第二人春霖。春。

霽慈庶母金氏出公友愛曲至爲霽喪妻辛巳戊申霽卒
公悼甚廢寢食手爲文誌之申賓卿又卒遺一女公極愛
倍已出事庶母金氏關氏極敬謹相繼卒葬祭各如禮戊
申後不問外事惟以崇獎後學爲已任申賓秋評諸士文
語龔正曰若能受言乎正請命者再公令同長子玄祐課
藝獅山別業教之曰爲文須苦思刻求一日一悟愈悟愈
奇若今日寫昨日文宇是自暴棄也夫不借昨日殘霞敗
雲以成今日人可拾他人土爰陳飯以腹已身乎乙卯正
登賢書玄祐悞中副車童子楊玉瓚故人子石根舉失依

公緡衣食收入家塾中訓誨瓊響並入泮食廩饒啓邇多
人戊午次子玄升生公建書室三楹于居舍之側擇鄉黨
子弟俊者教之器焉國祔爲最後易名軌登崇禎癸酉榜
歷官至四川巡撫以節著人咸稱公有陶少廣之藻鑒而
馬中丞有公之風概焉天啟壬戌厭居城市聞有勝地輒
命駕往偶思元謀舊治莊田數畝頗幽僻兼欲採方山雷
應之勝十月抵官庠疾作家人請歸笑曰爾懼吾死非正
寢乎吾以天地爲正寢爾何知比長子玄祐馳至疾已篤
矣呼謂曰吾生平雖無大善善亦不媿科名好撫幼弟成

吾未成之志勉之遂卒崇禎間三換有姪名維章者備兵雲南章舊名某卽所黜生員之以乃改行力學復應童子試得售或以報復諷章章曰起蟠公未殊吾邑一錢吾敢以私仇公平倘非公則吾止于統褲耳何由致此置不問尋擢滇方伯士人楊應瑞以田土控揭志構禍也章亦不問且語武司李泰炫奎曰起蟠公後人何如奎以長玄祐副榜次玄升諸生對章曰書香有繼斯文之幸須青目之奎退而告人曰楊公一無欲而感人若是嗚呼孰謂廉吏不可爲哉蓋公生平公正服人心如此余始刺祿時聞公

氣節數追嘆獨恨未詳久之公孫澤先以公狀來故得悉其顛末焉夫武郡何爲彝區自隆慶改土設流迄今甫百二十年而人文漸起幾于家絃戶誦諸父老莫不感公首倡文學以詩書教子弟以禮義率鄉邦之功嗟乎奕世猶將興起公之爲人蓋可思矣寧僅廉吏云乎哉

從大母辛氏貞節傳

郡人楊澤先

先從大母辛氏孺人者從大父諱春霽元配也出昆明望族爲嘉定刺史碧橋辛公孫女生於萬曆壬辰性穎慧甫六七齡聆兄課讀輒能成誦碧橋公愛之教以書十二通

經史端莊靜淑不苟言笑不事華飾雖生貴冑家略無矜
傲意先大父刺史公聞其賢爲弟季子取焉及來歸益幽
潔自勵每以不及侍舅姑爲憾遇祭日必手作羹以薦事
家長嚴謹極有禮作事動以古人爲言聆其詞藹如也而
正義稊稊則全無巾幗氣是時季子公任俠好義孺人唯
以學進勸刺史公每曰季子得佳婦矣一日季子公出游
醉歸致曠業二日孺人跽自責曰基朝夕事夫子不能勸
勉有成基之罪也從容泣諫爲廢寢食由是季子公感悟
遂盡濟力學焉甫五年甲寅七月季子公忽暴卒時孺人

以歸寧未及還聞凶一痛欲絕亟馳歸而營葬已畢益傷
之造塚壘土一匝爲文以祭而誓之曰死不及臨屍而殯
殯不及臨塋而葬葬不及臨穴而哀負此三恨必有以償
之歸而哀號不食數投繯賴侍婢解免刺史公使慰之曰
溝瀆自經於吾門奚補曷若從容成義且不朽焉於是孺
人抱女泣謝勉進飲食時年二十有一女方九月自夕撫
女號泣淚盡繼之以血聞者爲之刺心孺人不知也除服
後編練如故哀戚不少袁刺史公高其義益以茂龍田三
十畝優其養贍復構別業以居之天啟壬戌有張世成之

變避難母氏家適刺使公新殂兄欲奪其志孺人示之以
死復刺血洎明矢無二至年八亦目尚明能書楷字且予
不釋卷遇諸族婦輒語以爲婦之道及覆古訓雖終夜不
倦歲丙辰孺人年八十有五矣正月望忽疾作語先日爲
我召諸族黨親故至及至出幼所佩一囊以示曰吾以是
成其志檢之則一帙也初孺人未字時喜讀烈女傳摘其
與性近者手錄成帙爲囊佩之諸姊妹或詰或哂亦莫與
辨一日爲爾念兄所見責之曰女子以節烈開澄人生得
已事恐兆不祥奪而焚之孺人復輯以佩至是則事已數

易矣卒問曰今何日耶衆對曰止元第三日也孺人曰噫
非也吾視吾廿有一歲之日無異也向痛先子死不以疾
長負三恨欲相從地下而不卽死者謂一死猶不足以了
之今此六十四年之清白可報先子矣語竟具酒漿祭季
子公靈因留諸人飲曰勉進一觴明歲思老身無及也旣
而無恙迨二月十二日疾復作先以藥進孺人曰吾得所
矣安用此爲越七日辛未卒壽八十五守節六十四年間
里賢之嗟乎以我從大母之貞而且賢如是不幸殂於西
藩背叛時而不及表彰又不忍聽其湮沒敢輯其事以誌

不朽倘後之野史稗官過而錄之其厚幸也夫

疏

勅報武定功次疏

明雲南
巡撫

鄧 漢

滇人之厭亂也久矣數十年間干戈數動反側時聞然或
弄兵潢池志在抄寇擾害邊鄙愚匪剝膚未有如武定之
禍之慘酷者於時變生不測人心震動尺籍皆虛防禦素
懈犬羊雜種實繁有徒據臂一呼村寨皆應所至必克守
無完郭躡蹂我郊關虔劉我人民朕殺我命官甚且進逼
會城縱火示威烟焰張天流血成渠潢池盡赤而我嬰城

國中惟擾失措案印則予索冠裳則予賴其蠶爾無他大
志既飽所欲逡巡引退不然闔城之禍尚忍言哉於是大
理保起等旬會川法曼諸敗響應東西士鮮完誅人無固
志而六詔兩迤之間殆溟乎魚爛獸駭之勢矣推原禍
本則以貪酷有司激變于先乖張撫鎮玩冠于後數逢陽
九夫豈偶朕既而援兵漸集釜魚凡肉撲滅何難使當事
者能臺席待罪誓師弔伐出生人于煨燼之餘而躋之衽
席之上豈不謂失之東隅收之桑榆而奈何不然也

請改土設流

隆慶元年

雲南
思德

呂光洵

爲懇乞聖明俯順輿情改土設流以圖長久治安事武定
府土酋鳳繼祖猖亂已經剿平據土民楊世榮等告議將
該府并元嶽一縣改添流官原屬州縣土民編入有司統
攝及將鳳索林免罪安置鳳思堯降授該府經歷其添設
流官卽于就近陞調爲照土官鳳氏世專地方擅肆驕逆
今酋首鳳繼祖又復倡亂已經殄戮土民各思向化願屬
流官以免遺累所據改土設流事宜旣該各官審察民情
勘議詳悉且查先年鶴慶等府亦係改設事體相同
誠所爲地方久安之計

議

武定府改土設流議 二十事

鄧世彥

一便宜行事以處地方亂離之際人心無歸事變時出或有當誅而未奉明文或有當宥而罪在不赦泥於其法無以招徠乎人必於請詳或至事機已失又無專權人難信服合假之以生殺之權托之予奪之柄歸附者宥之而不疑執迷者鵬剿而不縱可以鼓舞人心賞及惡黨不以爲濫可以革除故習罰及新附不以爲酷軍餉出入要明賞罰輕重由已姑准便宜行事朞月則一應舉動不顧利害

不憚是非爲謀必周所行無滯武定之方不至大定者合
以身當之不復辭也

大開招撫以安反側阿遮原係補知馬火頭阿托撒甸
馬火頭者虛土色馬火頭雞苴繳擺馬火頭魯章半果馬
火頭阿色無馬逆祖立爲曲覺阿托又立爲總管其餘皆
曲覺遮古太頭目也的多陰龍老額烏改雖已聽撫此輩
有一不出爲地方害其頭目名色盡行革去如不準其仍
充火頭彼必懼其不能自全阿遮已經投見餘皆觀望不
出者以此也若許其管理地方於法難容不許恐其負固

合無革去總督曲覺遮古名邑仍許爲馬火頭亦使過之
意庶可經理地方兵不必添而餘黨自出大過旣宥而反
側自安矣

一政士設流以絕禍本仰仗天威創平久叛之邦當更版
圖之化前因逆賊始誅人心猶未靖議給冠帶與鳳恩
堯使民爨有主一時倉卒之見也旣賞不可復追但一得
冠帶其久恣肆漸不可長况鳳氏已叛四次法典難容乞
比照鶴慶事例奏設流官知府其鳳思連議與經歷等官
庶幾爨民知鳳氏藏卑權制誘之不從禍本可絕也

一分割地方以削彙勢元謀十馬自來屬縣故不從賊惟
祿勸二十七馬和曲十馬屬之總管節次倡亂余蒙德意
立鄭韶爲總管張順爲曲覺若徇舊套立三曲覺爲總管
所統其勢莫制合無革去三曲覺將地方分而爲二使總
管曲覺互立並持割祿勸二十七馬與鄭韶和曲十馬與
張順彼此不相統屬以分其勢此許捕盜從征不得濫受
詞狀及擅勾人役常時在府聽用其勢一分而奸謀可絕
也

一盡革頭目以剪羽翼土官設有曲覺三名分管地方遮

古三名管理在田更資三名管理刺悞一應調遣各領步
兵從征扯墨一名管六班快手管家計二名管理在田租
穀此等頭目癸馬庄民受害已極奈不痛革民癸畏之如
虎仍知有土衙之勢求其不爲盜賊劫掠以償頭目之索
取不可得也鄭韶張順旣立不可復革此等頭目名色盡
行革去則總管曲覺之勢自孤羽翼旣剪縱有異志無能
爲也以後則盡行之

一添立總協把事以來持法紀總管曲覺各據地方其勢
難分其權尤重無人夾持一有異謀其能先測合選把事

有身家忠實者四人立爲三州總協捕盜把事督同總管
曲覺分管地方一應捕盜從從彼此同事其委用同列牌
票其舉動同爲出入彼無忌憚此必制之庶獎民知勢不
獨專權非彼出倘有異謀知之必先制之實易而法紀得
行也

一僉選火頭以張新治各馬獎民俱聽馬火頭調用前此
只知總管統之屬於土衙錢糧差役俱係管甸通事代徵
有終身不見漢官者以各役出于土衙并總管也今既招
撫卽當新其耳目其舊馬火頭見存堪立者不必改僉其

不堪者責令各小火頭保舉不拘新舊俱令赴府投見給與下帖管事各村發民每月初一日率領各村村長應卯仍赴該州點查使知馬火頭之役出自流官又不時往來州府庶曉法度觀望畧久而治化可新也

一正各村長以寓保甲各村發民立有火頭只知土衛法度錢糧公務鮮上納于官胥旬通事求之總管各頭目方得完納且縱其出沒劫掠習以爲常今馬火頭旣經改選給帖則村長不可不立查原爲火頭者卽改僉爲村長徧給下帖便知爲流官百姓每村各置木牌一面備寫本村

男婦若并其有出外生理俱要在於村長處告假回銷卽
查育無別故每月初三聽馬太頭率領應卯仍赴該州查
縣此辦保甲之意也

一裁並營馬通事以備保甲江州縣縣二馬食二通事官
旬前此未亂蔡民不肯出官以六科二人皆樂爲近因叛
亂馬分錢糧公務多不完納督甸通事傾家蕩產以致無
人充當一食官旬紛七哀告不爲設處有悞公務况蔡民
多疑一年換二通事在蔡人決不信服在通事難免侵欺
無可查對若遇不才官吏賣放遂假爲藥藥以致廢弛令

無擄取州縣之民有身家忠實爲某馬義人僱服者聽其
爲此馬通事子孫世克則獎人以主事之通事以家人待
之子孫往來各相親愛錢糧公務不致拖欠逆黨自所消
磨通事卽中州之里長火頭村長卽中州之甲首矣
一董行賑濟以布德惠城市鄉村有被逆賊抄擄殺害者
有近城居住燒毀房屋者有爲大兵經過住劄被傷者重
者將賊黨田產量行補給輕者將沒官租穀量行賑濟仍
查各馬錢糧一石給與種穀一斗以便耕種使民獎感德
惠而咸附矣

嚴禁報復以安人心本府多方開諭撫輯脅從陸續投
見隨宜安插地方漸次稍寧恐一應軍民人等懷恨舊日
仇隙報復告擾不無拘提誘民狐疑復行逆竄合無嚴行
禁諭除已往前罪不准告理庶人心得安地方底寧府城
村馬俱得克實矣

一豁免錢糧以甦民困所屬地方春爲逆賊抄擄不得耕
種秋成又爲攻城作踐至于大兵經過無收委果不堪若
不查豁家業既盡衣食不克又加之追徵之害其不逃者
鮮矣民彘饑饉不惟當年無徵明年田地又無其無徵損

人心之大機括也

養贍使不得煽惑人心而禍端可絕也

分撥庄田以安佃戶鳳氏田產應該沒官撥給張順以

爲克賞鳳曆鄭韶皆循舊規古愷今又查入官庄民惶
無所適從乞示賞各名下若干庄餘皆沒官備賞以憑分
撥使庄有定業民有定主而不致復行激散也

一建立學校以廣王化學校未立故癸習莫改今當速建
學校集民癸子弟送學習禮收錄其子弟正所以羈縻其
父兄集數十之癸生蓋有勝于百萬之精兵也又照無人
訓誨乞將本府原寄雲南府學生馬仕等撥回分訓又照
建學本以化癸非爲他方士子出身而設也乞嚴行禁諭
止許所屬州縣各馬癸民并本所官軍親男不許引戶

族軍餘及外府州縣冒籍告擾

一遷移州治以實府城和曲州亂離之後當建城垣以固國本但查離府一十五里百姓住居府城者過半遷入府城使府州體統相承而城池不必另建至于舊治則改爲捕盜館以本府通判任劄于斯則地方鎮定亦無他虞矣立便移府治以厚根本本府坐向不正南北固限于地勢而衙門獨居乎汚下實阻于人謀以致叛亂屢作官民罹禍今既改土設流事當先其根本土衙之上地勢明爽左可建府右可建學坐巽向軋文星前秀後倚獨隆龍虎俱

降官民皆古其修建之費盡查土官沒官各項銀兩以克之不敢仰給于布政司也

一添設驛舖以速往來改土設流則土司不時按臨住劄且通四牁往來將爲通衢合當于小甸關設一驛并一堡府城又設一堡十五里設一舖于金沙江元謀縣白花山石板溝等處酌量遠近建立庶答應速而文移不至稽延也

一建土民哨以防盜賊改土設流則商賈貿易河通夷側尙藉益安盜賊難免出沒合于雞街子立一哨一碗水立

一哨白花山立一哨由武定至元謀金沙江至黎溪皆武定地方也十里一哨舊有者查復未有者添設庶幾有所責成盜賊爲可弭也

一選練民壯以備調遣既設樂矣該軍八百名可足參瞭各官軍威之用近議調土兵一千名不過爲明歲半年之計土兵不服水土非病卽逃豈可貿成頑悍難制爲地方害者多矣又費糧餉甚多何以維之合無將土衙

議皂隸并養馬柴草各項漢人約有精壯者五百名編爲民壯分爲上下二班一班三百五十名一班立一百夫長

共三名每五十名立一小甲若十名每月一換上班小
獸卽調追捕勢重卽調下與同剿上班者常川聽操下中
者回家耕種此寓兵于農之意况一年所費較之屯兵耗
甚且緩急聽我調度亦賑濟一方收拾人心之一策也率
于兵糧之費查本府地方若菜溝銅礦興旺布政司有行
查開准報國課適年可足兵糧之費以地方之利養地方
之兵似宜俯從况可聚積人民地方亦可克實矣

按是議通詳去後奉巡撫呂批一應事情悉聽便宜行
事隨上其議于朝因改土設流焉

余來守詢諸父老當日改土設流故僉曰逆祖撲滅巡撫呂公請于朝有是舉而贊成之者則方伯鄒公也至先生弗及焉考邵乘則又湮沒無存不意于殘碣中得先生改土設流記及二十議誦至純樸不殘孰爲鐵鐔白玉不毀孰爲珪璋土治相安孰爲改設遽興起曰武非改設孰沮其亂改設非公孰發其謀是改設之舉非先生倡之鄒公孰從而贊之呂公孰從而成之也哉吁先生可謂社稷臣矣余去先生百二十年其風節猶可想見因附數言以談氣慕云襄平王清賢識

嚴禁冒籍議

王清賢

生童冒籍之禁亟宜申明崇文重士以清庠序也學政全書最嚴冒籍凡考取生童皆有定例蓋一隅有一隅之人材一室有一室之忠信若舍此而取彼殊失

朝廷因地達才之意并開冒濫攻擊之端遂致魚目混珠燕石混玉其害殆不可勝言矣且宮牆巍峻一切賤隸刑喪過犯之輩嚴拒而不許入人非本境何以別其世系考其素履苟不可知則廩生鄰佑之保結童生之互結皆屬虛捏摹擬將見學校之弊不一而足保無有冒名頂替匿

設賤役種種穢跡于貴官之上者乎况州縣印官無值考
試亦皆出其印結耳目之所不及咎將誰歸乃滇省之例
則不然每有此府之人而寄考于彼府此學之重而擬之
彼學因循既久巧立其名曰寄學公然行之故有名列某
學而經年屢月該管儒學之官竟從未見斯人之面知斯
人之學行者及遇學道考期乃相率突然而出其平日喪
服行止舉動漫無稽查學校斯文之地詎宜有此以非謬
議除從前寬免追議外嗣後只將本屬州縣童生照例考
取准令撥入府學外其餘別府州縣童生遵令止令於本

海州縣應徵不得仍稱佃戶以混產產相賠無底止也

招墾軍田議

王清賢

屯田招佃之法亟宜變通懋軍恤民以補賦役也滇南屯
軍之糧考自明季南來數倍于民以致軍因邊姓荆棘滿
目查其田土皆無膏腴可耕之地歷年招墾並無應募之
人者總之遠慮沿久成熟恐即着併伊等承頂軍產永受
其累以故疑畏不前荒蕪徒甚再四籌維暫濟時艱莫
如給照招租之一法設立信約出示招募遠近居民聽其
自擇可種之地就便佃租報明該管官吏給以印照居

切隨田錢糧不許軍境糧甲人等復爲索擾其租種田地
每年止照民賦頃畝交納租穀該管官吏擇僉老成頭人
收貯以補本境軍戶逋欠之不足租種日久安土重遷自
然不忍拋棄卽有願退情節仍聽租人自便本管官吏另
行招佃承種亦屬易事積累而行荒可漸闢且迺軍聞風
而復業亦庶幾意料中事也賢目擊軍境荒殘苦累日甚
謹謬陳變通之策然招租之議雖少蘓軍累終非長久之
計倘更邀題請改照民賦一例科則培元氣以固邦本公
私實兩有裨益矣

金沙江議

馮甦

金沙江源出吐蕃界至共龍川犁牛石下南流漸廣故名
犁水後因訛爲麗水云東經巨津寶山三州三面臨麗江
府又東經鶴慶受樣共江諸水又東經北勝受桑園龍潭
程海諸水又東經姚安受蜻蛉弄棟龍蛟諸水又東經楚
雄定遠受龍川江諸水又東經武定北受元謀西溪滇池
螳螂川羅次富民諸水又東經東川濟慮部過烏龍山受
尋甸牛欄江谷壁川齒化溪諸水又東經烏蒙南又東經
馬湖府受尼溪大汝小汝諸水又東至叙州府合大江此

南中西北之險蒙氏僭稱北竇者也正統間靖遠伯王驥
會議圍藩未果至嘉靖初巡撫都御史黃衷復議開工役
繕具爲武定土酋鳳朝明所梗會衷卽陞任事遂寢其後
巡撫汪文盛亦委官踏勘而朝明妻瞿氏爲女土官又從
而阻撓之巡按毛鳳韶知其事分巡洱海時復上議云雲
南有水路直抵四川馬湖府初以遐僻爲土人所據我國
家郡縣其地同於草莽然貢獻之物損官使之行李軍民
自賈之往來捐負千里筋力已疲而土官土舍因見道路
阻絕每懷異志及今國勢強盛不行開通將來之悔不淺

前無也本道訪據武定府揭稱本府有迤東水路自雲南
海口至安寧羅次富民只舊你革達吉普渡河安革法干
迷色出東川大江邊至阿納木姑共六十三站內土色有
疊水又迤西水路自雲南陸路至富民武定虛仁環州凡
五站至金沙江巡檢司下船至罵刺母自馬口祭刺則五
曲革直勒則卓刺除魯圭寧抄答甸沙吉撒麻村亦至土
色大江阿納木姑凡一十四站內卓刺沙吉有疊水又據
金沙江土巡檢稟弘治正德間馬湖府安監生放杉木嘉
靖十七年王萬安亦放杉木俱五板大船經過中惟虎跳

天生橋亦十分不爲險阻又據姜驛驛丞稟每見販木客人結成簾筏日本司江流六日卽抵馬湖等情各到道爲照前項水道武定迤東極爲捷徑但訪得河內間有蠻尖石兩邊崖石柱合成橋水從石縫流下未委虛的若迤西金沙江則水面洪濶四時橫流客商通販前後不絕中間雖有虎跳二灘然皆沙石易鑿此斷然可通而無疑者也合無先將東西二道各委能幹官帶領匠役鄉導沿河踏勘直至馬湖中間要見舟楫無礙者幾處危石可鑿者幾處幾丈幾尺如有絕險人力難施者或作兩截盤運沿河

陸路可通者幾處不通而應合開闢者幾處幾里幾十步
及沿江有無人烟稀密堪立驛遞哨堡等項各計合用功
力人匠若干錢糧若干勘估明白畫圖造冊回報然後擬
議奏請開通不獨一時一方之利實國家久安長治之計
云適值地方多事議竟不行隆慶初鳳酋誅滅巡撫陳大
賓復爲題請而議者多甲乙之詞大抵謂金沙江之道一
通則商賈競於舟而憚於陸筭緡之利告竭於程番之人
府而九驛之途鞠爲茂草矣至天啟中安酋倡亂貴陽道
阻頗議開通按察使莊祖誥謂自巡檢司開由白馬口歷

普隆紅岩石刺鮮至廣趙塘皆祿勸州地其下有三灘水
湍沒石乃可放舟涸則躋岸纜空舟以行又歷直勒村屬
刺土色皆會禮川地其下有鷄心石石如堆者三疊江中
舟者相水勢緩急可行又歷踏照亂得頭峽刺鮮至粉壁
灘甚駛皆東川地又歷驛馬河新灘至虎跳灘陰溝洞皆
巧家地虎跳湍瀉陡石不可容舟陰溝二山頽集水行山
腹中皆從陸路過難易舟而下又歷大小流灘爲蠻彝司
地又歷黃郎鋪賁溪寨業難至南江口爲烏蒙府地始安
流自廣趙塘至南江水商行之可十日又至文溪鐵索江

邊數灘歷麻柳灣教化岩爲馬湖府地又歷洪灘蓮花三灘會溪石角灘至叙州府其說甚明晰然此時明運將終救敗不暇竟莫能開通也續禹功所未至以疏西南朝宗也水道是所壅於全盛之世矣

續請蠲新荒屯賦初議

王清賢

竊惟經國務在於培元恤民要先於除累凡有益於國而無妨于民永當遵守若時勢萬難之事行之徒戕迫民生而實無益國賦安得不詳晰而痛陳之茲以滇省之有新荒也緣康熙二十年間巨憖吳世璠盤踞省城所

迤潰兵肆掠一時父子分離夫妻拆散救死不贍人烟斷
絕阡陌類成丘墟焉追世璠授首殄滅之後統師諸大
將軍暨前任

督撫

部院目擊艱苦加意招徠張示許

題蠲免荒賦軍民始以漸思歸畊按其戶口逃亡去其半
死故去其半所餘又乏牛種以致田畝廢棄是三年新荒
原非偶然旱癘之處可比時勢堪憐故前任

督撫部院屢

具題也乃部議意重國賦恐有虛捏未蒙允行而

雲南等府役有帶徵之請亦凜遵俞旨於不得已中姑
圖爲兩全之計殊不知民糧額輕多方勸飭猶或可以勉

完若軍糧十倍於民應徵額納尙無拮据帶徵一行是以
一年而兼二年之賦計其終歲勤動所獲除應徵額納之
外更何所餘以分養其父母妻子又安得再有所餘而倍
輸納乎蓋其累愈深因而其情愈迫賣妻鬻子日夜啼號
鄉井廬舍又奚暇顧是以并從前兩年漸來復業者聞不
免之信近復相率而逃帶征之示一出其力少可支而現
在者亦慮及貽累包貽又將尤而效之地方有司執法不
得用勸莫從逃之不已不惟歷年帶徵竊恐將來邇年應
徵亦有虧矣虧則必按考成加以叅罰苟叅罰於帶徵有

濟仍屬益事抑何姑息數官奈事無可如何諒爲憲仁之所未忍且仰見憲臺蒞任以來無事不仰體

皇仁無念不痛切民隱職府閱邸抄如直隸河南山東江用福建湖廣四川貴州等省錢糧或以水旱或以兵燹

皇恩浩蕩莫不悉予卹蠲滇省久罹逆寇暴殘流離至極而乃不獲與如天雨露耶總由子遺隱痛上聞未盡悉也恭誦憲敕開境內迺丁荒糧責成道府轉行有司從實查覈造冊開報應蠲豁者奏請蠲豁一面曉諭招徠勸課農種如新荒一項備經道府核實冊報而今帶徵時勢

萬難委非虛捏嗟此兵火之餘窮荒之地洵應剴切圖繪
而奏請蠲豁者誰謂恤民生非所以固邦本耶管見以
爲籌滇至急之務莫是若伏念職府忝居方面不揣庸迂
冒吐愚忱希惟電照俯言涉虛謬情其立賜處分以儆妄
誕如其不然敬望憲臺迅爲全滇造福詳內字句冗長總
期知無不言言無不盡以彰我

皇仁憲德也

請蠲新荒屯賦再議

王清賢

議得民有積年荒糧而久經不便事有屢經題達而部

議未允者今蒙

皇上下詢憲恩訪查而不備晰陳詳是自負負民更負憲恩以負

皇仁也因不揣冒昧敬陳屯賦荒糧之不饒于民者以供
採擇滇南之有新荒也除民賦尚可勸勉徵輸不敢驟爲
置議外其軍餘屯糧自二十一年至二十三年積欠繁
固不獨武定一隅而武屬和曲州舊附徵武定所各境屯
糧則較之別屬尤爲特甚蓋別屬離省遙遠撫綏之餘易
於復業武屬則密邇省區又爲川省大道當康熙二十年

進剿之時或爲層次營壘而田畝悉成荒墟或經往回踐踏而疆界并失故址又慘遭逆賊馬竄出入蹂躪抄擄殺掠嗟此小民鳥驚獸散奔竄靡寧道逆賊受擒地方有司急行招集而死亡已過其半是以復業倍難職府清賢任事以來日惟率屬招徠給以牛種勸令開墾又奉各憲目擊民艱大張曉諭許以題免凡屬屯民日望

恩綸下逮始未至拋荒殆盡耳查附徵各境屯糧每年計五千一百六十五石零今查新荒實在無徵屯糧康熙二十六年三千六十石零二十二年三千一百六十一石零

二十三年三千二百三十六石零共實在無徵屯糧
四百五十九石零已遵部咨通飭分年帶徵在案身任
催之責豈不欲殫力催科上供國計以副考成無奈武屯
田地既已倍苦于鄰封而屯糧徵輸仍欲暨同于別郡且
無論別郡帶徵有無完欠卽別郡全完武屯終屬全欠蓋
復業之初卽本年應徵亦費拮据况一年而兼兩年之徵
乎此實不便於民雖咎責日加而終無濟於事者也更思
軍民一體皆有新荒何不併爲民賦求免誠以民賦糧額
較輕爲數差少尚可於帶徵中勉力續完屯糧則委屬輕

勞萬難况今各境屯糧已請歸併富民羅次祿豐安寧等
各本州縣其就近歸併武屬和祿三州者不過十分之二
三將來督催之任亦自稍寬但實見帶徵苦累在在皆難
不容緘默不言也伏祈俯恤當目拋荒之故并鑒職府非
爲一己之私實因各憲仰體下詢不敢自負負民并負憲
恩以負

皇仁故不揣冒昧而及覆竇陳也如果所陳非虛懇將二
十一年至二十三年新荒無徵屯糧九千四百五十九石
零特疏題免爲

皇仁浩大而咸周憲思推旣而無遺矣

保甲議

王清賢

緝奸弭盜保境安民莫善於嚴行保甲誠法具在邇時修舉但武屬僻在遐荒漢彝雜處村莊寥落居民星散非若繁聚地方可以一例編甲故須斟酌得宜合零星以歸約束行之而善則民安而樂行之不善則民擾而畏以安民之事而使地方民人有不勝其擾之畏是立法雖善而行之有未善也所以條例開列于左遵而行之庶有實效一每家不論紳衿軍民吏役人等懸一小牌于門首上書

一凡禁人成丁男幾名未成丁男童幾名婦女幾口家人幾名並僱幾名何事生理

一在城內並大村莊以十家爲一甲其往零星村落或一村有十餘家或止有七八家又或附近鄰居有一二家三兩家不等者則不必拘泥十家爲甲或多或少就此附近一甲村中酌量編爲一甲無甲並立大牌照依各家小牌書姓名人丁名口生理于上按月挨次輪管甲長其牌卽立甲長門首逐日將本甲十家人口沿門查詢本家有無因事別出日久未歸之人其有往來熟識親朋素行本分

者問明不必具報外如有面生可疑踪跡詭怪出入靡常
前酒賭博之輩暫住在家井本甲內或有遊手好閒無故
勾連鄰近鄉村雖係識面實乃素行不端者許卽報知約
總公同本甲人等查明如係奸究當卽報官分別拿處但
不許挾私捏誣戕害良善犯者查明反坐

一就村莊遠近五六里內外地方或二三十里或十餘里
立一約總不必另立約保總甲名姓卽以舊設鄉約素常
老成稍有身家並無倚端科派爲鄰里所敬服者當之務
查各里逐日有無面生可疑等輩往來容留該月甲長會

否查詢報聞如有增長並不報明卽赴彼查詢得實立即
報官拿究該約總仍於每月朔望日赴州官衙門具結備
查其約總若果能奉公勤查并無科派所約各甲寧靜無
事每半年終實卽捐貲獎賞倘有藉端嚇詐愚民無故擾
害鄉村者許受害之家并各甲公首拿革處另僉老成
鄉人免滋民害

以上三條若能實力舉行將見良法行以美意迤盜無所
潛藏自然疆宇寧謐此不但可封但舉行之初若委佐貳直
領等員誠恐不無微慮之繁按若遇胥吏則又恐有需索

之弊更約總不得其人必有因公科斂詐擾小民各端今
議令各該州縣行令原設公平勤慎並無過犯鄉約承充
約總如無前項鄉約着令從公僉報務將從前所約各村
莊按人戶多寡道里遠近分別甲數造冊具報州縣官自
行抽查卽以所編甲分實爲公當無私並無隱漏徇欺者
給牌委以約總名色其寫遠村寨有應委首領行查之處
則必令其具結自裹餼糧少帶吏役不許食民一粒一莖
不許費民一紙一文將所查甲分其鄉約果能公當無私
卽詳請該州縣官驗明給牌照例委以約總以督後效其約

總用長不許指稱打那接官派應夫馬供應等項致累甲
民倘有故違一經查實照結官則揭處吏必杖斃約總革
除并甲長從重枷責示衆務使民不驚擾則法始盡善此
又爲力行中興緊至要之義也

屯田賦請照民田起科議

王清賢

查有歷年重困亟當詳議豁減以甦邊隅之苦以昭

皇上無遠弗届之恩者莫如請減新舊裁併之屯賦爲第一
要務滇南軍田與民田阡陌相連并無肥磽之異考之明
制洪武年間沐氏鎮滇分兵屯種名爲屯田因滇南滇黔

陳處將衛軍定爲十分內以三分爲操軍七分爲屯軍各給田地卽以七分之屯軍耕種出租以養三分之操軍及操軍裁革按所收租米數目改爲正供錢糧故軍糧不啻十倍民賦矣自康熙二十一年至二十六年逋欠累七如某某等悉被叅處及裁附各該州縣徵輸又某某等咸罹叅罰此實非屯軍敢于抗欠亦非各官不力催徵總由原額過重因而軍絕田荒一二軍餘已至剝肉醫瘡朝不謀夕迺日見荒蕪日多雖各官日受處分而仍無補於國賦夫衛所奉裁則軍卽爲民軍旣爲民均屬

朝廷赤子查民賦自二三升起科至七八升不等而止矣
軍糧則三四五斗起科不等計通省民賦是在田地六萬
二千八百四十二頃五十餘畝徵銀九萬四百一十二兩
零徵正耗米一十一萬五千五百六十五石零麥三萬二
千八百六十九石零至于通省新舊裁併屯賦是在田地
不過七千五百二十二頃二斗四畝而徵銀至四萬五千
九百三十二兩零正耗米至一十二萬五千二百三十七
石零麥豆穀蕎等項至六千六百八十六石零之多就項
畝銀米而衡較之其爲過重不啻十倍矣

天舜日之下而徵輸不能與民例共遊一視非所以仰體
皇仁而推行德意也除人丁草場地租學租等銀照舊徵納
不議外請將屯賦錢糧各照分隸州縣民賦土則起科計
成熟屯官田地七千五百二十三頃二十四畝零寔徵條
銀一萬九千五百兩零正耗米二萬三千七百一十八石
零正耗麥三千四百一十七石零轉請具題民屯一箇
徵輸旗錢糧永無偏重之累而軍民悉歸畫一之賦矣

積粟備賑議

王清賢

竊惟常平積粟其始由於勸輸原無科派遭徵之舉其繼

則以備賑不致官吏侵蝕之虞法制盡善恩澤旁敷矣然而法久弊生誠恐倉未特立概附額糧之內款項混雜以致報捐報收之時按冊則有而發賑發貸之日開倉則無是立法雖善而奉行不力徒爲虛應故事終鮮寔政謹陳數則以期輪積多而不致於朽腐款項清而難肆其侵蝕遵而行之庶爲可久一積粟貴自上始也上行下效捷於影響身居民上而不自行多輸雖日事諄勸誰其聽之今歲雨暘時若可望歲稔謹照時值買輸市斗穀一百石以爲僚屬紳士漢彝民人之倡俾各趁此秋收多爲捐輸至

於歲時稍歉不必定拘此例一倉收宜互相查報也稽查
數目全憑倉收官報輸之始自是樂捐自無欺捏之事但
地方印官印信在手容有穀未入倉而倉收姑且先報漸
至因循寃無顆粒入倉是紙上有而倉中無也嗣後知府
捐穀附郭州縣印官查明出報倉收本府佐貳附郭州縣
及本府首領儒學并生員捐穀知府查明出報倉收其外
州縣印官捐穀巡檢或儒學查明出報倉收而各州縣儒
學及佐貳首領并鄉紳舉貢監生生員民人士目等捐穀
州縣印官查明出報倉收仍令府州縣印官彙齊倉收併

具印結分報查考如有欠少責令報收印官名下賠補庶
捐輸穀石顆粒俱寔入倉可免捏報之弊卽離任官員亦
便於交盤不致徇混不清一常平倉宜特建也常平一倉
專爲積貯以備賑濟而設原與額徵麥米不同若將歷年
捐輸穀石仍附額徵麥米倉廩難於稽查嗣後府州縣各
宜於高爽地方捐貲修建常平倉一所其附郭州縣附於
府倉以省民力仍分別府倉州縣倉分貯捐輸穀石務使
地方人等咸知此項穀石原爲地方賑濟而設必且相勸
樂輸而蓄積愈多至于倉房空屋宜擇謹慎居民一二家

任君令其看守以免另僱舍夫等費一勸輸之事宜分專責宜于公所也輸穀本爲良法若使府廳過而問焉州縣過而問焉保衛首領過而問焉甚則吏役鄉約等人亦過而問焉寧不滋擾嗣後知府專勸本府佐貳州縣儒學經歷各官府教授專勸府學生員知州知縣專勸所屬佐貳儒學鄉紳舉貢監生民人士目州縣教官專勸州縣學生員而勸輸之時又必于宣講

上諭公所面相勸勉庶事有專責且免他人代爲捏報日後推托之端一賑濟之數目宜冊報奏銷新舊之借還

宜申請出易也積粟既多宜防那蝕或以歷年之久積而
吏胥陰肆侵漁或以前任之勸輸而後官妄行取用則民
不沾恩徒滋申飽嗣後一遇大荒之歲必先查明歷年所
積若干量請發賑地方印官親詣倉所不得濫委吏胥不
得扣剋斛斗務俾顆粒皆有寔際然後按數造冊奏銷
至于年非荒歉亦宜于播種之初或當青黃不接之際查
明所積若干申請出易凡遇收放之期地方印官親赴倉
所查驗務須平放平收不得出少入多淋尖加耗致累小
民庶賑濟之項得以銷除而出易之款依狀蓄積若其中

或有刁奸棍徒有借無還則地方印官仍行按數追楚勿
任拖逋法亦不可或廢一各官輸穀宜嚴禁汎取也旣云
捐輸自須出自己囊若謂萬里邊員俸薪幾許因而汎之
里甲取之民社是民未受益而先有損矣惟嚴汎取之禁
照依時價買備倘果力不能多不妨量力少捐併不許硃
點官封交敕取領之後仍行繳價如有故違卽照劣蹟揭
報亦杜弊安民之一端也

爲閩郡士庶保留司李陶公署府篆公呈 楊立祐

爲地方叠罹艱危刑官力全億命勞勩萬口交頌風規百

代司儀伏乞甄留久任加秩旌功以示公道以鼓勵庶僚
事竊惟生民大難莫慘于遭兵戈有司衍能莫大于救民
命况兩兵構禍盤錯交加萬命倒懸生死莫必此時此際
非剗割表旤萬不能以解難排紛非練達才猷斷無由以
扶危濟險幸遇本府司李陶光胤滿腔慈愛八面玲瓏念
念忠恕存心事事冰霜矢操具海濶天空之量無物不容
負批卻導欵之謀處置各當刑罰懸而不用教化先以躬
行愛士愛民不啻家人父子無遠無近一味旭日和風真
陽城撫字召伯甘棠者歷自三月十九日下車卽遭陳光

烈之變百姓種。蹂躪本官力爲勸解全城賴以保安者
一既而沙寇隨至百千株連本官躬行開諭全城賴以保
全者二此後故百姓于殺場還男婦于擄後與夫招集流
離勸勉耕種種七德意又其餘已迫及六月十七日又有
馬高沐何之變萬騎突臨士民塗炭本官調劑百端全城
賴以生活者三以至二十六日沙寇圍城南兵對壘城內
絕糧諸村罄擄一城性命危如累卵本官挺身城頭面爲
調解入城一民不戮全城賴以生活者四此後求釋無辜
黨類給還鄉村人口與夫掩埋暴骨賑濟饑寒種種德意

又其餘已回思四次兵形其間鱷浪滔天冒鋒鏑以保持
億兆殫心髓以耶異瘡痍或經或權相機應變方之渤海
之精盜寇虞詡之戰奸先作用不殊經綸迥越者也當茲
渾興旁午之秋獲此循良廉吏處常而容保特至處變而
經濟多方真漢時淳異當今推轂難求者迄今重圍初解
湯火未熄本官勞瘁萬狀心血幾枯誠恐將來復命携家
長往伏揣本官萬里艱辛宜諭者積重以屢障危疆全活
萬衆膚功奏闕未有不立膺異數增寵錫秩者但今和祿
元三屬滿目凋殘正當乳哺倘舍此召杜則啼息之餘萬

難生活泣懇天心惻隱兵火之子遺賞晉賢李以調劑或
引例疏請加級俾令久任以竟厥功則不幸遭刼殺之慘
猶幸霑陽春之潤不惟一方得怡特將見萬里有長城上
全忠愛下廟庶司功德無窮朝野均戴

辨

梅蘭村辨

郡人 苟國賓

晉渡之西有村俗曰未閒稽之古志實梅蘭也以江側山
谷多產梅蘭受此稱爾予別業村中而考而易之有客過
而語曰茲梅蘭也子知之子易之如俗所不知何易諸已

乎予曰不然君子待人以雅不以俗期人以博不以陋昔
孔子之作春秋也經書善稻吳名則伊緩也經書太原狄
名則太鹵也經書蚡泉狄名則矢胎也穀梁子曰號從中
國名從主人蓋辨物正名當遵孔子啟穰發隱宜崇穀梁
號從中國故去矢胎太鹵伊緩而從蚡泉太原善稻也名
從主人故介葛盧戎曼子皆不易矣因慨滇處天末山川
名號多誤于方俗之訛物類地形嘗因循於傳會如烏樵
雪山而爲五竜瑯雞高峽而爲高橋嶮嶮之爲祿賸呂閣
之爲呂合金浪巔之爲丁當山瀾滄江之爲浪滄江又不

止梅蘭之爲朱朝耳方言既誤傳說增訛豈雅傳同文之
義乎因注而識之固雅俗博陋之濫觴辨物正名老拳石
與若夫別業清冷之致登臨覽觀之美耳得之而爲聲目
遇之而成色或寄之吟咏發諸嘯歌此中懷所樂也何可
以語人哉

說

獅山雅集圖說

王清賢

士君子登高作賦非徒後遊觀之美也暢叙機神蓋亦有
相得之雅焉余守武之暇輒登獅山從遊者初不乏人爰

湘約曰誥哉以道者何人哉今而後能歌咏性情意念淡
同者皆得環坐其側慕聲薰雅心非龍者歟洵乃公爲蒼
自是而每益必集每集必賦每賦必同性情之雅者我輩
數人而已會余使西川集別於此因繪圖而志其咏諸君
子者一時之選也披圖之下聲容宛然過此相逢尚其告
我以道哉

銘

李母唐節婦墓志銘

程仲愚

節婦姓唐氏孕於和曲之古赫爲獅陽之世族也其女兄

結禍同里環州翹楚李公未幾而薨坎咽節婦從素前其
幼女毓德純貞必能不振家聲因以節婦續諸伉儷以繼
二姓之好節婦少聞姆訓習內則星期之後相夫子事上
親以孝稱當是時流寇作亂海內無寧境節婦佐翹楚持
家御百事事寬和子惠屬爰慈祥有加焉己酉春仲援剿
范應時率兵畧滇地將至環部兵縱暴肆虐不可嚮邇時
節婦携家人避亂小雪坡岩穴中聞威勢甚熾慮爲亂兵
所辱囑翹楚曰公男子且有親在可毋死妾白璧可碎寧
受瑕乎公好爲保全倘得生善視諸子若女妾與日矣言

訖解帶自經合家老幼環泣不能仰視甫氣絕沈兵卽至
見節婦投繯死節生氣凜凜咸驚嘆拜服不敢犯難擄公
父子數十人以去遂戢兵歸武不復剿掠所至乃得安堵
省著節婦一死之所感也卒之日長子斯盛年甫十二被
沈兵迫脅同出郡城羈縻數年不獲躬營葬事一二親故
因募葬節婦於祖塋之側至戊辰仲冬始卜葬於固布魯
山之陽嗟乎節婦不生於中土不讀詩書乃能明於天性
自珍其身如此是不可爲葵族之光耶銘曰太鈞播物電
火流奔人非金石何能久存惟德與節輝映乾坤可無表

著以顯芳魂佳城葱鬱金沙左右蒨嗣嗣上秀毓孔厚屬
憲綱常庶其不朽

文

祝文昌誕文

王清賢

猗以蜀岫香飄七曲山高鍾聖跡武城春滿九天雨化被
人文官士歡騰邦家有慶茲葢伏遇帝君闕下文章垂耆
嗣祿權衡培桂根于陰陽之田吾道于茲未墜種善果于
詩書之圃斯文所以長興賢燕地居家世親聖澤鍾參作
守署傍瑤宮方思輝廟貌而肅光儀乃以屆芳辰而闕聖

域敬洽師生殿拜激陳蘋藻將誠獻降有靈藹呼何盡伏
頽文新宇宙化啟遐荒雖大帝宏文之念維均自是衆施
其造化而清賢作人之心獨切敢邀篤厚于方隅風雷振
將變之魚龍雨露滋不言之桃李俾無忽秀士步月殿而
滿袖天香卽艱嗣者流入蘭房而盈眸異彩同登壽域共
樂長春矣

祈雨文

王清賢

竊惟代天澤物者神也代君子民者吏也故雨暘時若神
之功也民之福也不違農時吏之職也民之幸也幽明雖

殊神代天以澤物吏代君以子民其理一也若縱其魃以
爲殃也肆暴虐而同恤也則神爲不靈也吏爲有位也胥
有愧也貌茲武郡田疇未廣也父老子弟寥也時當仲
夏正有事于南畝也胼手胝足望秋成也胡爲乎旱日也
皎月也萬里晴空也今雖田尚未龜坼也民尚未鳩形也
然而十日不雨沃壤成石田也五日不雨稻秧且索絢也
饔飧何望也賦役何出也神獨默也吏甚惶也也用是
潔茲香楮也率祭屬紳耆祭而言也訟不停也刑不減也
說歛不滯也誅求無厭也賄賂公行也吏之過也神宜糾

也寧及夏之身也毋虐吏之民也若夫泉枯也川竭也駢
陽肆虐也害雲不雨也農墮于野也婦嘆于室也絕吾民
之粒也神之怒也是虛吾民之祀典也愧廟貌之輝煌也
吏亦得以明目張膽而相告也今且月離于畢也雨滂沱
之時也洪範五行一曰水也徵曰貌貌作恭恭作肅肅時
雨若也吏肅而告神也神當肅而顧于帝也不必雨金雨
王也惟冀陰雨膏之也靈不被塊也使吾民飲天和而飲
地德也塗歌巷舞也行將黍稷犧牲用崇報典也

祀橋神文

王清賢

惟神功存則德並周行持王道權衡躋四方于坦平之
域作狂瀾砥柱拯斯民于不溺之天念武郡雖六詔偏隅
而乃北通巴蜀若福田則二州要道而更東接彝陽映帶
城垣旣屬金湯首重縈環瀾嶺且爲文脉攸關雖曰一泓
有坊百雉昔明季之君子爰成志于濟川慨邇來之數年
竟罹災于摧折翳豈神之失馭要由制之未良致使波得
逞其威以故石莫撓其怒多年傾圯亦河伯之未安逐歲
沉流豈守令所忍見賢方初蒞慨然思復前功幸于昨秋
始獲克興盛舉余用首捐微祿衆亦繼相樂施復審度乎

聖

澤水之形遂改修于舊址之遺模雖由舊功實維新以創
爲承合衆成美爰鳩工于丙寅之秋月今告成于丁卯之
春猗苒竟人功是依神力雖方今

人在御凡爾波臣諒自效安瀾之職復何驚撼之我虞而
惟是水牲無常苟非神貺默導其順適之機其孰利賴之
永慶伏願津梁百代康莊萬年詞客相遇獲遂題橋之願
途人履坦永無病涉之憂水紆徐而下雙龍滾鎖彩甃飛
劍氣流清澄而廻五鳳漾成王案見文章孰非斯橋之功
則孰非吾神之庇也哉

贊

楊刺史傳贊

王清賢

余守武時與楊生怡雲作文字交語其太父刺史夔陵事甚
悉冀州陳紫巖撫其事爲本傳余謂公蓋得氣之剛者也
吾儒效法聖賢舍正直乎康而一于剛得無中和之氣有
未足乎然宣尼之言曰吾未見剛者又曰剛毅木訥近仁
剛之爲用非慾而僞可知也公剛于疾惡而卽剛于保身
剛于爲民而卽剛于獲上剛于遠害崇正而更剛于誘人
獎善孰謂剛可易言哉必如公之疾惡且及其子侄而其

子徑當權臨事不敢萌私以侮且以厥後昌太爲慰則剛而仁矣祖型具在怕雲勉乎哉

題跋

題有竹軒

王清賢

嘗謂菴室雖微亦徵經濟蓋爲審顧經營自有因地宜人
之妙若夫峻宇雕牆丹黃鉛粉庸衆之悅耳目耳一經大
雅則尺椽寸壁位置天然縱寓人力而無斧鑿之痕茅茨
清風庶幾再見余寅友尙濟菴構軒于署之右隱眼界橫
空舉凡千村萬壑山川風雨民物桑麻莫不于眺臨中備

得之豈沾沾詩酒自謂爲盡得其意耶余亦旣醉因索筆
率書扁聯以志勝概至克當濟菴經營與否則又不暇計
也

礪石圖書記跋

王濟賢

余來武僑署御史行臺內多先生手書石榻并閱獅壁金
剛經點畫遒勁古雅不減鍾王心焉遐慕又讀先生礪石
圖書記因物寄情冷語猷人熱腸濯世直使世界頑鈍咸
歸琢磨天地生材一無棄置隨其質而用之鑒別在牝牡
驪黃之外耳礪石云乎哉

獅子山米南宮石榻獅子讚跋

王清賢

此有宋米南宮之蹟也王翁之外何由得親不意于獅子山頭頻墻廢基中輯而得之神王欲語精彩如飛且不敢與坡公爲比古來作者自視歔然天下之珍當爲天下公名

補遺

賦

登獅山賦

王清賢

登獅峯兮巍上縱目八荒今怡我情永歎七兮若冷松謨

謾今濤鳴綠鎖朱扉今相錯橫岑臺峻宇今綴落英繁則
今覽勝弔古今荒今謁帝子于高閣今噫嘻悲哉謫爲乎
燕南征悼從亡之諸臣今監操亮節與日月而常貞感慨
無端兮心欲醉吟我未已兮鳥頻驚上巉崖兮緣青藤度
曲徑兮采芳蘅峻嶒奇怪兮鰲石誰登負天之柱兮奠地
之維其說荒唐不可憑陟振衣處兮清風徐生倦道少憩
兮躡身于千仞之岑臨浚泉兮登其亭水曲兮觴若列
坐追盛事于當年兮嘯傲青冥酣歌兮劇飲購墅兮調琴
射獵于高岡兮珥雲沉偶然得句兮泣山靈施揚揚兮萬

里冠裁我今山城心耿耿兮懷

帝京

聖德周天壤兮巍蕩難名俾小臣游覽于山水之間今茲已
久矣沐浴乎昇平

讀獨得軒集飲記賦

李之騏

歲維乙丑序歷季冬群真駐輦集世綵名堂啟萬里青雲之
路開一方赤子之天王公大人席襄平毓秀之盛當公孫
應聘之期彼綵筆之生花今共羨江淹文麗緣清風而作
頌兮敢云吉甫才高若夫軒名獨得記傳集飲托文魔以

寓意借酒神而舒懷謝安東山之望裴度綠野之思此中
別有天地似無今古乃登獅峯而眺武陽兮復見潁川四
長履黃堂而從雙龍兮再睹京兆三王歌召什而朝陽鳳
鸞唐莊篇而天池鵬健又何體國經野而不在乎詩酒文
章之間

重建武定府城垣府治記

雲南學使 陳善

我聖祖混一區宇守在四夷蓋至洪武十五年克平雲南
而西南始通道矣於時土酋內附授以土官職事使統其
衆蓋修其政不易其俗古聖王疆理天下之道固如此按

地理志南詔三十七部武定其一也宋淳熙間段氏舉阿
而者爲羅婺部長凡三傳爲矣格元世祖時爲北部土官
總管至元七年改武定路至我朝阿而八代孫弄積妻商
勝倡義歸附授武定軍民府土官知府嗟乎商勝土婦耳
能知順逆識真主使子孫世守忠順朝廷方念舊勲錄及
苗裔何忍誅絕滅之耶正德間弄積三世孫阿英改鳳姓
潛蓄異謀嘉靖七年英子朝文叛附安賊英媳瞿氏守土
盡職嘉靖四十年小人構謀刦印歸男婦索林自此始多
事矣瞿氏嗣育逆祖圖襲土官屢撫屢叛罪惡盈貫巡撫

都御史兼尚書呂公光洵決意剿賊未幾逆祖授首隆慶元年呂公乃疏于朝請設流官以治之擇鳳氏族人思堯者世授府經歷以承其祀制曰可隆慶三年思堯父鳳曆糾合諸彝謀危城社知府劉君宗寅同知鄧君世彥奉撫院江陵陳公密計一舉撲滅說者謂三君定亂之畧可當數萬甲兵信哉先是府治欹斜四面受制隆慶二年冬陳公因劉公請躬往相度歎曰茲省會之藩籬滇南之右臂也遷城移府乃可長久題奉欽依擇地于獅山之麓然工費巨甚左使鄒公璉曰設險守邦不宜惜費議既定乃以

三年五月初十日起工訖于次年爲石城七百九十丈八
尺有奇爲城樓者四爲舖者七爲水碓者五府治儒學院
道行臺和曲州驛城隍倉禦次第落成雄渾壯固甲于他
郡劉君鄧君爲民服勞始終勤事益貽之以千百年之計
矣五年四月分守叅知羅公元禎分巡憲金石公若磐謂
茲肇建宜有紀述以紹來禩往四年之夏劉君屢言人心
玩愒城工難完大患可虞民鮮固志左使鄔公蹙額向予
曰幸往視工以樹丕績公日坐經濟堂其夢寐尚在獅山
左右也予承公志六月攝洱海道事以行鄔公乃擇賢屬

經歷張效賢同知唐致和李盈門予令分地各願自效諸
當建自者鄔公達于撫臺陳公按院內江劉公皆立報可
乃飛檄東西徵發四集攝巡道朱公壑又協贊之至歲終
而大功告成矣予備員於此久問之人士之言而通論之
曰尚書呂公都憲陳公左轄鄔公太守劉君同知鄧君武
定之民尸而祝之可也何賢乎呂公曰呂公可謂戡定禍
亂功垂百世者也何賢乎陳公曰陳公可謂先事伐謀臨
危制勝者也何賢乎鄔公曰鄔公可謂又安疆宇視國如
家者也何賢乎劉君鄧君曰劉君鄧君可謂盡瘁安集受

民若子者也武定乃新造未集之邑其民爲瘡痍初復之
民巡按曹公許公至武彞目獻土田以贍軍者禦所軍丁
城池完固室家載寧皆分田治屋而咸有固志是役也經
營于隆慶三年五月之夏落成于五年十月之冬其委任
督工員役另載之碑陰

文殊寺碑記

何守拙

寺在郡中者無幾其清迥出塵秀拔可愛者惟城北文殊
寺焉地本舊郡遺址泊遷而荒棄者近七十年矣今建爲
寺又在萬曆甲戌郡人合謀于僧興瓊而成之亦苟完也

越丙子余始來宋會登寺以省歛兵後荒蕪禪關消歇塵
世堪哀古人詠嗟憫慟良足慨也今數年後人物少亨景
色亦殊輝梵宇兩更新之僧徒且集派安期聯榻課演悠
然有伏牛峨眉之風噫亦可以觀時矣往歲曾與李卓
吾方詡菴趙少華刻壇經于五萃山携歸以畀諸寺僧語
之云佛教精微存於是築三條椽下七尺單前其無負此
流光也集中所謂見性是最上乘爲大智人而小根小智
者斯下矣蓋世間惟此法門爲大乘實爲人生大事予師
太湖先生南詢錄云佛之德慧曰文殊言揀擇智也預與

昔賢會合混融透徹總是成就一個固有之理非有待於
外也就汝詩名文殊而以文殊義解之欲汝之自求也予
在郡幾年以得代而去寺僧興瓊懇予爲記遂書此於
之其寒姓備勸請碑陰俱有善念思悟者

獅山梅石亭記

何星文

獅山少梅而多石人皆曰石乃山之骨陳獅山以骨勝而
未也哉無梅焉與石相映譬如士君子負骨嶙峋而氣不
清倚過於剛慢卽高棲遠隱亦索然不韻矣丙午冬觀五
道人踏雪峯頭於文殊院外披棘叢忽得一枝梅倩爾覺

氣骨通靈隨紀數言賦詩一首且囑曉然自倘能構虛亭
于梅石之間使遊人咏何水部枝橫卻月觀樹遶臨風臺
之句豈不爲獅山第一景哉雖然旅客空言不過如山陰
雪夜興盡而返耳迨丁未冬寺僧水谷邀余經營建閣復
向梅石之間擎茶趺坐予再以虛亭相囑水谷欣然應諾
予喜曰上人誠韻僧也落成之後必有名流眺覽於斯時
也一言花似雪便悟有香來則清倚之氣因我而傳獅山
不徒以骨勝也遂署之曰梅石亭

和曲州題名記

孫鳴教

題名之記厥來已邈始乎司馬公之知諫院嗣後歷代因之而記滋繁矣和曲雖介在炎荒其建設厥惟舊矣其遊仕者亦無慮百數十人矣迺稽其姓氏里第履歷匪惟在勝國時邈不可聞卽本朝二百餘年來亦無能言其槩者固前乎此者莫爲之記是以後世無聞焉而予又有以識其故矣蓋州治自隆慶前任者以統轄土府多引避不至縱橫一勉強就任一入境后尋并羈旅省會視此爲傳舍以故民之被其容接者其少而今之能名其姓氏者無之

也教遺際清平至此日與斯民周旋胡越一家可爲大幸
也已茲于公務之暇旁搜衆典周諮耆儒得其州守十八
人始于弘治侯君而終于予州領僅八人始于嘉靖傳君
而迄于武其餘皆不可得而致矣謹叙其次第而鐫之石
自知闕略尙俟後之君子焉顧是石也靡徒侈其名而已
予蓋淡有懼焉夫過每滋于去后而公評定于後世匪石
則名與世溷而斯民之憎好以無觸而靡形今一有之俾
人之見斯石也指斯民也曰恭也賢是昔吾之父母也咸
思德而交頌休光焉曰恭也不肖是昔吾之仇讐也桎治

欲墮碑而燬刻焉如此雖求蠲刷磷泐不得辱莫大焉予
懼後之人將指予之名而摘其過也敢不乾乾惕夕晷所
以宣德怖惠興利除害以求無負于名之實哉若爵之崇
卑官之顯晦此名之名也予我何與焉爰述其義以自警
而因以告未來者觀此亦可同懼矣是爲記

雜誌

學者載籍極博必考驗于詩書之文蓋事歸于經語
求其倫所固然已乃論衡一書中即奉爲枕秘爾雅
所載至纖悉也卓朕自稱一經何哉雜誌者志之餘
也卽俚同方言怪等齊諧誕類子虛咸收入之俾後
之君子有所考焉移小兒于兩山識女星于七乘甚
未可以耳目不廣信理過堅致益其愚爾作雜誌

武定府

望童燃燈

楊春爲諸生時讀書山觀音閣燈
風息燈灺無火震將就寂有童子自前

引火然之
爭之不見

探棟神移

元鎮觀未建之先郡人度池花村寂吉堅
立至夜風雨大作棟梁柱礎並移山下遂

因所移處
建廟焉

黑虎顯異

在府城元鎮山郡人相傳見黑虎遊山上
並隱上有皂旗狀因建元鎮觀

泥馬顯異

府城隍廟大門左古塑二馬作騰驤狀左
邊者忽失所在有祀異之忽傳廟門外有

解馬姓來
觀少頃馬額立原塑處

藤索渡

祿勸所屬昔渡河金沙江多有此渡昔經吸
匠水等處惡既不可施舟楫乃以藤繩一大

索縛于兩岸樹上所謂度索也繩上縛一小木筒
所謂撞也欲渡者以小繩縛人於撞上人自以手
緣大藤而進行達彼岸復自解之所謂尋撞也

白花鼠

在白山山以鼠得名相傳山有鼠白而大

望之若牛土人視之則鼠也身有白花故名
白花鼠夜行山間味爽時歸穴至山頂雞鳴化為

貞

鳥

康熙九年有二大鳥巢祿勸諸君山前大樹
上後棲者為人所傷雖鳥飛鳴尋見其聲

至亥次年春一鳥來自山後始棲于枝漸近于巢
往來飛舞狀若私之是鳥拒不肯
日前鳥率數鳥來是鳥拒不肯
伍如前土人見者皆為貞鳥

獅山中峯巷澗內常有白氣飛騰望之似羊山後武

出五色雲俗傳佛放光

百戶梁旅夢南門城為雨霖垺旅夢當隙與賊對敵

力盡而死

年九月寇名俱失考然忠義之氣不可泯也

跋

古稱不朽者三曰德曰功曰言一事而三善備焉其惟郡志乎志爲立言之書明甚功與德人或視爲故牒莫之深察也試觀志之所載無論人物名宦俾讀者忠孝之氣油然而生卽

山川險要戡定諸事蹟咸足感土人
之善心而銷磨其逆志是書成一時
施及後世故曰功也淳竊聞昔之論
史者矣兼才學識三者之長有史料
而心術正者方可爲之蓋心術不正
則是非失實取舍未當皆爲世道人

心之慮德之所繫詎淺鮮哉襄平
王公讀書探本源敷政崇大體蒞武
五載教養興百廢舉復網羅文獻訂
爲是書

聖天子考治郡績晉 公松茂副憲瀕
行剗剗告竣是役也淳甯執簡從

公問業敬拜手紀其事於後

知祿勸州事信都陳 淳紫巖氏

謹識